

**NATIONAL ASSEMBLY OF
SEYCHELLES**

Monday 20th November 2023

The Assembly met at 9am

Moment of Reflection

Mr Deputy Speaker in the Chair

MINISTRY OF EDUCATION

MR DEPUTY SPEAKER

Bonzour tou Manm Onorab, tou travayer Sekretarya e piblik ki pe swiv nou travay pou sa Lendi le 20 Novanm 2023. E nou touzour dan Staz Komite *Appropriation Bill*, 2024. Kot nou pe pran bann antite, bann MDAs pou regard zot Bidze en pep li pre.

E ozordi i le ka. E ozordi nou annan en pe Minister *heavy duty*. Donk, mon swete ki nou kapab fer travay le neser ki devan nou. Mon ava demann Madanm *parliamentary reporter* pou apel delegasyon Minister Ledikasyon. Mersi.

Antretan mon ava demann *Sergeant at Arms* pou met Lasanble dan Staz Komite?

HON JOHAN LOZE

(Off-Mic)

MR DEPUTY SPEAKER

Onorab Loze?

HON JOHAN LOZE

Mr Speaker, mon ti annan en *matter of privilege* mon ti oule leve avek ou silvouple?

MR SPEAKER

Normalman, *rules* ki nou'n aksepte se ki *you should have* - ou ti'n merit vin vwar mwan avan sa. So nou a kapab fer sa dan *break* 10er. Akoz mon krwar pa si en keksoz ki'n lev la, la, la. So nou ava diskite sa avan. Apre nou ava pran ou *matter*.

HON JOHAN LOZE

Mon ava pas kot ou dan *break* 10er.

MR DEPUTY SPEAKER

Mon ava dir bonzour e *welcome* delegasyon sorti kot Minister Ledikasyon ki'n zwenn nou, dirize par Minis pour Ledikasyon Dr Justin Valentin. I akonpanyen par Sekreter Prensipal pou *Education Services Department*, Manmzel Merna Eulentin. Osi sekreter Prensipal pou *Education Sector*

Development Mr John Lesperance.

E lo *side table* nou annan Mr. Bernard Arnephy ki Direkter Zeneral pou *Institutional Support Services*. E Manmzel Pamela Matombe ki *Acting Financial Controller*. Nou annan de zofisye ki sorti kot Minister Finans bomaten avek nou.

Sa i manmzel Astride Tamatave ki *Comptroller General* avek manmzel Agnes Madeleine ki *Senior Finance Analyst*.

Bonzour e *welcome* zot tou. E parey i le ka, nou envit Minis ki pe diriz delegasyon pou fer a *brief introduction*. E apre nou ava pran kestyon e komantr sorti kot bann Manm. Mersi.

MINISTER JUSTIN VALENTIN

Mersi Mr Chairman. Bonzour Mr Chairman. Bonzour *Leader* Zafer Gouvernman dan Lasanble. Bonzour *Leader* Lopozisyon. Bonzour tou bann Manm Onorab. Tou bann Manm piblik ki pe ekout nou atraver bann diferan medya.

Mr Chairman, mon konmans mon lentervansyon bomaten avek en nouvel byen tris. Kominote Minister Ledikasyon pe si ou le an dey pou lanmor enn nou ban koleg

travayer ; en ansennyan ki ti fer lekol Grand Anse Mahe. E sa se Mis Kelly Joseph.

Donk, mon anvi partaz nou sagren; partaz nou senpati avek Manm la fanmir Mis Kelly. E nou anvi partaz nou senser kondoleans avek bann kominote lekol Grand Anse Mahe. Mon konnen zot en pe boulderse la bomaten. Donk nou tou nou boulderse.

E mon swete ki pandan lazournen nou ava aksepte sa ki'n arive e nou ava rebran lazournen. Me mon konnen i pou en pe difisil. Sirtou pou son fanmir e pour son zanfan. Donk, kominote Minister Ledikasyon antye i senpatiz avek la fanmir e zanmi Mis Kelly. E ki son nanm i repoz an pe.

E an menm tan ki mon pe fer sa lentrodiksyon Mr Chairman, mon rekonnèt ki ozordi, i Lazournen Iniversel Bann Zanfan. Sirtou en lazournen ki koz lo drwa bann zanfan. E nou Minister Ledikasyon nou toultan angaze, pou fer ki bann zanfan zot drwa fondamantal i ganny prezerve.

E yer ti Lazournen Bann Zonm. E konman Minis Ledikasyon mon anvi dabor salye kouraz bann zonm dan Ledikasyon. E osi salye kouraz

bann zonn dan lasosyete Sesel an zeneral.

Atraver ou Mr Chairman Minister Ledikasyon i eksprim son lapresyasyon ek Gouvernman pou kontinyen donn ledikasyon en priyorite spesyal.

En bon ledikasyon i garanti en bon sosyete. Mon lans en lapel pou bann paran, pou kontinyen apir zot zanfan. Pou fer zot konpran litilite annan en bon ledikasyon. E lenportans pou grandi e epanouir byen.

I annan en bon konteks dan sistenm ledikasyon Sesel; prive ouswa piblik pou zanfan epanouir. Dan sak Lenstitisyon edikasyonnel Sesel, i annan en lafors travayer ki annan etidyan a ker. E ki pe donn tou pour ki etidyan i reisir selon zot abilite e konpetans.

Mr Chairman, mon anvitman donn legzanp bann lakonplisman enn de lenstitisyon skoler baze lo sa Bidze ki nou ti gannyen pou 2023. Sa se bann pwen ki bann lenstitisyon zot menm zot in sounlyen konman bann lakonplisman.

E pou donn lasirans sa Lasanble ki Minister Ledikasyon i valorize sa Bidze ki i gannyen. E ki i pe travay pou fer sir ki i reisi son misyon, an

servan son resours ki i gannyen.

Par egzanp, en benefis remarkab sorti kot bann lenstitisyon se akse avek servis *internet*. Par egzanp la lekol Plaisance primer, lekol Cascade, SBSA, e Port Glaud zot pe raport sa.

I annan bann lekol ki pe raport bann amelyorasyon; bann reparasyon, bann lenfrastruktir. Par egzanp met *tiles*. Transform bann nouvo lofis. Lekol Grand Anse Praslin Segonder, Lekol Anse Royale Segonder, Baie Lazare, Anse Royale Primer, Bel Ombre, Takamaka, i sa bann lekol ki pe raport bann lakonplisman dan sa zar.

I annan osi bann lekol ki pe aste lekipman *IT*, *printer*, *photocopying machine*. Bel Ombre i enn. *SITE* i enn, ki pe koz lo sa bann lakonplisman parey. E an term *in-service training*, la mon sit par egzanp lekol *SITE*, lekol SBSA. E preski tou lekol piblik i rekonnet ki i annan en gran kantite mouvman, an se ki konsern *training* pou zot bann staf an 2023.

Minister Ledikasyon ti fer en gran sesyon *training* - anfen pou nou bann ansennyen dan vakans Avril. Ti annan omwen

70 sesyon ki ti tous preski tou ansennyan.

E demen par egzanp, la i annan en group ansennyan ki pou resevwar zot sertifika dan *digital skill*. 44 ansennyan in konmans zot degre avek Liniversite Sesel sa lannen.

Sipor bann ansennyan e lezot travayer dan partisipasyon aktivite lokal osi byen ki aletranze. *SIAD* par egzanp, i enn sa lenstitisyon ki pe raport sa; transformasyon laklas anliny avek nou slogan fer lekol gou.

Baie Lazare i en lekol ki pe raport sa. Anse Royale Primer, Grand Anse Praslin Segonder, Belonie. Nou osi pe vwar bokou lezot liniyativ sorti kot bann lekol zot menm.

Par egzanp, nou vwar ki an Out lekol English River ti fer en *symposium*. E an servan sa *symposium*, zot pe pran bann rekomandasyon pou zot fer zot plan stratezik. E Lekol Baie Lazare par egzanp, ti fer en gran lazournen lar. Nou'n vwar semen pase. E bann lekol ki pe selebre zot laniverser sa lannen.

Nou'n vwar lekol Beau Vallon primer, nou'n vwar lekol Perseverance segonder, lekol Perseverance primer. Sa bann legzanp i zis serten bann lakonplisman ki bann lenstitisyon in raporte ki

manner zot Bidze 2023 in ganny servi.

Mr Chairman, nou rekonnèt sepandan, ki serten bann travay ki nou ti'n predir pa ankor neserman ganny fer. Me dapre lenformasyon ki mon bann zofisye e partner i donn mwan, se ki mazorite bann proze in fini pas staz *tender*. E zot pou ganny fer pandan vakans Desanm.

Enn parmi sa trwa peryod, ki nou kapab fer bann gran renovasyon kot bann Lenstitisyon skoler. Mr Chairman, Minister Ledikasyon i kontinyen son travay pou fer ki ledikasyon dan Sesel i kontinyen progres; bann etidyan i ganny ekspoze ek en sistenm ledikasyon ki relevan e modern.

Bann travayer i travay dan konfor e sekirite. E zot ganny byen rekonpanse pou zot zefor dapre ban striktir ki Gouvernman i etabli.

E nou kontinyen partisip aktivman dan devlopman ledikasyon lokal osi byen ki enternasyonal. Donk mon konvenki, ki sonm ki Gouvernman in donn Minister Ledikasyon atraver Minister Finans, nou pou kapab debrouye e akonplir nou bann lobzektif.

E an pasan Mr Chairman, mon anvi raporte ki Minister Ledikasyon in ekoute e analiz tou bann largiman otour son lentansyon, pou transform Lekol Perseverance Segonder konman sa lekol teknik e vokasyonnel. Nou'n pran desizyon pou pa servi sa lekol, me adopte lezot modalite kour term.

Donk, bann etidyan Mahe ki ti pou antre dan S4 lannen 2024, pou aprezan reste dan zot lekol. Bann etidyan e bann paran in fini ganny enformen lo sa desizyon. E laranzman pe fer pou nou ranforsi modalite aktyel.

Mr Chairman, aprezan mon envit bann Manm Onorab, bann Manm Lasanble pou nou diskite ansanm Bidze Minister Ledikasyon. Mersi Mr Chairman.

MR DEPUTY SPEAKER

Mersi *Minister*. Nou konsyan poudir Ledikasyon i en gro Bidze. Tou Manm pou anvi koz lo la. Donk ki nou pou fer nou pou pran en kestasyon *first round*. E si i annan letan nou ava al dezyenm *round*.

E nou osi demann *panel* pou kit zot larepons *brief and to the point* e kestasyon direk. Mon ava envit Onorab Arissol premye.

HON SANDY ARISSOL

Mersi Mr Speaker. Bonzour Minis avek ou lekip. Bonzour tou Manm Lasanble Nasyonal. Bonzour tou dimoun ki a lekout. E ankor en fwa mon ti a kontan mwan osi lo non nou *Caucus*, prezant nou senpati avek Mis Kelly e son fanmir Mis Kelly Joseph Grand Anse. E Onorab William ti'n ariv en pe an retar zisteman an relasyon avek sa.

Mr Speaker, mon ti a kontan osi premyerman felisit tou bann zonn, ki'n partisip dan aktivite ki ti fer Sanmdi, kot sant lasante Beau Vallon organize par Minister Lafanmir an relasyon avek nou lasante.

So ankor en fwa bann zonn ki ti partisipe mersi bokou. E mon ava fini lo sa pwèn ki Minis in dir, ozordi i lazournen enternasyonal bann zanfan. Mon ti a kontan letan nou lo sa pwèn Minis, mon ti a kontan konman en paran lans en lapel avek Minister Ledikasyon dan mon Gouvernman, pour ki nou aret annan diskriminasyon, ant bann fiy avek bann garson dan lekol Leta an relasyon avek seve.

Parske ozordi nou bann garson zot ganny diskriminen avek zot seve konpare avek bann fiy, ki kapab penny pti

lake, gro lake. Penny anler, penny anba, penny fannen! Be bann garson zot ganny forse, forse pou zot al koup zot seve. Retourn dan lakour al fer zot byen konpare avek bann fiy.

Ozordi bann garson zot okip zot seve pli byen ki bann fiy. Mon pa tro krwar si seve en zanfan i anpes li aprann. So mon ti a kontan ki i annan en diskisyon ouver lo la, ant mon Minister e Minister Ledikasyon dan mon Gouvernman. Pou nou rode ki mannyer nou kapab apros sa en pe pli byen. Pou nou bann paran pa santi zot diskriminen letan i annan en garson konpare avek son vwazen ki annan en fiy. Mersi bokou lo la Mr Speaker.

Mon sel kestyon ki mon ava demande an vi ki ou'n demann en kestyon pou le moman Mr Speaker, se an relasyon avek *TE* dan lekol Leta. Sa ki nou apel *The Art (TE)*. Mon'n ganny demande par en group ansennyan pou demann sa kestyon. Parske zot santi napa ase lanfaz ki ganny mete lo *TE*.

Eski dan sa Bidze ki mon pe donn zot i annan lanfaz kip e ganny mete lo *TE*? Lekel ki responsab sa seksyon dan Minister Ledikasyon ki apel *The Art*? Konbyen larzan i annan? E ki lankourazman pou sa bann

ansennyan ki pe pratik sa? Mersi bokou Mr Chair.

MR SPEAKER

Mersi Onorab. Mon ava envit *panel* pou larepons silvouple.

MINISTER JUSTIN VALENTIN

Mersi Mr Chairman. Mr Chairman, *TE* i en size. Annefe tou size dan sistenm ledikasyon nou pe valorize. I annan bann *working groups* ki'n ganny formen, pou zisteman get bann *curriculum*. E get osi pa zis *curriculum*, me devlopman sak size.

Donk 2024 i pou kot bann diferan *working group*. E nou'n konmanse depi sa lannen la, bann *working group* pou fer sir nou get tou bann diferan size. E pou nou eksplor tou bann diferan opsyon. Bann diferan koze ki annan otour bann size. Pou fer sir ki enn fwa pou tou nou rezourd e nou bouz zot devan. Ki en mannyer bann zanfan e osi bann ansennyan i akonplir dan sa bann size. Mersi Mr Speaker.

MR SPEAKER

Mersi Minis. Onorab Labonte?

HON ANDY LABONTE

Bonzour Mr Chair. Bonzour Minis avek ou *panel*. Minis, mwan osi mon pou rekonnèt ki

English River i premye lekol ki'n fer en *symposium* lannen pase.

E mon konnen poudir en keksoz ki pe ed nou bokou pou pran bann desizyon. Akoz mon vreman *committed* avek mon lekol mwan osi. So mon pou dir Sir Steve kontinyen lo sa *bonne route*.

E an menm tan mon anvi *congratulate* 3 etidyan i annan Richie Payet, Rannia Marguerite avek Nathan Uranie ki ti partisip dan Sanpyon *Quiz* Enter skoler. Malgre zot pa ti sorti premye, me selman zot ti sorti dezyenm. E Richie Payet li ti meyer *scorer* pou dan preliminar. Alor mon dir zot kontinyen sa bon travay, akoz English River i annan bokou talan.

So, mon kestyon i plizoumwèn blende par en group ansenyan ki plizyer fwa - annefe i an kestyon ki mon'n deza demande, ler mon pe get Bidze mon'n war poudir Bidze i annan serten *increase* dan serten *allowance*.

Me selman i annan sa *first cohort blended mode* 2018-2020 ki ti fer *advance diploma in education*. E i paret mwan zot sertifika pa pe ganny rekonnèt malgre ki zot ti ganny ankouraze pou zot fer sa.

Eski sa Bidze i pe *cater* ki omwèn zot kapab ganny en

keksoz pou ankouraz zot pou sa letid an plis, ki zot in pran pou kapab donn zot pli *capability* dan zot travay? Mersi.

MR DEPUTY SPEAKER

Mersi Onorab. Mon ava envit *panel* pou pran larepons.

PS JOHN LESPERANCE

Mersi Chairman. Mersi Onorab. Annefe, wi, an 2020 ti annan en group *Teachers* ki ti fer zot *advance diploma*. E pandan sa letan, *the scheme of service* pa ti pe rekonnèt *advance diploma* koman en kalifikasyon ki i otoriz en *increment*.

Be aktyelman i annan en legzersis ki nou pe fer. I annan 2 legzersis. Enn nou pe regard, re regard, re get *scheme of service* e apre nou pe revwar sa *advance diploma* dan Ledikasyon, ki nou pou *fix* sa bann *anomalies* tre byento.

E nou rekonnèt poudir ti annan sa dan *scheme of service* avan.

MR DEPUTY SPEAKER

Mersi Mr Lesperance. Mon ava envit Onorab Loze pou son kestyon.

HON JOHAN LOZE

Mr Speaker, mon le komans par ofer mon senpati Mr Nelson

Joseph e son fanmir pou dese son fiy. Mr Speaker, mon le osi eksprim mon dezapwentman avek Minis ki dan son lentrodiksyon, Minis pa'n donn nou en apersi lo ki fason larzan ki'n pe ganny aporsyonnen, pou ganny depanse dan son Minister.

I pa'n donn nou en *overview* lo ki manner i pe al depans larzan ki nou, nou sipoze aprouve pou li.

Mr Speaker, mon pou *pick up* kot PS in kite. PS ou'n les nou konpran ki ou pe revwar *scheme of service*. Be mon pou demann ou en kestyon la, aköz so far tou antite ki'n vini nou'n ganny dir *scheme of service* pa pe ganny revwar napa lespas fiskal.

E pou sa lannen i annan zis 2 ki'n ganny touse; enn mon le konnen ki manner ou, ou'n war lespas fiskal pou ou revwar *scheme of service*. E si ou kapab donn en *timeline* apepre kan zot pou termin sa louvraz, pou bann profesyonnel ledikasyon ki pe ekout nou ozordi tande?

E PS Onorab ki'n koz avan mon in lev sa size *blended learning* ki ou'n, ou'n tous lo la. Ou annan bann lezot *bits and pieces* osi ki zot bezwen touse; par egzanp bann diferan kad ki'n fer RPL parey bann sekreter

dan lekol ki'n fini konplet zot RPL depi an Fevriye mon krwar.

E zot ti ganny dir poudir *at the time* ti napa larzan dan Bidze. So si zot ti kapab donn en mansyon si i annan larzan dan Bidze an se moman pou *cater* pou zot? Mersi Mr Speaker.

MR DEPUTY SPEAKER

Mersi Onorab. Selman pou rapel Lasanble wi, nou gard nou obzervasyon lo 1 pwen pou nou al dan dezyenm *round*, aköz telman i annan Manm. Lo sa size *scheme of service* mon ti pou osi lo *panel* demann probableman *Comptroller General* Manmzel Tamatave pou entervenir lo la. Parske sa zafer *scheme of service* i kontinyelman repete.

Pou nou ganny en larepons plito zeneral ki manner sa zafer i marse. Aköz si sak Minister i vini *the question* i leve, koumsa ki tou Manm Lasanble e piblik ki pe ekout, nou i ava konpran ki manner, ki manner Polisi *scheme of service* son bann, son revizyon partikilyerman i marse dan *public service*. Mersi panel pou kestyon silvouple.

COMPTROLLER GENERAL ASTRIDE TAMATAVE

Mersi Mr Chair. Bonzour Mr Chair. Bonzour tou Manm Onorab e tou dimoun ki a lekout. Mr Chair, zisteman parey ou'n dir, depi Lendi pase mon krwar dan tou Bidze ki'n vini sa size *scheme of service* in monte.

Ou bezwen rapel ki Gouvernman i annan li apepre 12 mil travayer dan sekter piblik. E lannen pase Gouvernman ti donn en logmantasyon zeneral pou tou travayer.

10poursan e ki sa letan nou pe get li lo Bidze 2024 i plis ki R200 milyon, lenpak *salary review* ki Gouvernman in pran an 2023. Pou Ledikasyon tousel - si mon pou refer li avek Ledikasyon - konpare avek larzan ki nou ti donn Ledikasyon 2023 pou *salary review*, son lenpak 2024 i R12 milyon Mr Chair.

E nou bezwen, nou bezwen kontinyelman *remind* nou lekor, ki sa *increase* lannen pase, *minimum* tou dimoun ti ganny R1000.

Malgre bokou pei o monn pa'n *afford* pou donn en revizyon saler zisteman aköz, lekonomi global i ankor pe *recover from* pandemik advers *COVID-19*. E tou lekonomi i reste vilnerab anver tou bann sok advers.

E Sesel nou koman en pti pei ki depan bokou lo *tourism sector* nou lekonomi i reste pli vilnerab. E okenn *increase* ki nou donnen dan saler, oubyen dan bann keksoz ki apre i vin permanan, nou bezwen fer li dan en fason ki pou soutenab.

Soutenab pou Bidze e soutenab pou nou lekonomi an zeneral. Mr Chair, *scheme* i annan diferan fason *scheme* i kapab ganny revize. I pa neserman ki i bezwen fer en provizyon saler an plis.

Parey mon'n ekout *PS* Lesperance bomaten reponn kestyon Onorab Labonte, in mansyonn ki i annan serten kalifikasyon ki pa pe ganny rekonnet. En *scheme* i kapab ganny amande, ki son *narrative*, son deskripsyon ladan, i kouver serten dimoun ki ozordi pa pe benefisye anba en *scheme*.

E sa i en louvraz ki *PSD* i fer avek tou Minister kontinyelman. Aköz bann *scheme* ti ganny a en letan, petet kalifikasyon ki ti annan sa letan i ti en kalite kalifikasyon. E an mezir letan i bouze kalifikasyon i ganny amande.

Mon a donn ou en legzanp tipik, si mon kapab pran en *Scheme* en legzanp kot Finans; *let's say* degre ki ti ganny rekonnet anba en *scheme*

partikilyerman ti *accounting*, pa ti pe rekonnèt en dimoun avek *economics for example*.

So si en dimoun i vini avek en kalifikasyon *economics* anba en *scheme* ki spesifikman pou ki ti target en dimoun ki ti annan *accounting background*, sa dimoun i pa pou benefisye *fully*.

Me, ou kapab fer amannman dan sa *scheme* ki ou elarzi kalifikasyon ki sa *scheme* i rekonnèt kot ou fer antre *economics*, kalifikasyon *economics*, kalifikasyon *investment*.

Ki en dimoun i vini avek en lot kalifikasyon i kapab benefisye anba sa menm *scheme*. Dan ladres Bidze Minis in osi koz lo *functional review*. Mon krwar avan ler ki nou Gouvernman nou kapab donn en logmantasyon ankor lo saler, nou bezwen regarde si striktir Gouvernman, oubyen size of Gouvernman i enn ki soutenab.

I soutenab pou Bidze an zeneral. Ozordi saler i reprezant 11.7poursan of *GDP* Mr Chair. Ki en sonm ki en poursantaz en sif ki ganny konsidere ase o, par rapor avek bann pti leta zil.

Savedir letan nou pe dir *increase scheme*, nou pe dir fer sa poursantaz monte. Eski sa *ratio* pou reste soutenab? Sa en

kestyon ki nou bezwen demann nou lekor. E nou bezwen fer lezot kalkilasyon; en ta pei pe bouz lo saler poursantaz of reveni.

Si nou fer sa pou Sesel, nou poursantaz i bokou o. so nou bezwen okenn desizyon ki nou fer, fer li dan en fason ki annan en responsabilite moral e sosyal par deryer, ki fer sir ki sa *amount* i reste soutenab pou pei e pou lekonomi. Mersi Mr Chair.

MR DEPUTY SPEAKER

Mersi *Comptroller General*. Mr Lesperance ou annan ti annan en pwen ki ti ganny adrese avek ou lo zafer *blended learning* - en keksoz koumsa?

PS JOHN LESPERANCE

Mersi Mr Chair. Wi dan leka *blended learning* avek *RPL*, nou okouran ki ti annan en group *staff* ki ti pe sivre - pe sivre prosedir pou ganny zot konpansasyon atraver *RPL*. E provizyon in ganny fer.

Toultan nou fer ki i annan provizyon ki si *staff* i ganny met lo en program *RPL*, e zot ganny zot konpansasyon baze lo zot kalifikasyon ki zot in ganny atraver *SQA*.

E nou ti a demande si i annan petet *staff* ki nou, nou pa okouran ki'n sivre sa, ki pa'n

ganny zot konpansasyon, si zot a fer Minister Ledikasyon konnen. E nou ti a fer sir ki zot, zot ganny zot konpansasyon. Mersi.

MR DEPUTY SPEAKER

Mersi Mr Lesperance. Onorab Zailor?

HON NADDY ZAILOR

Mersi Mr Chair. Bonzour Minis avek ou lekip. Permet mwan de lapar mon non personnel, e mon koleg Onorab William ankor enn fwa, prezant nou senpati avek lafanmir Kelly avek kominote Grand Anse Mahe avek lekol Grand Anse Mahe.

E mon asire zot pou dan nou lapriyer pandan sa moman difisil. Mr Chair, mon kestyon al ver detay dan Bidze Minister Ledikasyon. Anba *other goods and services*, mon war en logmantasyon dan *foreign consultancy fees*.

Eski Minis i kapab donn nou en, en leksplikasyon as to kwa ki'n fer sa logmantasyon konpare avek 2023? Mersi.

MR DEPUTY SPEAKER

Mersi Onorab. Mon ava envit *panel* pou donn larepons.

MINISTER JUSTIN VALENTIN

Mersi Mr Chair. Mr Chair, sa i konpri en travay ki nou pe fer, pou fer ki lotonomi dan lekol i vin en realite. E nou annan nou en konsiltan ki pe travay avek nou e deza nou pe fer en proze, en *pilot* dan en seri lekol. Mon krwar i annan 10 lekol.

Sa prosedir pe pas 11 lekol, sa prosedir pe pas pe dir pe pas tre byen. E anliny avek filozofi Gouvernman ki lotonomi lekol i vin pli otononm, donk sa i en keksoz enportan ki nou pe met lanfaz lo la. Mersi Mr Speaker.

MR DEPUTY SPEAKER

Mersi Minis. Mon ava envit Onorab Vidot pou kestyon.

HON AUDREY VIDOT

Mersi Mr Chairman. Bonzour Ms Tamatave e Minis avek ou delegasyon, tou Manm piblik ki a lekout. En bonzour spesyal pou zabitan Roche Caiman. Mr Chairman, nou note ki pou travayer Seselwa lekonomi i vin vilnerab, me kot i konsern pou politisyen tou keksoz pe fer byen.

Mr Speaker, mon kestyon pou ledikasyon, vi ki nou'n ganny dir lo sa size *scheme* kot i tous travayer Seselwa espesyalman nou bann ansenyan, napa vreman gran, gran benefis. Mon pe demande

atraver sa Bidze ki la akoz mon'n pas dan bann diferan laliny Bidze pou Ledikasyon.

E mon pa pe war vreman gran amelyorasyon kot i konsern ki tous direk bann benefis finansyel, ou pou donn sipor *teachers* Seselwa. E mon pe demande mon'n war i annan en gran logmantasyon R400 mil ki par kont ki tous pou *foreign consultancy*.

Dir nou Minis, dan sa Bidze ki la, kantite vreman ki zot Minister Ledikasyon in mete pou nou siport nou bann ansenyan Seselwa pou donn zot plis sa motivasyon e sa disparite ki i annan?

Baze ek sa logmantasyon ankor ki nou'n war la dan *foreign consultancy*. Ki tous pou bann for bann *foreigner teachers*? Mersi.

MR DEPUTY SPEAKER

Mersi Onorab. Mon a met *panel* pou donn en larepons.

MINISTER JUSTIN VALENTIN

Mersi Mr Chairman. Mr Chairman, pou ledikasyon nou pe koz bokou keksoz pou ankouraz bann *teachers*. Nou annan par egzanp e mon'n dir dan mon lentrodiksyon, ki i annan 44 Ansenyan me letan mon pe ganny bann, bann

figures, akoz i annan en group ki osi *in service*.

Ki nou pe kont, kont lo la i annan 57 *teachers* ki'n antre pou komans zot degre dan avek Liniversite Sesel. Nou osi koz lo *improvement* dan laklas, bann *furniture* sa osi i form par pou ankouraz bann *teachers*.

Nou kree loportinite, ler zot par egzanp ler zot get dan mon bann sikse ki nou ti fer dan sa lannen, nou'n ankouraz bann Ansenyan pou partisip dan bann aktivite lokal osi byen ki enternasyonal. Nou'n fasilite sa pou zot.

Bann Ansenyan ii al fer bann *internship*, i al fer bann vizit menm aletranze. Sa osi i bann fason, bann fason pou siport zot. E dan Bidze par egzanp pou sa lannen, nou pe koz lo en *Laptop Scheme*, ki nou pe fer pou bann, pou bann *Teachers* e bann *management*.

Donk, i annan bokou mouvman dan Bidze e ki nou pe, ki nou pe fer pou fer sir ki ansenyan pa zis ansenyan travayer Ledikasyon i santi zot konfortab. Mersi Mr Speaker.

MR DEPUTY SPEAKER

Mersi Minister.

HON AUDREY VIDOT

(Off-Mic)

MR DEPUTY SPEAKER

Consultancy i ti lo kwa?

HON AUDREY VIDOT

Pou *foreign consultancy* Minis, pa'n elabor lo la *please*. Sa logmantasyon.

MR DEPUTY SPEAKER

In donn en larepons lo kestyon, Onorab Zailor. In dir poudir akoz pou kestyon lotonomi lekol, i annan en *expert* ki pe travay avek Minister Ledikasyon. *This is why* Minis oule zis klarifye sa, pangar mon ki'n mal konpran?

MINISTER JUSTIN VALENTIN

Non zisteman son kestyon sete, ki mon pe fer apard ki sa konsiltasyon. Donk, mon'n reponn amwen mon pa'n konpran son kestyon.

HON AUDREY VIDOT

Mon'n - Mr Chairman avek ou permisyon, mon'n dir Minis donn nou leklersisman osi, akoz i annan en gro logmantasyon R400 mil an plis dan Bidze, donn nou detay. Akoz mon pa krwar i zis pou annan pou fer avek sa ki'n reponn kestyon Onorab Naddy Zailor.

MINISTER JUSTIN VALENTIN

Mersi Mr Chair. Mr Chair, *consultancy* - i annan plizyer - i annan plizyer keksoz ki osi *engage* dan *consultancy*. I annan pei sa dimoun li menm, e osi sa travay. Akoz pandan sa travay pe ganny fer i annan lezot keksoz.

I pa zis en peyman pou sa dimoun osi. I annan bann lezot keksoz ki pe ganny fer. Ansenyan pe benefisye dan bann *professional development*. Bann lekol an zeneral pe benefisye dan *professional development*.

Bann enteraksyon i annan bann materyo ki bezwen aste osi. Donk, sa *consultancy* ki nou pe koz lo la, i en *package*. I pa zis neseserman en saler pou en dimoun. Mersi Mr Chairman.

MR DEPUTY SPEAKER

Mersi Minister. Mon swete la i en pe pli kler. Onorab Labrosse.

HON RICHARD LABROSSE

Mersi Mr Speaker. Bonzour Mr Speaker. Bonzour tou Manm koleg, tou travayer Lasanble Nasyonal e tou dimoun ki a lekout.

Mr Speaker, Minis, mon osi mon anvoy mon kondoleans avek ou Minister, ek tou zabitan

ek travayer Lekol Grand Anse Mahe.

Minis, mon'n war dan Bidze la ki zot i annan ankor en pti larzan ankor zot in mete pou finisyon renovasyon lekol Plaisance Segonder.

E dabor osi mon ti a kontan osi remersye ou lekip pou sa travay ki zot pe fer kot lekol primer - sa *fencing* ki mon war li pe al lo staz finisyon.

Minis, mon ti a kontan konnen pou renovasyon lekol segonder, eski ou annan en dele letan, kan ki sa travay konpletman sa travay pou konpletman terminen. Ouswa ki bann defi ki zot pe rankontre pou fini sa proze? Mersi Mr Speaker.

MR DEPUTY SPEAKER

Mersi. En kestyon spesifik. *Panel?*

MINISTER JUSTIN VALENTIN

Mersi Mr Chairman. Mr Chairman, lenformasyon ki mon annan, se ki sa pou ganny konplete an Desanm. Mersi Mr Speaker.

MR DEPUTY SPEAKER

Desanm sa lannen, wi.

MINISTER JUSTIN VALENTIN

Wi, Desanm 2023.

MR DEPUTY SPEAKER

Ok, mersi. Onorab Samynadin

HON KELLY SAMYNADIN

Mersi Mr Chair. Bonzour Minis avek ou delegasyon. Mon osi mon pou profite pou mon anvoy mon senser kondoleans avek lafanmir Joseph e kominote lekol Grand Anse Mahe.

Minis, mon kestyon i vize ver bann *tuck shop operators*. Mon war en alokasyon R37 milyon 932 an term *school meal services*, ki garanti provizyon *breakfast* ek dezennen kot lekol pou bann etidyan.

Me selman i annan konplent ki i annan bann Manm *staff* kot lekol ki enkli *teachers* ki anmenn bann prodwir pou manze ensi ki *soft drinks*. Ki enkli bann prodwir ki pa rekomande, dan kriter ki ganny demande, pou bann *tuck shop operators* kot lekol.

Zot pe fer lavant kot lekol e la vi ki pe terminen nou war ki i annan etidyan ki pa pe vin lekol. Par egzanp manrmay S5 i fer ki lakantite zanfan ki vin kot lekol i diminyen e lavant byensir i pa parey.

So, mon ti a kontan konnen ki provizyon ki pe ganny fer anba Bidze Minister Ledikasyon, pou asire ki bann ka kot *teachers* ek *staff* pa kontinyen avek bann lavant

ilegal ki kot lekòl i kontinyen?
Mersi.

MR DEPUTY SPEAKER

Mersi Onorab. *Panel* kestyon.

MINISTER JUSTIN VALENTIN

Mersi Mr Chairman. Mr Chairman, anefè anba programm Minister Ledikasyon pou anba son programm nitrisyon, i pa sipoze annan - byensir i pa sipoze annan bann lavant okenn lavant manze ilegal par okenn endividi lo lekòl.

E sa nou pe ranforsi li pli byen letan la avek sa programm obesite ki nou pe fer. E i annan en bon pe sansibilizasyon pou ganny fer avek tou dimoun, pou fer zot konpran ki nou pe sey *achieve*.

Me Gouvernman i kontinyen met, met - *I mean* met fer provizyon pou tou etidyan, tou etidyan primer sirtou e osi byen segonder, ki anvi, ki anvi partisip dan son programm *breakfast* e dan son programm dezennen, i kapab fer li.

Donk si bann - e nou, nou pe fer sir atraver larzan ki nou'n mete pou *school meal* nou fer sir ki nou, nou travay avek sa dimoun ki donn manze lekòl, pou fer ki napa sa-sa kad. Zanfan pa war en rezon, pou

nepli war en rezon pou zot aste bann manze ki nou apel *inverted comma* "ilegal." Mersi Mr Chairman.

MR DEPUTY SPEAKER

Mersi Minister. Mon ava kriy Onorab Monthy.

HON PHILIP MONTHY

Mersi Mr Chair. Bonzour Minis, *PS* e delegasyon. Mon kestyon i santre en pe lo *training* Minis. Ou'n koz en pe lo 57 *teachers* ki pe al fer zot degre. En pe dan ki mannyer sa larzan *training* dan Bidze i ganny partaze egalman ant bann lenstitisyon.

Akoz mon, mon annan en lenstitisyon plizoumwen la *SITE*, *SITE* ki bann *teachers* i ganny *train*. Ki zot pe dir dan 5 an okenn *teacher* pa ankor ganny okenn form of *training*. I annan ki anvi al fer zot *masters* ki pa pe ganny sa sans ale.

So ki mannyer Bidze *training* in ganny partaze egalman, ant bann lenstitisyon pou fer sir ki napa okenn lenstitisyon ki ganny kit deryer? E sirtou ler ou pe get *SITE* bann *teachers* i ganny *train* laba.

So nou bezwen fer sir ki nou bann *teacher* laba tou kou zot azour lo nivo konpetans pou kapab partaz sa avek bann

teacher bann trainee ki pe vini?
Mersi.

MR DEPUTY SPEAKER

Mersi Onorab. *Panel?*

MINISTER JUSTIN VALENTIN

Mersi Mr Chairman. Mr Chairman, *SITE* pe fer son plandaksyon, son stratezik plan, ki en keksoz ki nou pe *welcome* en kantite. Akoz Minister Ledikasyon e nou fer sa prononsman menm avek *SITE*.

Pou ki nou siport zot total dan zot devlopman, akoz nou anvii ki *SITE* zot, zot sa group dimoun byensir ki, ki *lead* devlopman, devlopman lansennyman dan Sesel. Donk zot plan stratezik ki zot pe fer, nou pou siporte e nou pou fer sir ki zot bann Ansenyan i kontinyen devlope.

E byensir, devlopman bann Ansenyan i pa pou neseserman osi vedir bann kour, bann kour lonterm. I annan osi bann kou vreman kour term me vreman efikas. I annan osi konmela bann loportinite pou bann ansenyan pou partisip dan bann konferans e nou ava etabli en plan atraver zot plan stratezik zot pe vini.

Nou ava etabli en plan pou fer ki *SITE* i bouz devan

avek zot plan formasyon. Mersi Mr Chair.

MR DEPUTY SPEAKER

Mersi Minister. Onorab Cosgrow.

HON WALLACE COSGROW

Mersi Mr Chairman. Bonzour Minis avek ou *panel*. Bonzour tou Manm e tou dimoun ki pe ekout nou lo radyo. Minis mwan mon pe get zot *current challenges bullet 3* ki pe koz lo "*attracting and retaining qualifies Seychellois professionals* dan *teaching* pou asir kontinite dan sistenm, en?

Now sa zafer *scheme of service* i kontinyen monte, i pou kontinyen monte akoz dan bann Minister, Minis zot bann Sekreter Prensipal zot kontinyen dir avek bann dimoun poudir, nou pou revwar - nou pe revwar bann *scheme of service*.

Me selman lo kote Minister Finans *PSB* nou pe ganny dir en lot keksoz. So si ou war i kontinyen monte, se akoz i annan serten konversasyon ki pe pase dan bann Minister, ki fer bann dimoun annan serten *hope*, ki annan serten revizyon ki pou ganny fer.

An di-z-an sa Minis, mon anvii konnen, eski i annan

okenn posibilite an relasyon avek sa *bullet* ki la letan nou pe koz lo *retention*. Eski i annan okenn posibilite ozordi ki nou revwar sirtou dan - Annefe mon krwar *even* dan Minister Lasante i devret pe get sa.

Me la mon krwar ozordi ou ki la Ledikasyon, ki nou revwar petet Polisi *Long Service Allowance*.

Akoz *teachers* nou bezwen *teachers* pou *teach* pou en bon pe letan. E en kantite *teachers* ozordi ki dan sistenm, se bann dimoun ki'n travay en kantite letan. Si nou anvi *retain* zot, enn bann keksoz ki dakor pa dakor, se finansman ki-ki - enn parmi bann keksoz se finansman ki *retain* dimoun dan landrwa travay.

So eski zot annan okenn plan dan 2024 atraver Bidze, pou revwar zot, zot pozisyon ver *long service allowance*? Revwar zot pozisyon anver *scheme* e revwar zot pozisyon anver saler?

Sirtou saler diferan ki i annan ant *expatriate* ki pe fer menm louvraz dayer avek nou *teacher* Seselwa ki zot santi zot en pe dezavantaze dan sa-dan sa ka? Mersi Mr Speaker.

MR DEPUTY SPEAKER

Mersi Onorab. Eski *panel* i kapab azout en larepons sa kestyon.

MINISTER JUSTIN VALENTIN

Mr Chairman, Ledikasyon ti a kontan toultan retenir son bann ansenyan. Me selman parfwa sirtou pou donn larzan i pa neseserman depan lo Minister Ledikasyon. E sa nou Kontroler Zeneral in eksplik byen. I depan osi lo sistenm pei, diskisyon ki annan ant *PSB*, Minister Finans e osi byen sa Minister.

Nou Minister Ledikasyon, nou met nou pare nou. Nou pe met nou pare letan ki nou pou ganny dir ki nouvo *scheme of service* i pou pare pou nou kapab ganny enplimante.

Akoz i annan en bann group ki pe fer bann travay dirize par *PS*. I annan bann group ki fer bann travay. Me selman mwayen la pou le moman pa permet.

Me ki nou fer an atandan? Ki nou fer? Sanmenm sa ki nou rod lezot opsyon. Par egzanp ki mon'n dir, nou fer sir la nou war, nou war ki nou pe met bann fasilite *internet* bann fasilite menm donn bann resours an plis bann ansenyan.

Pou sa osi i kontinyen, i kontinyen donn zot serten benefis kot nou kapab. Donk

pou le moman parey nou'n dir, pou le moman nou napa en nouvo *scheme of service* ki nou pe fer.

Me nou, nou pe travay nou ledikasyon nou pe met nou pare pou le moman i arive pou nou kapab egzekit nou *scheme of service* ki nou annan. Me pou le moman non napa nou pa kapab fer sa. Mersi Mr Chairman.

MR DEPUTY SPEAKER

Mersi. In demann kekyon lo disparite saler. Eski i annan disparite saler ant etranze avek Seselwa dan Minister Ledikasyon?

MINISTER JUSTIN VALENTIN

Mersi Mr Chair. Napa tro gran disparite saler ant dan ledikasyon ant etranze avek lokal. Me sa ki i annan, se sa Lalwa Sesel se ki etranze i benefisyen en lakaz. Donk i fer prezan kot en Seselwa li dizon li, i bezwen i lwe son lakaz peye, pou li lwe en lakaz li *expatriate* bon i pa peye. Donk sa i fer ki i annan en, en disparite.

Me selman an term, an term saler, an term saler napa gran disparite ant 2 dimoun ki annan menm kalifikasyon; 2 dimoun ki annan menm kalifikasyon. Mersi Mr Chair.

MR DEPUTY SPEAKER

Mersi Minister. Onorab Lemiel.

HON SYLVANNE LEMIEL

Mersi Mr Chair. Bonzour Mr Chair. Bonzour Minis avek ou delegasyon tou dimoun a lekout. Minis, 2 an pase ou ti vin dan nou Lasanble e ou ti vin avek en seri reform ki ou ti anvi fer dan Minister Ledikasyon. Mon ti a kontan konnen atraver Bidze ki ou'n gannyen, dan lefase 2 an i fer ki ou'n vin dir nou sa bann reform.

Kwa ki ou'n *achieve* e sa Bidze 2024 kwa ki reste pou ou fer atraver Bidze 2024 ki pou anmenn en pti pe plis soutyen. Apard sa bann reform ki ou ti dir, ladan ti annan bann soutyen dan ou reform ki ou ti dir ou ti pe anmennen pou bann *teachers*.

E osi dan bann laklas ti annan bann sanzman bann menm teknolozi e tousala ki ou ti pe dir. Petet la kwa ki ou'n *achieve* e kwa ki ou pa ankor *achieve* ki reste ou pou ou fini fer.

E dir nou dan ou Bidze 2024, kwa ki ou annan pou ou al fer pou ou kapab kontinyelman amelyor sistenm ledikasyon? Mersi.

MR DEPUTY SPEAKER

Mersi Onorab. *Minister?*

MINISTER JUSTIN VALENTIN

Mersi Mr Chairman. Mr Chairman sa keştyon i pou demann mon en pti pe letan pou mon organiz mon largiman. E bann, bann, bann fe, me selman mon kapab vitman koz lo serten keksoz.

Par egzanzp nou ti annan en premye plan, pou anmenn teknoloji dan lekòl. E sa nou lo bon semen nou lo bon semen pou anmenn teknoloji dan lekòl e la nou kontinyen osi dan sa Bidze ganny larzan, pou nou kapab pey nou bann internet ki nou pe mete.

E osi ed bann *teachers* pou ganny en, en *laptop* e osi byen nou'n aste par egzanzp serten lekòl - en bon pe lakres par egzanzp zot in aste zot televizyon pou met dan laklas.

Donk nou lo bon semen pou fer ki teknoloji, teknoloji i antre dan, dan ledikasyon byen menm. Nou ti annan osi en plan pou nou fer lotonomi e sa i en proze ki vreman an avan e ki tou bokou avek tou lekòl ki pe partisip dan sa proze pilot, zot konfortab, zot satisfè.

E la sa lannen 2023-2024 ki pe vini la nou pe al *scale up the project* ki fer ki prezan lezot lekòl pou *on board* e i annan larzan dan Bidze pou sa ganny akonplir.

Nou ti osi pe koz lo *teaching and learning; teaching and learning* i, i osi ankor par egzanzp i lo bon semen. Enn parey mon'n koze taler mon'n dir, nou pe revwar lafason ki *curriculum* i ganny zere.

Ankor sa osi i annan larzan, pou nou met ansanm nou bann *working group* pou fer ki nou kapab fonksyonnen pou fer ki, ki bann diferan, diferan size i, i avans devan. Donk i annan 15 diferan *working group* ki nou'n fer e sa 15 diferan *working group* i adres sak size e zot pe fonksyonnen tre byen.

Nou ti pe osi koz lo problemn disiplin, disiplin pou nou sa i reste en, en, en gro defi. E anefe larzan direk pou atak disiplin ou pa pou war li direk. Me selman ki ou pou war, ou pou war poudir bann ansenyan pe ganny sipòte pou partisip dan bann konferans dan bann *workshop* dan bann, dan bann sesyon.

E i annan menm ki pe al, ki pe al etidye dan bann laspe, kot zot kapab pli byen konpran disiplin dan lekòl.

E en lot provizyon ki nou pe fer se ki nou pe kontinyen apir nou bann zenn psikolog ki pe antre dan sistenm pou zot kapab osi partisip dan sa *landscape* kot nou pou nou met

annord nou sistenm disiplin dan lekol.

E donk vwala, vwala an gro en pe, en pe sa ki nou ti lentansyon ki nou ti anvi e, e si ou pou get nou *PPB statement*, ou pou osi war bann defi sa bann keksoz ki reste en defi. Donk vwala sa i an gro an zeneral.

MR DEPUTY SPEAKER

Mersi *Minister*. Mon krwar i ti demann ou si ou annan larzan 2024 pou kontiny lo bann keksoz ki ou'n komanse.

MINISTER JUSTIN VALENTIN

Wi, egzakteman Mr Chairman, wi i annan; i annan larzan dan Bidze mon konfidan ki i annan larzan dan Bidze pou nou kapab fer avanse devan nou bann, nou bann lentansyon.

E parey mon rezonnab, mon *realistic* i annan serten keksoz i vre nou pa kapab mon pou servi sa lekspresyon ledikasyon pa pou kapab degozye Gouvernman pou fer sa.

Akoz i annan bokou proze, bokou plan bokou lezot Minister ki pe rod en pe keksoz dan sa pers. Donk nou reste realis, nou rod keksoz ki priyoriter nou sey adrese o firamezir. Bann keksoz ki en pe pli irzan pou nou adrese.

Donk sa Bidze ki nou'n gannyen Mr Chairman, mon konfidan ki nou kapab deboury avek. Mersi.

MR DEPUTY SPEAKER

Mon kontan ou litalizasyon sa mo Kreol "degozye." Onorab Herminie.

HON WILBERT HERMINIE

Bonzour Mr Chair. Bonzour Minis avek *panel*. Minis, mon a diriz ou lo ou *current challenges* boulet 8 "*meeting diverse needs of learners for general education and skill development pathway*." Minis la mon pou al en kou lo sa program *TVET* spesifikman.

Ou ti mon ti anmenn en kestyon apepre 3 mwan pase *regarding* bann konsern ki bann paran Perseverance ti annan sirtou lo sa *TVET program*. Ou ti *dismiss* mon bann konsern, epi la mon'n war ki zot in *go back* lo sa desizyon e zot in deside pou pa fer sa programm laba.

Sanmenm sa ki nou dir ki zot en Gouvernman ki tat tate dan fernwar. Mon kestyon Minis, eski ki pou arive avek sa programm *TVET* prezan? E ki pou arive avek sa bann etidyan sa bann ansenyan *sorry* ki pe *study* deor Lasin ki ti pou vin dan travay dan sa programm?

Akoz sa i kre en ta lensertitid zis parey bann ansenyan ki ti lo sa program *Blended Learning* ki ti ganny promet zot *allowance* tel ki *teachers in charge* avek bann kordinater.

Ki la aprezan ki nou pe tandé ki zot pa pe ganny sa *allowance*? Mersi Mr Speaker.

MR DEPUTY SPEAKER

Mersi Onorab. *Panel* a donn nou en larepons.

MINISTER JUSTIN VALENTIN

Mersi Mr Chairman. Mr Chairman, premyerman, mon anvi enform Onorab ki nou en Gouvernman i en Minister ki ekoute. E nou Minister Ledikasyon, nou'n ekout lavwa bann zelev.

Koman en Minister Ledikasyon nou pe menm osi *subscribe* avek bann filozofi *UNESCO* par egzanp pou met zanfán e ansenyan lo sant, lo sant desizyon dan Minister Ledikasyon.

E pou nou dan Ledikasyon, sa in en moman apropiye, pou nou donn lespwar etidyan, ki letan zot koze kot zot annan bann rezon valab nou ekoute e nou pran bann desizyon.

Donk i ti en fason osi pou nou Minister Ledikasyon,

montre bann etidyan ki nou pa zis dir bann keksoz alalezer e nou aktyelman viv sa ki nou dir. Sa i enn.

Donk, nou'n pran sa desizyon e sa desizyon ozordi *teachers* i konpran ki nou'n fer. *Head Teachers* i konpran ki nou'n fer.

Dezyenm pwen bann ansenyan ki pe partisip dan bann *training* aletranze pa zis pou pa'n fer sa zis pou lekol *TVET*. Sa in ganny fer osi pou zot konpran *TVET* an zeneral dan sistenm ledikasyon.

Akoz ler Minister Ledikasyon pou *implement* son *TVET* Polisi ki pa pou zis S4 ek S5. Sa bann etidyan sa bann ansenyan i valab i reste, i reste la koman bann Ansenyan enportan ki konpran ki manyer pou bouz *TVET* dan en lot, en lot dimansyon.

Trwazyenmman napa nanryen ki pou dizon ganny-ganny enpakte an term lo bann zefor oubyen bann benefis, oubyen bann depans ki'n ganny fer. Akoz parey mon dir, tou bann tou bann ansenyan pe vin travay dan sistenm.

E *TVET* i en keksoz ki nou pou kontinyen annan e nou pou ranforsi li poudir avek bann *skill* la, ki bann lezot dimoun, dimoun in gannyen. Vwala.

Prezan ki pe arive la, ki pou arive se ki nou pou ranforsi sa sistenm aktyel kot bann zanfan sirtou bann zanfan S4 la mon pe koze.

Akoz sa program sa lekol ti pou 2024 - *I mean* pran zot an konsiderasyon. Donk zot pou al premye term i pou sa term, kot nou pou pe eksplik zot, ki manner lemonn travay i fonksyonnen.

E apre nou pou servi ranforsi model aktyel model aktyel se ki zot al 3 zour dan lemonn travay dan en lendistri apre zour zot retourn kot lekol.

E nou, nou pou fer sir prezan ki sa 3 zour ki zot al kot lekol zot pa al parey avan kot zot zis ganny plase. Zot pe travay i annan en seri landrwa travay ki nou'n deza antre an kontak avek e ki'n pare pou akey nou bann etidyan. Nou pe donn bann *skills* spesifik ki nou pou fer bann zanfan al fer.

E nou pou *monitor* zot lo en baz kontinyel sa ki zot pe al fer, pou fer sir ki apre zot letan dan sa landrwa travay zot pa zis vini dir mon'n al laba. Me zot pou annan en *portfolio* ki zot pou kapab montre ki zot in aprann e ki zot in fer.

E pou annan nou bann *liaison officer* ki nou pe travay vreman pres avek zot, bann *liaison officer*, pou fer sir ki al

get sa bann zanfan kot landrwa travay, e ki an konsiltasyon avek sa bann landrwa, travay pou fer ki bann etidyan i ganny en *good deal* letan zot lo, zot lo sa bann letan lo sa bann plasman.

E ki pou annan osi diferan, letan bann etidyan pou retourn dan lekol sa 2 ou 3 zour, sa 3 zour sa 2 zour plito - sa 2 zour i pou retourn lekol, zot pou aprann bann *technical subjects* ki konmela zot pa gannyen. E ki sa nou krwar i enportan.

E sanmenm sa ki nou pe fer ki nou bann dimoun ki'n al *overseas* Lasin pou zot partisip dan sa bann *TVET program*, zot osi konpran ki pase laba pou zot vin avek dan nou sistenm ledikasyon, pou fer ki nou bann zanfan osi i benefisye.

Donk, pou mwan, sa ki'n arive la pou Minister Ledikasyon, enn, i reprezant en Minister ki ekout son bann zanfan, ki anvi partisip ek paran osi aköz paran, paran ti pe war en-en konsern.

Paran lakominote ti pe war en konsern nou'n ekoute e nou'n pran en desizyon ki dan zot faver. Paran i kontan sa ki'n arive sa desizyon. *Teachers*, ansenyan i kontan.

E la an 2024 prezan nou ava gete ki bann lezot, lezot lepa

lezot *step* ki nou pou fer, pou nou bouz *TVET* lo sa oter ki mon krwar *TVET* i devret bouze. Mersi Mr Chair.

MR DEPUTY SPEAKER

Mersi *Minister*. Onorab Romain.

HON GEORGES ROMAIN

Mersi Mr Chair. Minis, bonzour ek ou delegasyon. Mr Chair, permet mon avan mon demann mon kestyon, mon war ki sa Bidze Minister Ledikasyon pe ganny pli gro Bidze sa lannen.

E pour mwan sa i demontre ki sa Gouvernman i pe met bokou dan nou zenn, ki anvi war nou zenn definitivman benefisye dan zot lavi demen. E alors sa Gouvernman pe vreman *invest* dan nou zenn, en?

Mon kestyon Mr Chair, i lo kote bann etidyan ki al etidye deor. Mon krwar Minis i okouran kekfwa lo sa kestyon ki pe vin lo la, aköz nou'n ganny en pti dyalog lo la, ki i annan etidyan ki'n al etidye Lasin 5 an dan pou montre *art* dan lekol. Be malerezman ler in tournen, i ankor war li i pa ankor kapab antre dan sistenm.

E i en pti pe- en pti pe enkyetan lo sa size aköz mon menm mon'n enterakte ek Minister Ledikasyon lo sa size.

Zot in kominik ek li be selman i ankor pe espere depi Zilyet in tournen.

Alors, mon kestyon Minis atraver ou Mr Chair, ki vreman bann difikilte ki Minister Ledikasyon pe fer fas avek, kot nou kapab war nou zenn e pa zis pou sa enn kekfwa pou lezot osi tou.

Ki kapab antre dan sistenm ki *at least* ou kapab pe kontribye kot lakour? Aköz la ozordi i ankor pe depan lo son manman. E mon ti a kontan si Minis i kapab donn nou en kestyon en, en larepons lo sa kestyon. Mersi Mr Chair.

MR DEPUTY SPEAKER

Mersi Onorab. *Panel*.

MINISTER JUSTIN VALENTIN

Mersi Mr Chairman. Mr Chairman, i volonte, i volonte Minister Ledikasyon pou abzorb sirtou bann ansenyan ki'n al *overseas* ouswa bann Ansenyan ki'n menm pa'n al *overseas* ki'n fer en kour dan lekol, pou zot kapab ganny abzorb.

Me selman ki nou ti pe konstata bann difikilte ki nou ti pe gannyen, se ki pou size lar an partikilye ti napa *vacancy* pou size lar.

Me mwan, mon *lead* bann dimoun pou fer lezot-lezot

aksyon sirtou si nou annan konnen lar e nou pe donn lar bokou prominans dan ledikasyon. Lar i sa premye *working group* ki ti ganny kree e depi Zanvye i sa *working group* ki'n kontinyelman depi Zanvye ziska - mon poudir yer swar - zot ankor, pe bouz devan pou fer ki *arts education* dan lekol i transformen.

Donk sa dimoun an partikilye mon pou nou pou pran plis ankor son detay, aköz mon krwar sa i en ka ki nou bezwen get ladan.

Me selman parey mon ti pe dir ou, e lenformasyon la ki mon'n gannyen - lenformasyon la ki mon'n gannyen sa dimoun an partikilye ti ganny ofer en landrwa pou travay. Me selman i ti *decline*; i ti *decline* sa landrwa pou travay.

E sa ti sel landrwa ki nou ti annan pou pozisyonn li, i ti *decline*. Me mon pa anvi koz lo ka okenn dimoun personnel lo televizyon. Donk, mwan, mon pran sa responsabilite pou sa dimoun vin war mwan avek mon lekip pou nou koze. Me selman an zeneral ki mon anvi dir, Minister Ledikasyon e osi Gouvernman Sesel i pe fer li la prezan koman en priyorite, pou nou aliny demann nasyonal avek bann letid ki nou anvoy bann zanfan pou fer, zisteman

pou pa annan sa problemn pli tar, kot ler en etidyan i tournen i dir i pa'n en plas travay, i pa'n ganny, aköz napa ouswa aköz i plen.

Donk i annan sa travay ki Minister Ledikasyon, Minister Finans osi byen ki Minister Lanplwa pe fer, pou nou kapab armoniz-armoniz mankman travay e osi avek letid ki nou anvoy nou bann zanfan fer.

Donk sa i en pe sa dinamiz ki pe arive. Me mon konfidan si bann etidyan - aköz ler nou pou fer sa, sa plan armonizasyon, nou bezwen osi ankor sansibilizasyon - pa zis etidyan me sansibilizasyon paran.

Aköz ou konnen mwan depi ler mon'n komans get dan sa bann roulman *scholarship and so on*, ou war bann etidyan ki vini -" mon ti annan en rev depi ler mon ti pti baba mon anvi fer sa, mon anvi fer sa."

Konnen pou, pou ed li-pou ed li sanz son profesyon sanz son letid en pti pe difisil. Me avek serten *counselling* ki nou fer nou reisi.

Donk, pou annan bokou sansibilizasyon. Me nou krwar nou senserman krwar ki en sistenm kot nou aliny, nou aliny letid avek mankman avek *manpower needs* dan pei, i pou en keksoz ki pou mars tre byen. Mersi Mr Chairman.

MR DEPUTY SPEAKER

Mersi *Minister* pou larepons. Mon pou aprezan envit Onorab Naidu pou demann son kestyon.

HON SATHIYA NAIDU

Mersi Mr Chair. Bonzour Minis ek ou delegasyon. An relasyon avek bann lakonplisman, zot in site poudir zot in *enroll* premye *cohort* 16 *counsellors*, pou zot ganny bagaz neserman pou deservi sa responsabilite.

An relasyon avek bann *counsellors* ki deza la, ki pe travay dan bann lekol, mon konsyan poudir ki konportman en zanf an ouswa sityasyon ki relye avek en zanf an ouswa son laprantisaz, i dan zot kontrol dan lekol.

Sa ki ariv an deor pa neserman anba zot kontrol me i annan pa mal sityasyon ozordi malerezman se sa ki nou, nou'n erite. Kot zanf an i annan difikilte ki zot pe pas atraver zot prop lavi, ki mannyer sa bann *counsellors* i travay avek Departman Sosyal, ouswa menm avek Departman Fanmir. E pou kwa pa menm Lotorite Distrik, pou nou sey regarde ki mannyer eski nou kapab ed bann zanf an lo sa laspe.

Ki byensir parey mon'n fer resorti i pa neserman zis zot

responsabilite tousel, me nou annan en problem ki la e fodre ki nou adrese.

E mon ti a voudre konnen ki si ou atraver ou Minister, pe fer esansyel pou nou kapab fer bann lavansman ki vreman neser? Mersi.

MR DEPUTY SPEAKER

Mersi Onorab. *Panel?*

MINISTER JUSTIN VALENTIN

Mersi Mr Chairman. Mr Chairman, *networking* ant Minister Ledikasyon, Minister Spor e Lafanmir e osi Sosyal i ekselan, i ekselan. E i annan sa bann pwen par egzant pwen konportman.

Menm pwen par egzant bann etidyan, etidyan ki ozordi nou war nou, nou bezwen pe dir ek zot koumsa, pa vin lekol akoz ganny sispann nou servi sa mo ganny sispann.

Nou pe rod en alternativ pou tousala, nou pe rod en alternativ, nou pe rode ki mannyer menm avek osi bann lezot *partners*, ki pa neserman Minister bann lezot *workplaces* pou NGOs pou nou kapab gete ki mannyer nou kapab adres sa *issue*.

Nou konsernen. Nou konsernen sak ou war annan de ler dan 7er ou tann *WhatsApp*, mon *WhatsApp* i sonnen - ou pe

krwar poudir, ou pe krwar poudir en mesaz kot en zanmi ou war en dimoun pe anvoy en lager pou mwan.

Pe anvoy en lager pou mwan gete. E pou mon ou konnen i pa gou, i pa gou. Donk nou anvi adrese sa bann keksoz. I fatigan. Nou anvi adres konportman zanfan. Nou anvi, nou anvi ki zanfan, ki zanfan i grandi byen; ki zanfan i grandi byen.

Donk Minister Lasante - pa Lasante - Minister pou sa enn topik Minister Ledikasyon, Lafanmir e Sosyal, pe travay ansanm. E byensir nou annan nou program, nou program PSE dan lekol ki adres, ki adres bann konportman, ki fer ki manner bann zanfan pou zot grandi byen, pou zot for.

Pou zot *build* zot rezilyans dan bann diferan aksyon. Donk i annan diferan travay pe ganny fer. E ankor bann diferan sipor ki nou pe gannye la dan nou Bidze nou kapab fer li.

E sa ki enteresan avek Bidze Ledikasyon, nou annan sa fleksibilite osi. An mezir nou ale nou war poudir konnen i annan bann nou bezwen nou re prioritize. E nou koz avek Minister Finans, Minister Finans i donn nou sa swa, pou nou kapab sa sans sa swa pou nou osi re prioritiz nou bann

levennman pou atak bann ki pli irzan e ki demann plis latansyon. Mersi Mr.

MR DEPUTY SPEAKER

Mersi *Minister*. Onorab Woodcock.

HON WAVEL WOODCOCK

Mersi Mr Chair. Mr Chair, se avek gran tristesse ki mon fek aprann lanmor nou santener dan distrik Grand Anse Praslin Mr Raymond Hoareau. Permet mwan pou pas mon senser kondoleans lo mon par e de lapar zabitan Grand Anse Praslin pou lafanmir Hoareau, sirtou pou son 2 garson Roberto avek Kenneth Hoareau.

E osi mon kondoleans pou lafanmir Crispin e Bistoe pou lanmor en lot veteran Man Sisi Madanm Letcy Crispin ki osi fek kit nou. Mersi bokou. Mr Chair, mon annan en mon keston i baze plizoumwenn konm dabitid mon kontan met lanfaz lo bann proze kapital.

E dan Bidze i annan, i annan 2 proze prensipal lo lekol Grand Anse Praslin primer avek Praslin segonder. I annan en alokasyon R3.6 milyon pou *total financing* pou 2024 ziska 2026 pou tou lede lekol. Pou primer i 3.6 milyon e pou segonder i pou 2024 pou 2026 *total financing* i R6.5 milyon.

Mon kestyon - mon ti a kontan konn en pe - akoz mon konnen en pe sa bann travay in konmanse sa lannen, i pou kontinyen dan sa bann lannen ki pe vini. Mon kestyon si Minis, i kapab donn en pe detay bann travay ki pa ganny antreprann lo sa 2 lekol?

E osi demars ki ou Minister pe fer pou nou ganny teren, pou nou fer sa lakres Grand Anse primer? Akoz parey nou konnen pou le moman lakres Grand Anse Praslin i baze kot primer Grand Anse Praslin. Mersi bokou.

MR DEPUTY SPEAKER

Mersi Onorab. Nou ava envit *panel* pou donn en larepons.

MINISTER JUSTIN VALENTIN

Mersi Mr Chairman. Mr Chairman, pou lekol sa 2 lekol an partikilye, mon napa direkteman ki egzakteman bann travay. Akoz ki mon annan an gro la se renovasyon lo, lo sa lekol.

Mon napa detay egzakteman ki pe al ganny fer laba. Me selman si ou donn mon en pe letan, mon personnel ki lo latay akote i kapab donn mon en pti, en pti lenformasyon lo la.

Me an se ki konsern laplenn, nou annan en

konversasyon - mon'n ganny en premye konversasyon avek bann zofisyé *SIAH*.

Ki nou pou al en kou Praslin ansanm nou pou al get teren e byensir nou pou envit ou Onorab. Nou pou eksplwat sa landrwa e nou pou fer en konsep. Akoz nou annan en zoli konversasyon, ki nou ki annan en zoli konsep ki kapab ganny devlope laba.

Donk, donn annan en pti, annan en pti pe pasyans nou a koz lo laplenn dan en lot sesyon. Mersi Mr Chairman.

MR DEPUTY SPEAKER

Mersi. An atandan ki nou pe esper larepons sorti kot *side table*, nou ava demann Onorab Porice pou demann son kestyon, apre Minis i kapab retourn lo travay spesifik.

HON DOYACE PORICE

Mersi Mr Chair. Bonzour Minis, avek ou delegasyon. Mr Chair, mwan osi mon pou pas mon senser kondoleans avek lafanmir Hoareau e Crispin dan distrik Grand Anse. Minis, mon pou felisit ou Minister pou sa travay dir e sa transformasyon ki zot pe fer, kot i pa fasil dan Minister Ledikasyon.

Sa ki fer mon pli apresye sa, sa, sa *Forum Teachers* ki zot ti fer lo Praslin, ki montre ki zot

in vin ekout bann *teachers* lo Praslin e zil pros.

Minis, vi ki ti annan plizyer, plizyer reparasyon kot Lekol Primer Baie Ste Anne. Eski dan sa Bidze 2024, i annan larzan pou kontiny sa bann reparasyon pou Lekol Primer e Lakres Baie Ste Anne Praslin? Mersi.

MR DEPUTY SPEAKER

Mersi Onorab. *Panel?*

MINISTER JUSTIN VALENTIN

Mersi Mr Chairman. Mr Chairman, dan Bidze 2024 napa, napa reparasyon mazer ki'n ganny planifye pou Lekol Baie Ste Anne.

Sepandan lekol zot annan, zot annan zot osi zot fon *maintenance* ki zot kapab servi, pou si i annan bann, bann ka ki zot krwar i-i nesaser. E nou osi dan Minister Ledikasyon letan nou pe get - akoz nou annan en sonm larzan pou bann - annou apel li bann keksoz ki arive dizon bann *emergencies* - nou annan sa larzan.

Donk si nou war poudir i annan okenn lekol, ki la mon pe ganny bann zoli sif. I annan 184 mil anfe, R184 mil ki nou met a kote. Donk, bann lekol ki annan bann reparasyon ki bezwen fer, i kapab alert nou e

nou bann zofisye pou al gete e fer le nesaser.

Bon, pou kestyon Onorab Woodcock mon'n ganny lenformasyon la ki annan en vye blok ki annan en renovasyon ki pe al fer lo vye blok kot lekol - vye blok lekol. E apre i annan lespas an plis ki pe al ganny fer pou kapab siport *TE* apre bann lezot size lar. Vwala, mersi Mr Chair.

MR DEPUTY SPEAKER

Mersi Minis pou sa klarifikasyon. Onorab Pillay.

HON SEBASTIEN PILLAY

Mersi Mr Chairman. Mr Chairman, premyerman les mon eksprim en pti pe mon dezapwentman ki pandan lentrodiksyon ki Minis in fer, i pa'n mansyonn ditou bann sif, bann gro, gro sif.

Ki i annan dan son Bidze zis pou nou kapab ganny en konpran parey tou bann lezot Minis in fer. Mon war sa poudir i pa-i pa normal pou, pou nou *proceed* dan sa fason.

Me neamwen mon'n regarde sa bann sif e mon ti a kontan ki Minis i donn nou serten presizyon, lo serten bann *figures* ki i annan dan son sif, *ok?*

An se ki konsern ou *wages and salaries*, mon war

poudir sa lannen Gouvernman in donn ou sa *across* diferan lekòl. Ki nou ti a kontan ensiste lo en larepons, se ki pou sa group dimoun ki swadizan *scheme*, i sipoze ganny revwar, pou enkli zot *Blended Learning Mode Advance Diploma*, eski zot pou ganny zot logmantasyon sa lannen? Eski zot pou ganny sa logmantasyon sa lannen.

Wi, oubyen non? Annou aret vir an ron aret donn nou bann larepons isi laba, pou nou kapab ganny en konpran si vremen sa bann dimoun pou gannyan sa logmantasyon.

An se konsern lekòl *Perseverance Vocational School* Mr Chairman. Minis, ti ensiste an Septanm ki Gouvernman pou *forge ahead*, avek sa proze, malgre tou dimoun ti dir ou ti, ti demann ou konmsi pou met fren lo la.

E ou'n vin devan Lasanble, ou ti promet nou lenformasyon lo sa proze, ki ou pa'n zanmen donn nou! La finalman ou vini ou dir nou ou pa pe fer. Fondamantalman ki nou le konnen nou war R7 milyon ki'n ganny mete, pou Bidze 2025 koman en prozeksyon pou en *vocational training center*.

Eski ou kapab dir nou kote pou fer sa *vocational training center*? E si sa R7

milyon i sipoze larzan total pou fer sa sant *or* i annan en lot landrwa ki zot in idantifye pou zot kapab, pou zot fer sa travay?

Mr Chairman, mon ti a kontan ganny sa 2 larepons presi san ki nou vir an ron avek en bann leksplikasyon ki pa donn nou okenn lenformasyon! Mersi Mr Chairman.

MR DEPUTY SPEAKER

Mersi Onorab. *Panel?*

MINISTER JUSTIN VALENTIN

Mersi Mr Chair. Mr Chair, les mon klarifye en keksoz sirtou pou lentrodiksyon. Sak dimoun i swazir lafason pou li fer son lentrodiksyon. E mwan, mon ti war li apropiye pou mon komans mon lentrodiksyon par osi koz lo bann lakonplisman.

E mon ti pe swete ki tou Onorab i konn lir sif, alor zot annan en sif devan zot pou zot lir sa sif. Tou sa sif i devan zot. Donk pa fodre nou repet bann keksoz ki la devan nou. Pou mwan sa i - i en gaspiy-

Well, pa neserman en gaspiy letan, me sakenn i annan son fason ki i fer son stil. E mwan, mon'n al dan sa stil koumsa. Vwala. Dezyenm pwen, dezyenm pwen, nou'n koz lo *BLM*.

E nou'n dir si i annan okenn dimoun la dan ki, ki pa'n ganny rekonpanse pou son *BLM*, i kontakte nou e Minister Ledikasyon i rekonpans li *accordingly*. Sa i kler.

Minister Ledikasyon pa anvi pran larzan okenn *teachers* nou anvi tou *teachers* i ganny rekonpanse parey nou krwar zot devret rekonpanse. E ti annan en komantr lo konmansman ti dir pa rekonnet **LBM - BLM*. Sa i fo konseps.

Tou *course* ki Minister Ledikasyon i met lo program e nou i met lo program i anvoy son bann zofisye, nou rekonnet, nou rekonnet.

E apre trwazyenm pwen se ki nou pa pe koz la kourt term lo en lekol teknikal pou le moman.

Me okenn larzan ki ava annan i annan, i annan bann keksoz ki pe arive dan *technical school*. E sa i en larzan *TVET*; sa i en larzan ki nou kapab servi pou kontinyen develop *TVET* dan ledikasyon. Mersi Mr Chairman.

MR DEPUTY SPEAKER

Mersi Onorab, Minis. Onorab William.

HON SEBASTIEN PILLAY

(*Off-Mic*)

MR DEPUTY SPEAKER

Wi, ou'n nonm 7 milyon in dir ou kontinyasyon program *TVET* sa ki mon'n konpran mwan. Minis, ou kapab presize i pe dir dan ou dokiman i koz lo en *center*.

HON SEBASTIEN PILLAY

I koz lo en *center* sa - ki mannyer i kapab vin dir mon pe al dan program - en, en lot keksoz? War se sa nou problemm avek sa bann Minis, Mr Chairman.

MR DEPUTY SPEAKER

Minis, klarifye sa.

MINISTER JUSTIN VALENTIN

Wi, Mr Chairman. Zis demann Onorab pou *lead* mwan egzaktaman lo ki paz i pe swiv *please*.

MR DEPUTY SPEAKER

Wi, paz - ale dir nou Onorab, dokiman? Ki paz? Anba ki *program or?*

HON SEBASTIEN PILLAY

Mr Chairman, mon war li drol ki en Minis i vin devan Lasanble, i pa konnen poudir in demann Gouvernman en provizyon pou en *Technical and Vocational Education Training Center*.

MR DEPUTY SPEAKER

Dir nou lo ki paz?

HON SEBASTIEN PILLAY

Ki mannyer ou pa konnen ki ou'n demann sa e ou demann mon paz. Mr Speaker, mon pa poudir li paz. Li ki sipoze konnen kote son Bidze i ete!

(Interruptions off-mic)

HON SEBASTIEN PILLAY

Pa i fek dir mwan mon konnen?

(Interruptions)

MR DEPUTY SPEAKER

Napa paz, nou *move on*.

(Interruptions off-mic)

HON SEBASTIEN PILLAY

Li i pa konnen!

MR DEPUTY SPEAKER

Onorab William, Onorab William.

(Interruptions off-mic)

HON SEBASTIEN PILLAY

Li i pa konnen li menm, i fer riye!

MR DEPUTY SPEAKER

Onorab William *proceed with your question please, thank you.*

HON SEBASTIEN PILLAY

I sipoze konnen koman Minis, i dir mon, mon konnen li i pa konnen!

(Interruptions off-mic)

MR DEPUTY SPEAKER

Onorab William *please proceed with your question!* Mersi.

HON WAVEN WILLIAM

Mersi Mr Speaker. Mr Speaker, avek ou permisyon mon ti a kontan eksprim mon senser kondoleans avek Mr Nelson Joseph son madanm Elka Joseph e son gran manman Madanm Elna Madeleine.

Lafanmir Madeleine, Joseph e administrasyon lekol Grand Anse pou pert Mis Kelly Joseph. Mr Speaker, i pa fasil napa mo pou, pou eksprimen letan wikenn ou konn en dimoun ti la vivan avek ou.

E soudan lanmen bomaten ou dekouver ki i nepli la. Alor mon senser kondoleans avek zot. Mr Chairman, mon keston i konm swivan. Minis, mon war ki dan Bidze i annan apepre en R25.7 milyon pou *repairs and maintenance*.

Mon anv demande si lekol Grand Anse Mahe Primer in ganny mete osi dan plan pou *repair and maintenance?* Akoz

mon war ki i pe komans grenn par bout, e mon per ki i kapab serten morso beton tonm lo zanfan ki pe pase.

E son bann feray osi tou i o bor lanmer i annan en bon pe dega. So mon anvi konnen si i annan reparasyon.

An menm tan lefe ki Lekol Lagrikiltir pe sorti eski pou annan en renovasyon total letan sa bann zanfan i sorti pou al dan zot nouvo lekol? Mersi.

MR DEPUTY SPEAKER

Mersi Onorab. Nou ava envit panel pou donn larepons.

MINISTER JUSTIN VALENTIN

Mersi Mr Chair. Mr Chair, pou lekol Grand Anse spesifikman i annan omwen *200 - R0.2 milyon ki'n ganny mete pou fer bann travay renovasyon lo, lo lekol Grand Anse. Mersi Mr Chair.

MR DEPUTY SPEAKER

Si nou get ler i zis pe al 10er30. Ki endik nou ler ki nou ti'n ganny dir kan nou sesyon i fini. I reste nou 5 Manm ki ti'n lev lanmen pou demann kestyon. Me mon dezole.

Akoz ler ki zot in lev lanmen mon'n *go according to* sa lord. E mon ava fer sir poudir *next time* si zot lev lanmen, zot ava ganny en pe

priorite me i zis koumsa, en? *I'm sorry about this.*

Donk, in ariv ler prezan pou nou pas lo en vot pou *Ministry of Education* ki trouve lo paz 300 a 317 sonm ki'n ganny bidzete pou li i R1 bilyon 348 milyon 779 mil. Mon ava demann tou bann Manm ki an faver pou endike silvouple?

Okenn Manm ki kont. Mersi. Vot pou *Ministry of Education* pou en sonm R1 bilyon 348 milyon 779 mil i annan 25 Manm ki'n vot an faver, napa Manm ki'n vot kont e napa Manm ki'n *abstain*. Donk sa vot in pase.

Mersi. Nou pou pran break la e letan nou retournen 11er nou pou konsider Bidze *Institute of Early Childhood Development*. Donk nou a rezwenn 11er.

(BREAK)

INSTITUTE OF EARLY CHILDHOOD DEVELOPMENT

MR DEPUTY SPEAKER

Welcome back tou dimoun pou kontinyasyon nou *Committee Stage* lo *Appropriation Bill, 2024*. Prosen antite ki nou pou diskrit zot Bidze i *Institute for Early Childhood Development*.

E sa i trouve lo paz 324 a 332 pou en sonm R41 milyon 432 mil. Mon pou envit *panel* fer lentrodiksyon apre nou pran kestasyon. *Be mindful* i fini 11er30 sa sesyon. Mersi.

MINISTER JUSTIN VALENTIN

Mersi Mr Chairman. Mr Chair, *IECD* i enn bann antite ki tonm anba Minister Ledikasyon. E anv i ki *IECD*, *IECD* i annan son prop *Act* i annan son *CEO* la o bor mon ki mon krwar mon pou donn li mikro pou li demann son Bidze e apre nou ava diskite. Mersi Mr Chair.

MR DEPUTY SPEAKER

Mersi Minis. Donk, nou ava envit Madanm Choppy.

CEO SHIRLEY CHOPPY

Mersi Minis. Bonzour Mr Chair, e bonzour tou bann Manm Onorab ozordi prezan. Zis briyevman en pti gin lo manda *IECD* e parey zot konnen, resaman *IECD* rekonnèt koman en sant kategori 2 anba lospis *UNESCO*.

E nou travay prezan i pa zis lo en nivo nasyonal. Nou osi tou prezan en sant enternasyonal, pou swen lasante devlopman e ledikasyon Pti Lanfans. E apard sa i annan son bann rol lokal domestik ki annan pou donn direksyon

stratezik, *leadership* dan bann *issues* ki annan pou fer avek devlopman pti anfans dan pei.

Advice Gouvernman lo bann Polisi e program ki nou devret adopte e enplimante dan bon devlopman nou bann pti zanfan. Nou osi regilater pou servis swen zanfan.

Parey Lasanble i okouran avek nou nouvo Lalwa ki Lasanble ti aprouve 2022, nou rol regilater in agrandi, pou nou osi tou vin regilater bann sant swen bann pti zanfan.

Parey nou dir an Angle *daycare* e, e parey nou konn li *daycare*. E osi tou nou, nou osi tou nou regilater pou *preschool* e li osi tou i *preschool* prive e osi tou bann lakres parey nou konnen. Apard sa nou osi tou nou fer resers devlop bann standar fer sir ki i *at par* avek bann norm enternasyonal.

E osi tou fer bokou bann aktivite *advocacy* e sansibilizasyon lo devlopman pti anfans. E osi finalman nou osi zer fon lasistans pou bann *childcare providers* ki'n anrezistre avek *IECD*. Lo kote nou Bidze *IECD* in ganny *allocate* avek en Bidze R41.4 milyon pou lannen 2024.

E sa i en - i *actually* i en - i redwir par R1.78 milyon konpare avek Bidze revize 2023. Selman si nou pou

konpar tou lede Bidze pou Bidze 2023 ek 2024, in annan en bes dan Bidze *IECD* pou 2024 par R432 mil 1780.

Bon lo kote saler Bidze ki nou pou gannyen pou 2024 i 6.2 milyon. E si nou get li anliny avek Bidze revize pou 2023 i 4.8 so i annan en varyan 1.4 milyon. *Goods and services* nou'n ganny nou 35 milyon. E i en an term si ou get li an term Bidze revize i en bes 1.2 milyon.

Bon, prezan si mon kapab al, al direk lo bann rezon aköz sa bes e osi sa logmantasyon. Pou *wages and salaries* i annan ogmante par 1.4 milyon e sa i annan pou fer avek nouvo *spending proposal* ki nou pe rekrit en *assistant registration officer* pou *Regulatory Affairs Division*. Prezan nou annan nou en divizyon olye en seksyon aköz nou mandan in *increase by 3-fold*.

Parey mon'n dir an term regulariz bann servis swen zanfan e osi tou *pre school*. E sa i ariv apepre 148 mil pou en lannen pou sa pos. Osi tou sa logmantasyon in vin avek en *virement* ki'n ganny fer R1.1 milyon dan *goods and services* en *capital project*.

E sa in vin apre *Mid-year Review* e sa pou peyman partision nouvo lofis *IECD*. E *IECD* in sorti dan batiman

Espace e prezan dan en nouvo batiman Ile Perseverance. I apel *Fairview House* e osi tou sa larzan in ede osi tou pou kouver *deposit* nouvo lokasyon e osi tou nouvo *rent*.

E nou'n annan osi en pti pe retar dan *recruitment* ki nou ti anvizaze fer 2023, aköz zisteman kot *Espace* nou napa ase lespas pou nou kapab fer sir ki nou annan nou *full staff*. E sa i osi reflekte dan Bidze revize 2023. E zis pou averti bann Manm ki sa bann pos i *fully funded*.

E nou pou kapab rekrit bann dimoun 2024 annefe nou pe prepare la pou nou kapab komans met bann *advert*. Koumsa *come January*, nou ava kapab pran zot.

Lo kote *goods and services*, dan tou - mon kapab dir dan preski tou sa bann *range* dan Bidze i annan en bes dan tou, eksepte zis *office expenses*. *Office expenses* in monte par R102 mil e sa i anliny avek vot *hospitality* ki'n monte par R75 mil.

E li i pou *cater* en pti gin pou bann *international dignitaries* e nou *governing Board* pou *international mandate*.

Ki parey zot konnen Prezidan in fek apwent mwan pase nouvo *Governing Board*

pou *IECD* ki pou get tou bann zafer ki annan pou fer avek *category 2 center* pou *UNESCO*. E osi tou i ava kouver en pti gin bann *official visit e meeting* ki zot pou vini.

Advert and donation in ogmante par R15 mil. E parey zot kekfwa deza okouran *IECD* i annan lobligasyon pou *publish* lalis tou bann *childcare providers* ki anrezistre. Nou abitye fer li pou bann *childminders* dan lakour prezan la nou pou fer li pou bann *daycare centers* osi.

Consumables i annan en *increase* R87 mil e li i pou al direkteman ver en konferans enternasyonal *as part of* bann nouvo manda *IECD*, ki pou fer an 2024 isi Sesel. *Printing and stationery* li in annan en bes R104 mil.

E parey zot konnen Gouvernman i annan en plan pou *digitalise* servis e tou bann keksoz ki annan pou fer avek sa. So nou pe planifye pou nou annan en plan pou redwir kantite *printing internally*.

E osi tou mazorite bann *printing* ki nou annan pou fer avek *category 2 center*, nou ti fer li la sa lannen anliny avek inogirasyon *IECD*. So nou deza annan en pe sa bann materyo ki nou kapab servi pou 2024.

Lo kote konsern transportasyon avek *travel cost* i annan en bes par R57 mil. E li i annan pou fer avek *overseas subsistence allowance* ki nou pe, nou pe planifye ki olye ki nou annan bann *physical board meeting* Sesel.

Ki nou bezwen pey tiket bann *Board members* pey zot akomodasyon pey zot *subsistence allowance*, nou pe mazine pou nou annan osi tou bann *physical - I mean sorry* bann *virtual meetings* ki ava ede redwir en pti pe kou lo la.

E lezot *other transportation cost* in li in ogmante par R33 mil e sa i zisteman pou nou fret bann bis pou anmenn bann *overseas delegates* ki pou vin konferans Sesel lannen prosen.

Akoz nou napa kapasite anndan pou nou kapab *host* sa bann delege e transport zot pou en sorti kot *venue* pou al kot zot akomodasyon. E nou pe antisipe kekfwa apepre en 200 ekek *overseas delegates* ki pou vini pou *attend* konferans lannen prosen.

Other use of goods and services in annan en bes par R735 mil e sa i annan parey mon'n dir o konmansman i annan pou fer avek *office building rent*. Akoz la nou'n, nou'n bouze nou'n al kot

Fairview e nou *rent* i en pti pe pli ba ki *Espace* e osi tou pou kouver *deposit* e *rent* 3 mwan pou sa nouvo lokasyon.

E osi tou *other service agreement* i annan en *increase* R140 mil e li i anliny avek bann aktivite ki'n ganny *plan*. E bann servis e bann diferan keksoz ki nou'n *plan* pou nou ofer sa konferans enternasyonal lannen prosen.

Kot i konsern *minor capital outlays*, i annan en bes apepre R543 mil. E osi tou en bes dan *acquisition of minivan, obviously* i pa pou kapab *appear* dan nou Bidze 2024, akoz nou ti ganny sa larzan 2023 pou nou aste en *mini van* pou transport nou bann *staff* pou al fer bann lenspeksyon, bann vizit.

Me selman nou pa pou war li dan Bidze, akoz i en *one-off payment* nou pa pou war li dan Bidze 2024 byensir. E osi tou en R20 mil pou nou aste *laptop*.

An realite nou pou ganny nou zis en *laptop*, akoz i en *laptop* i ser konmela en *laptop* pou en nouvo *staff* ki a pe vini. Mersi Mr Chair.

MR DEPUTY SPEAKER

Mersi Madanm Choppy. Zis an pasan mon ava zis *remind* bann Manm lekel bann zofisye ki'n zwenn nou. I annan Madanm

Choppy ki li menm li Sef Egzekitiv *IECD*, i akonpanyen par Manmzel Laurette Lebon ki *Human Resources and Budget Management Officer*, Manmzel Amina Sarah ki *Accountant*.

E Manmzel Tamatave avek Manmzel Madeleine sorti kot Minister Finans i ankor avek nou, osi Minis pou Ledikasyon. Nou a pas lo bann kestyon mon apel Onorab Labrosse.

HON RICHARD LABROSSE

Mersi Mr Speaker. Bonzour Minis. Bonzour Madanm Choppy ek ou delegasyon. Madanm Choppy ler mon'n asize mon'n ekout ou atantivman la, mon'n ekout ou tre byen ki i annan en pe, en pe *cut* dan, dan ou Bidze konpare avek lannen, lannen ki pe vini la.

Me mon war ou annan en ta lobzektif en ta stratezi, sirtou enn la ki'n apport mon latansyon. Se ki zot in, zot pe *gear up* pou zot annan plis *childminders* dan bann distrik.

So avek sa Bidze la ki ou pe ki nou pe al vote pou ou la, eski si ou ti kapab eksplike ki manner zot pou servi sa pti gin resours pou zot kapab fer sa?

E apre mon lot kestyon i koman en lorganizasyon ki mon war zot pe ganny byen rekonnèt

enternasyonal, eski apard Bidze Gouvernman eski zot ganny okenn lezot sipor enternasyonalman? Mersi Mr Speaker.

MR DEPUTY SPEAKER

Mersi Onorab. Mon ava envit *panel* pou donn en larepons.

CEO SHIRLEY CHOPPY

Mersi Onorab pou ou kestyon. Mersi Mr Chair. I enteresan ou kestyon akoz toultan nou ganny demande menm kalite kestyon. I vre sa pti gin resours ki nou gannyen, nou sey nou mye pou nou *stretch* sa Bidze limit ki nou kapab arive en.

Parey CS ti dir dan son lentervansyon dan Lasanble Nasyonal, i dir ou bezwen fer plis avek mwens. So nou sey nou mye pou nou kapab arive *attend* nou bann lobzektif. Kot i konsern bann *childminders* en bon kestyon ki ou'n demande Onorab.

E nou pe war poudir i annan ler nou ti fer nou Bidze pou 2024 ti apepre Zen lannen pase, apre Zen lannen pase. Nou ti komans fer li depi lannen pase, apre nou'n soumet sa lannen. Nou'n get en pti gin lo statistik avek *trend*. Zisteman bann dimoun ki pe vin devan pou vin *training* e pou anrezistre.

Ti en pti pe *slow*, me selman nou'n war Out, Septanm, Oktob nou'n *pick up*. E nou ti'n planifye pou nou fer en *training* sa lannen e nou ti fer apepre en 41enn zot. Be la i annan ankor 29 ki fek fini *training* ki zot pou ganny zot sertifika Sanmdi prosen.

E ou war sa kantite lenterere e sa kantite demann ki annan deor pou servis swen zanfan. So mon'n met sa *matter* devan latansyon Minister Finans, pou nou regarde ki mannyer nou kapab organize pou lannen prosen.

Akoz i vre ki nou *trend* in sanze *for the last 3 months*. E i pa'n antre dan nou Bidze pou 2024. So nou *hope* ki nou ava kapab ganny sa sipor. Lo kote nou manda enternasyonal wi nou pou bezwen resours adisyonnal.

Akoz pou, pou letan ki nou *Board* ti ganny - nou *Governing Board* ti ganny apwente *obviously IECD as* en lorganizasyon li menm nou pa pou kapab pran sa desizyon pou fer sa *work plan* lo nou tousel.

So nou ti pou bezwen gidans *Board governing Board* enternasyonal ki Prezidan ti apwente mwan pase. So nou'n diskite e nou'n *come up* avek en *work plan* pou 2024-25 e 26. E

nou'n *cost* sa bann aktivite e zisteman *the Board* i ava fer en demann avek Gouvernman pou plis resours.

E nou Prezidan osi tou dan son linogirasyon, i ti *pledge* son sipor total pou sa manda enternasyonal ki i pou bon i pou anmenn plis vizibilite pou pei, pou *leadership* pei e pou tou dimoun an zeneral. So nou *Board* i espekte annan en rankont avek Minister Finans, pou zot kapab diskite lo la.

E an vi ki nou prezan nou en sant enternasyonal, i pou fer li pli fasil pou nou kapab mobiliz fon enternasyonalman. So savedir bon nouvel ki petet kekfwa Gouvernman pa pou bezwen donn nou tou sa resours 100poursan pou li.

Me petet konm dir *Board*, *at least* 50poursan nou kapab mobiliz li enternasyonalman. E *already* nou deza annan kontak avek serten lorganizasyon, ki pare pou siport nou pou *fund* nou pou nou kapab enpliment nou rol. Mersi Mr Onorab.

MR DEPUTY SPEAKER

Mersi Madanm Choppy. Mon ava kriy aprezan Onorab Loizeau.

HON NORBERT LOIZEAU

Mersi Mr Speaker. Bonzour *panel*. Mr Speaker mon, mon

annan zis en pti kestyon mon anvi demann *panel* petet Madanm Choppy. Ki *training* formel ki annan pou *SENCOS - Seychelles Educational Needs Coordinator*.

E tan donneren ki bann, ki bann etidyan i bezwen zot sipor pou zot kapab eksperyans laprantisaz. Eski sa Bidze pe - mannyer mon kapab dir sa pe adres sa? Mersi.

MR DEPUTY SPEAKER

Mersi Onorab. *Panel* i annan en larepons? *Minister*.

MINISTER JUSTIN VALENTIN

Mersi Mr Speaker Mr Chairman. Mr Chairman i spesifikman anba Minister Ledikasyon anba Departman *Education Services*.

Donk i pa neseserman tonm anba -

MR DEPUTY SPEAKER

Bidze *IECD*.

MINISTER JUSTIN VALENTIN

Bidze *IECD*.

MR DEPUTY SPEAKER

So nou *move on* lo la. Mon ava kriy Onorab Lemiel.

HON SYLVANNE LEMIEL

Mersi Mr Chair. Bonzour Madanm Choppy avek ou lekip

ankor enn fwa Minis. Enn, permet mwan pou felisit *IECD* anba ou gouvènan Madanm Choppy, pou lakonplisman ki zot in fer, an sa ki konsèrn pou anmenn *IECD* pou *meet* sa kriter entènasyonèl ki zot in gannnen.

Letan mon pe regard tou zot priyorite stratejik ki zot annan pou zot fer, mon ti a kontan konnen lekel ou *main* priyorite dan tou sa ki ou annan? E osi konponan bidzeter ki ou'n gannnen, eski i pou sifi pou ou kapab *meet* demann, pou ou bann priyorite stratejik ki ou'n mete pou lannen ki pe vini?

E osi Mr Speaker, dan menm laliny, mon ti pou kontan konnen bann soutyen ki ordinèman *childminders* osi i gannnen. Petet mon konnen sa i bann travay kontinyèl ki zot fer.

Eski zot annan en konponan bidzeter osi ki zot in mete, pou zot kapab kontinyen soutenir bann *childminders* e menm bann petet la ki zot pe al ganny zot sètifika, pou zot pratik *or* ouver zot bann biznes; eski i annan soutyen atraver Bidze pou ou kapab soutenir zot pou zot kapab *run properly* zot *childminding business*?
Thank you.

MR DEPUTY SPEAKER

Mersi Onorab. *Panel.*

CEO SHIRLEY CHOPPY

Mersi Onorab. Kot i konsèrn nou bann priyorite stratejik, se egzaktèman sa 3 priyorite stratejik ki nou'n travay lo la. E nou'n fer li dan sa model *zero-based budgeting* kot nou'n *breakdown* nou bann priyorite *into* bann *major actions*.

E *further down to* bann *specific actions*. E nou'n *cost* zot tou. E in ed nou konmsi pou ariv lo sa Bidze ki nou'n demande. So enn nou priyorite stratejik, ki annan pou fer avek ogmant *compliance* avek bann *legal requirements* avek ek bann standar.

E sa i enkli 0 a 5 an. Avan nou ti pe fer li 0 a 3 an zis dan lakour. La prezan nou'n kouver li antye. Akoz nou pe get *non-compulsory education* akoz Minister Ledikasyon li i pran *compulsory education* depi P1 an montan.

So nou'n enkli serten konponan dan nou Bidze, *ok*, pou *daycare* e osi tou nou'n enkli serten konponan pou *preschool* osi tou. Selman byensir nou pe met lanfaz plis lo *daycare*, akoz la an se moman nou'n preski finaliz nouvo standar e i pe al *Cabinet* byento, pou nou kapab

enplimante lannen prosen ki a vin anliny avek nou Bidze.

Lo kote kordinasyon, pou fer sir ki bann program i ganny enplimante dan en fason efektiv, nou annan en pti logmantasyon konpare avek Bidze 2022.

Nou ti demann en logmantasyon dan program 3, kot i konsern *research, program coordination*, eksetera. E i annan provizyon pou nou kapab kontinyelman travay ek bann sekter pou fer sir bann ki pe ofer en servis swen lasante ledikasyon pti lanfans, zot kontinyen pe met bann resours en bann *training* en bann program an plas, pou bann pti zanfan benefisyè.

So nou annan en, en larzan ladan. Me selman sa larzan i pa direkteman pou servis me i pou bann aktivite kordinasyon *advisory advocacy*, eksetera.

Kot i konsern *childminders*, wi, parey Minister Hassan ti anonse dan son *Budget Address*, provizyon in ganny fer pou nou annan R27 milyon 610 mil dan Bidze. Dan sa Bidze 41 milyon preski dir ler ou pe gete i plis ki 50poursan nou Bidze ki al ver sa *cash transfer* sistenm.

Basically, sa *financial assistance* ki nou donn tou

paran ki met son zanfan pandan en servis anrezistre, in ganny li R750 par mwan. E tou bann *childminders* ki pe pran swen avek 4 zanfan 3 a 4 zanfan i ganny li 300, R3 mil 317 par mwan, ki pou ed li en pti pe avek bann resours, organiz en pti gin bann nitrisyon pou bann zanfan.

Pou fer sir ki i pe swiv en pti pe standar, ki pou ed li avek enplimantasyon standar. Apre nou annan R6 mil 633 pou bann *childminders* ki pe vey 6 zanfan 6 ziska 10 zanfan dan lakour. E sa i al pou peyman saler bann asistan, ki zot bezwen rekrite pou donn zot en koudmen pou travay pou *cater* pou sa 10 zanfan dan lakour.

E osi tou si mon kapab azoute i annan osi tou dan nou Bidze i annan 1.6 milyon ki al pou *trust fund* e li i en fon ki en nenport ki dimoun ki pe travay dan domenn Pti Lanfans i kapab fer en *request*. Zot ganny lasistans pou ganny en pti donasyon en *grant* - en *one-off grant* ou pa bezwen peye, ki kapab ed zot avek zot bann servis ek bann program ki zot pe enplimante.

I osi tou enkli bann sekter dan pti lanfans osi tou. Mersi Mr Chair.

MR DEPUTY SPEAKER

Mersi Madanm Choppy.
Onorab Bastienne.

HON DESHIELA BASTIENNE

Mersi Mr Chair. Bonzour Mr Chair. Bonzour Minis avek ou delegasyon. Bonzour Madanm Choppy. Mr Chair, vi ki Madanm Choppy ou'n dir ki i annan gran demann pou plis *childminding*.

Eski ou departman zot pe mazin lo ogmant *quota* lakantite zanfan pou bann *childminding*, kot sirtou i annan ki annan ase plas pou zot *cater* plis ki 10 zanfan? E sa Madanm Choppy, i a fer ki a kapab donn ankor en plas travay en zenn ki ozordi pe rod en travay, ki pare pou travay ek pti zanfan.

E apre osi mon ti a kontan al kot Minis osi, ou nou okouran ki dan vakans i annan *holiday camp*, me selman lo bann dernyen semenn sa bann *teachers* osi i bezwen repoze e la i fermen.

Ki zot pe mazin a lavenir an kolaborasyon avek bann *childminding*, pou zot donn sipor serten paran ki pe war li difisil lo sa bann dernyen semenn pou ganny en landrwa konvenab pou kit zot pti zanfan?

Akoz konmela nou konn byen i annan bann zafer *rape*

ou pa kapab kit zanfan ek nenport dimoun.

Ki zot ki plan zot annan pou zot soulaz sa bann paran lo sa kote, kot *childminding* i konsernen? Mersi.

MR DEPUTY SPEAKER

Mersi Onorab. Mon ava envit *panel* pou donn en larepons.

CEO SHIRLEY CHOPPY

Thank you Madanm Onorab. Lo kote *quota*, lo nou nouvo regilasyon ki pe al devan *Cabinet* nou'n fer en provizyon pou ogmant *quota* zisteman parey ou'n dir, pou ede osi tou *deal* avek sa sityasyon plis demann ki *supply*.

Ki nou, nou pe dir osi tou nou *moto A Winning Start For All*. So nou osi nou, nou ti a kontan ki tou zanfan i ganny sa menm sans depi o konmansman. So nou'n provizyon dan nou nouvo regilasyon nou'n *increase quota* par 2 zanfan sorti 10 pou vin 12.

Obviously adult child ratio osi tou sorti 1 pou 5 i pou vin 1 pou 6. E nou antisipe Onorab, pou nou enplimant li boner lannen prosen - sa nouvo. So parey ou'n dir mon krwar ou'n byen fer sorti sa, ki i pa pou otomatik pou tou dimoun. I pou bann ki annan lespas dan zot

lakour ki kapab *cater* pou en pe plis.

So pou nou donn zot sa loportinite pou zot kapab gannnen. Mersi Madanm Onorab.

MR DEPUTY SPEAKER

In demann lo pou ed bann dernyen semenn vakans. Minister pe reponn?

MINISTER JUSTIN VALENTIN

Mersi Mr Chair. Mr Chair, Minister Ledikasyon, nou osi i pa tro konfortab ek sa, ek sa lide kot bann *daycare* i frenmen sirtou pandan vakans. Nou pou bezwen - nou napa swa - nou pou bezwen komans koz avek sa bann *daycare centers* petet rod lezot alternativ.

Akoz bokou - ou konnen bokou paran i kontinyen annan - annefe zanfan pa lekòl. Zanfan pa pe lekòl zot bann paran pa neseserman pe pran konze pandan sa bann letan. Donk i vin en gran lenkonvenyans e nou ganny sa rapor preski tou le vakans.

Donk, i enportan pou nou antre dan en gran konversasyon pou kapab rezourd sa problem. E la prezan nou, nou ava gete ki manner ki, ki bann alternativ,

nou ava vin avek pou ou kapab ede al met dan sa sityasyon.

E Madanm Choppy i anvi azout serten keksoz lo sa laliny. Mersi.

CEO SHIRLEY CHOPPY

Wi, mersi *Minister*. Zis pou reasir bann Manm, nou'n - i enn bann defi ki nou gannnen dan sa bann sekter zisteman en pe letan, ki annan sa bann *issues* vakans. E aktyelman nou'n fer, nou'n met en provizyon dan nou Lalwa, pou nou devlop en kad referans pou loperasyon bann *childcare centers*.

So parey Minis in dir nou'n pou *entame* en diskisyon avek zot tou. Nou pou ganny zot *input*, akoz nou, nou santi ki sa servis i en servis esansyel, sirtou 0 a 3 an e ki bezwen ouver lannen antye.

So bann *childcare providers*, nou pou diskite avek zot pou nou rod bann solisyon, pou gete ki kapab ganny fer letan zot *staff* pou pran konze, pou lezot vin ranplase pou sa servis kontinyelman reste ouver.

Akoz ler ou pe gete, i annan en *mismatch* ant kantite vakans, zour vakans ki manrmay i gannnen, e kantite konze ki en paran pou gannnen parey nou tou nou konnen.

So in en problem ki en pe letan in la so nou, nou determinen pou nou rezourd sa problem lannen prosen, e fer sir ki tou parti prenan i benefisye ladan. Mersi.

MR DEPUTY SPEAKER

Mersi Madanm Choppy. Malerezman ler pa dan mon faver, pa ni dan faver Lasanble Nasyonal. In le moman pou nou pran en vot lo alokasyon lo *Institute of Early Childhood Development*.

Lo paz 324 a 332 pou en sonm R41 milyon 432 mil. Mon a demann tou bann Manm ki an faver pou endike silvouple? Mersi. Okenn Manm ki kont? Mersi Madanm Deputy Clerk.

Vot pou *Institute of Early Childhood Development* pou en sonm R41 milyon 432 mil, i annan 26 Manm ki'n vot an faver, okenn Manm pa'n vot kont e okenn Manm pa'n *abstain*. Donk sa vot in pase, mersi.

I osi la bomaten nou bezwen pran en vot lo *Seychelles Qualification Authority*.

E li i lo paz 318 a 323 e li son alokasyon i R8 milyon 176 mil. Mon ava demann tou bann Manm ki an faver pou endike silvouple? Okenn Manm ki kont? Eski ou'n konpran vot

mon osi mon'n konfize par lafason ki Lasanble in vote.

Tou Manm ki endike ki an faver sa vot silvouple endike? Okenn Manm ki kont, okenn Manm ki kont sa vot. Donk...

(comments off-mic)

MR DEPUTY SPEAKER

Eskiz mwan silvouple. Avan Lasanble ti zwenn ozordi, depi semenn pase i annan en dokiman ki'n sirkile, ki'n endik avek tou Manm konbyen minit nou pe gannyen par *headings*. *Now*, mon pledwari pou bann *Caucus strategize better* pou zot konnen poudir zot annan 30 minit lekel ki pou demann kestyon.

Mwan, mon pe zis *manage* letan mon se tou ki mon pe fer. Ler mon'n ariv mon ler mon pou koupe. Ozordi lo en alokasyon 30 minit, 11 Manm in lev lanmen pou demann kestyon. Sertennman zot konnen zot dan lapratik poudir sa pa realistik.

So, mon pou pran ou non, selman apre mon pou zis koup mon lalis aköz mon ler in arive. I osi senp ki sa.

Nou ava ganny vot lo la Madanm Deputy. Donk, vot pou *Seychelles Qualification Authority* pou en sonm R8 milyon 176 mil, i annan 25 Manm ki'n vot an faver, napa

Manm ki'n vot kont, i annan 1 Manm in *abstain*. Sa vot in pase, mersi.

Aprezan nou pou eskiz delegasyon *IECD* avek nou. Nou a dir zot mersi pou zwenn nou ti annan Madanm Choppy ki *CEO IECD*, i annan osi Manmzel Lebon ki *Human Resource and Budget Management Officer*.

Avek Manmzel Sarah ki *Accountant*. Mersi pou vini e nou ava demann *Parliamentary Reporter* pou apel delegasyon *Minister Finans plito Minister Lapes ki enkli Departman Lekonomi Ble. Minister osi mersi pou zwenn nou, bon zournen.

(Minister for Education and his delegation were excused from the House)

HON SEBASTIEN PILLAY

Mr Speaker, mon annan en *matter of privilege*.

MR DEPUTY SPEAKER

Onorab, mon'n tann ou. Mon pe esper en delegasyon sorti pou nou *proceed*.

HON SEBASTIEN PILLAY

Wi, be ou be donn nou - donn nou loportinite nou ava

eksplike kwa ki nou problemn ki pe nou rankontre la.

MR DEPUTY SPEAKER

Please proceed.

HON SEBASTIEN PILLAY

Mon, mon pa konnen ki, ki, ki manner ou deside lo ou menm pou ou sanz sa ki'n ganny agree dan *ABC* par tou bann *Caucus*. Ou le fer nou vot lo en Bidze, nou pa ni konnen ki sonm, ni en leksplikasyon nou pa'n gannyen.

Ti agree dan *ABC* ki Finans ouswa Minis, pou donn en leksplikasyon lo sa Bidze ki ganny prezante devan nou. Ki manner ou prezan ou pe sanz sa? Ou pa ni menm dir konbyen nou pe vote, ki Bidze nou pe vote? Selman ou a dir nou pran dokiman gete.

MR DEPUTY SPEAKER

Mersi pou ou lobzervasyon.

HON SEBASTIEN PILLAY

Be kisisa? Konmsi ki ou-ou-

MR DEPUTY SPEAKER

Bon nou ava apel delegasyon...

HON SEBASTIEN PILLAY

...ki ou problemn ki nou pa kapab demann kestyon lo sa Bidze.

MR DEPUTY SPEAKER

...pou antre silvouple.

HON SEBASTIEN PILLAY

Fer lapenn sa.

MR DEPUTY SPEAKER

Delegasyon *Minister Finans
Minister Lapes, akoz sa.

**MINISTRY OF FISHERIES
(DEPARTMENT OF
FISHERIES & DEPARTMENT
OF BLUE ECONOMY****MR DEPUTY SPEAKER**

Donk nou ava *welcome* delegasyon Minister Lapes avek nou. Zis pou lenformasyon Lasanble, mon asire a 2 repriz mon'n dir sonm ki SQA pe gannnen anba sa Bidze. Donk sa i lo verbatim Lasanble.

Mon pa'n fer zot vot lo sif ki zot pa konnen ki zot pe vot lo la. Aprezan nou ava *welcome* delegasyon *Ministry of Fisheries* ki enkli *Department of Fisheries and Department of Blue Economy*. I dirize par *Designated Minister* Mr Jean-Francois Ferrari ki *Minister for Fisheries and the Blue Economy*.

I akonpanyen par Mr Roy Clarisse ki *Principal Secretary for Fisheries*. Madanm Phillianne Ernesta ki *Principal Secretary for Blue Economy*. Mr

Joshua Adeline li i *Accountant* e le 2 zofisye Minister Finans Manmzel Tamatave avek Manmzel Madeleine i ankor avek nou.

Nou pou envit Minis fer son lentrodiksyon osi bref ki posib e apre nou pran bann kestyon *from the Floor. Minister?*

**DESIGNATED MINISTER
JEAN-FRANCOIS FERRARI**

Mersi Mr Chairman. Bonzour tou bann Manm Onorab dan Lasanble Nasyonal e tou piblik ki a lekout. Mr Chairman mon, mon'n vin dan Lasanble ozordi pou mon prezant Bidze Departman Lekonomi Ble ek Lapes.

Mon ti a kontan en remark o konmansman ki Minister Lekonomi Ble ek Lapes i 2 Minister ki fer Polisi. E nou *executive arm of* sa Minister se *SFA*. E donk *SFA* pou ganny son Bidze pou ganny diskite ler *PEMC* i vin dan Lasanble.

E ki ozordi nou pe pran kestyon e nou pe pran nou pe pran leksplikasyon lo Departman Lekonomi Ble ek Departman Lapes.

Manda Lekonomi Ble Mr Chairman, se pou donn direksyon stratezik pou tou bann aktivite ekonomik e sosyal ki deroule otour nou lanmer.

Nou ganny gide par en direksyon soutenabilite dan nou lankourazman e sipor ki nou donnen atraver tou bann akter e tou bann investiser lokal koman etranze ki vin dan sa lendistri.

Departman Lekonomi Ble, i zwe en rol tre enportan pou promot zimaz Sesel koman en pei ki respekte protez lanvironnman. Pandan sa bann dernyen lannen, nou'n fer plizyer sikse e sirtou nou'n devlop nou relasyon avek bann lenstitisyon finansyel enternasyonal, ki pe ed nou e finans bokou proze dan proteksyon lanmer, dan *management* losean.

Nou'n promot i en departman ki promot resers e dan plizyer landrwa tel ki lo dan *zone* Aldabra tel ki bann *joint management areas* dan Losean *Salha de Mala*.

E bokou travay osi dan Departman Lekonomi Ble i annan pou fer avek ledikasyon. E lenformasyon nou piblik e nou bann zenn sirtou dan bann lekol. Kot nou'n fer bokou proze avek bann lekol, pou met zot lo menm paz ki Gouvernman, dan proteksyon losean e devlopman losean.

Nou'n konplet *framework* sa lannen pou *marine spatial planning*, ki en program tre,

tre enportan ki'n pran nou en kantite letan. E nou'n, nou'n *involve* dan bokou domenn tel ki *marine bio tech* dan bann *circular economy*, pou nou promot en nouvo fason war losean.

Nou ankor war bann *challenge* byensir e sa i sirtou pou nou kontinyen eksplike e fer dimoun aksepte sa konsep lekonomi ble. E ganny sipor tou bann kominote ki viv o bor lanmer e ki viv lo bann resours lanmer, ganny bann sipor pou nou fer bon *management* sa bann resours.

E enn nou bann difikilte ki mon ti a kontan met devan Lasanble, se ki nou annan bokou - nou annan en pe - *well* en pe bokou bann *data gaps*, akoz nou napa bokou bann resers ki'n ganny fer lo plizyer bann resours. E menm lo nou bann ziridiksyon.

Alors nou, nou annan en bon pe travay pou nou fer. Bann priyorite taler nou ava pas en pti kou lo la. Mon ti a kontan prezan zis an bref dir ki, manda Minister Departman Lapes i enn ki sirtou pou kree en lanvironnman - en lanvironnman Polisi e legal pou devlopman dan sa sekter.

I annan plizyer keksoz ki pe arive e nou bezwen en lankadreman e sa se bann

keksoz ki pran bokou nou travay dan Minister Lapes, dan Departman Lapes.

Nou pe promot osi lapes soutenab. Nou pe ankouraz lenvestisman lokal e etranze. Nou pe asire atraver bann lakor lapes ki Sesel i ganny sa ki i merite; bann reveni ki i merite. Nou'n devlop bann aktivite ekonomik pli larz otour sa sekte.

Donk, mon ti a kontan dir ki bann *achievements* e pli gran *achievement* mon krwar, e la mon bezwen remersye tou mon *staff* dan Departman *Fisheries* e avek kolaborasyon *SFA* se nouvo *fisheries* dan *Aquaculture Bill* ki'n fek ganny publiye.

E ki en gro *Bill* ki nou'n anba en kantite presyon pou nou fini finaliz li, akoz i form parti en, en lakor avek Labank Mondyal. E avek plezir ki lannen prosenn nou ava diskit sa *Bill* avek zot. E nou vreman *welcome* zot bann komanter e zot sipor lo la.

E lannen prosen osi Departman Lapes, i pran ansarz Lekol Maritim. Sa se en keksoz ki nou'n demande. Pou nou kapab fer en pli bon travay en pe pli-en pe pli byen sible lo formasyon bann zenn dan sa lendistri. Deza sa lannen nou'n komanse e nou'n fer bann

formasyon ki'n kout nou en bon pe larzan.

E nou'n ganny en - nou'n ganny nou en bon pe etidyan 18 ki'n kalifye anba sa bann *courses*. Donk, i annan bann *challenges*; i annan bann, i annan bokou gran loportinite. I annan bokou lapes ki nou bezwen *manage* ki tonm anba presyon. Zot konnen ton zonn, banbara, i anba presyon.

Oumar e zourit pe komans vini zot osi. So nou pou annan en kantite travay pou nou kapab *manage* sa. E donk nou bann priyorite pou bann lannen ki pe vini, se pou fer sir ki tou rounpi ki zot donn nou, i ganny byen *manage*.

E mon mon konnen ki zot pou annan finalman en bon pe kestasyon lo bann fasilite ki nou'n fer pou bann Peser, me mon ti a kontan dir zot ankor ki sa i tonm anba *SFA*. E ki mon pa pou kapab al dan sa direksyon, akoz la ozordi bann sif- bann sif ki annan se pou Departman Lapes e Ble, e Lekonomi Ble.

Donk, avek ou permisyon Mr Speaker, mon pa konnen lekel ki ou ti a kontan komans avek si Lekonomi Ble, oubyen Lapes, be nou'n pare pou nou reponn repons bann Manm. Mersi.

MR DEPUTY SPEAKER

Mersi Minister. Donk, zis pou lenformasyon bann Manm e piblik i annan 2 Departman la ki nou pe *deal* avek e mon war poudir *panel* tou lede dimoun i la. Departman Lapes i lo paz 84 ziska 88 pou en sonm R19 milyon 862 mil.

Apré nou annan Departman *Blue Economy* ki lo paz 89 a 94 pou en sonm 36 milyon 183 mil. Selman apré nou pou pran 1 vote koman *Ministry of Fisheries*. I korek sa *Comptroller General*?

Donk, nou kestyon i *ok* i ouver pou tou *be mindful* 12.30 i mon lentansyon rann *SBC* son lanternn pou li fer son nouvel, ou son lanons ek mesaz. Nou ava komans avek Onorab Cosgrow.

HON WALLACE COSGROW

Mersi Mr Chairman. Bonzour Minis avek ou delegasyon. Bonzour ankor enn fwa tou Manm piblik ki pe ekoute. E bonzour spesyal pou tou bann *stevedores* lo tou bann por komersyal Mahe, ki pe ekout nou bomaten.

Minis, mon kestyon ki mon pou demann ou i an se ki konsern Sekter Lapes, mon pe get dan sa Bidze ki zot in gannyen. I enn ki apepre 19 milyon plis ki R20 milyon ase konsiderab konpare avek

lannen oparavan. So, Minis, mon pe get ladan mon pa pe war okenn alokasyon pou bann komitman ki ti ganny fer avek bann *stevedores* an se ki konsern bann larzan ki reste dwa zot.

So eski Minis i kapab dir nou si i Polisi Gouvernman 2024 pou sort out serten larzan ki zot dwa *stevedores* or ki zot ti pe dir *stevedores* pou ganny peye? Sirtou en misyon ki Minis ou, ou'n pran sa depi menm ou ti dan Lopozisyon. Mersi.

MR DEPUTY SPEAKER

Mersi Onorab. *Panel* i annan en larepons pou sa kestyon.

DESIGNATED MINISTER JEAN-FRANCOIS FERRARI

Yes mersi. E tre briyevman Mr Chairman. Mon ti a kontan fer en presizyon avek sa ki Onorab Cosgrow in dir. En larzan pou pey sa bann det ki zot, zot in fer ki ou...

(APPLAUSE)

DESIGNATED MINISTER JEAN-FRANCOIS FERRARI

... ki non, non. Mon krwar i enportan sa! I enportan pou piblik konnen ki nou, nou pe sey-

I enportan pou piblik konnen ki nou, nou pe aranz sa, sa kot zot in deranze. An sa ki, an sa ki konsern sa bann peyman, tou bann peyman ki'n ganny rekomande - tou bann peyman ki'n ganny rekomande par *SFA* baze lo bann *seaman's book* e lo bann rikord lapas, tou sa bann peyman in ganny fer.

I annan enn de, i annan enn de *stevedores* ki ti a ki pe konteste e i ti'n ki'n santi poudir zot pa'n ganny pran an konsiderasyon. Mon konsey pou zot i toultan menm keksoz; anmenn zot bann dokiman, rod zot bann dokiman anmenn kot *SFA*.

Mwan, mon ganny gide par sa ki *SFA* i dir mwan. Mon pa kapab pratik en sistenm kot, kot mon ki deside parey lontan Minis ki deside, oubyen ki Prezidan i deside, lekel ki pou gannyen oubyen pa pou gannyen.

Donk, i annan en sistenm vreman byen kler. E pa trakase nou'n fer en zoli travay dan netway sa, sa bann move keksoz sa bann ki zot in fer. Mersi bokou.

MR DEPUTY SPEAKER

Mersi *Minister*. Onorab Mondon.

HON TERENCE MONDON

Mersi Mr Chair. Minis, mon - sa lannen nou'n perdi larzan dan Bidze, akoz ou'n ganny *delay* pou *recruitment* tou lede Departman. E ki difikilte ki zot pe fer fas avek pou zot *recruit* ki pozisyon pou lannen prosen lo sa size? Mersi Mr Chair.

MR DEPUTY SPEAKER

Mersi Onorab Mondon. *Panel*, mon ava ganny zot larepons.

PS ROY CLARISSE

Bonzour Mr Chair. Bonzour bann Onorab. Lo kot i konsern Departman Lapas, difikilte ki nou'n gannyen pou *recruitment* sa lannen, se ki nou saler ki nou ti pe ofer bann dimoun, pa ti konpetitiv lo marse deor.

Sirtou nou ti pe *recruit* bann dimoun parey bann *economist* e parey ou konnen i annan bokou konpetisyon *economist*. So menm si nou ti'n fer 2 avertisman, nou ti pe ganny en pe difikilte pou *recruit*.

E erezman tou dernyerman nou'n nobou *re advertise* e nou'n ganny dimoun pou nou kapab *recruit*. E kote lapas *basically* nou pe *hope by* i 2024 nou kapab *run at full capacity*, ranpli sa bann dernyen pos ki reste pou nou *recruit*. Mersi.

MR DEPUTY SPEAKER

I annan en lot?

PS PHILLIANNE ERNESTA

Bonzour Mr Chair. Bonzour tou bann Onorab dan Lasanble e bann dimoun ki a lekout. Nou osi parey PS Clarisse in fer resorti, i plis en pe parey ki i annan serten pos parey *Economist* parey legal ki nou ganny en pe difikilte pou *recruit*. Akoz nou bann saler sirtou i pa konpetitiv parey serten saler ki dan lezot Departman oubyen bann lezot parey dan prive. Mersi.

MR DEPUTY SPEAKER

Mersi panel pou ou larepons. Mon ava kriy aprezan Onorab Vidot.

HON AUDREY VIDOT

Mersi Mr Chairman. Minis, mon konpran poudir i annan doker ki'n ganny dokiman, me malerezman zot dir ou pe kasyet zot. Mon kestyon ki mon annan pou ou Minis, lo kote Polisi kote kot bann peser, i annan serten konsern.

Mon konnen i pa pou i pa pou al direk kot SFA la mwan, en, akoz zot pou depan lo Minister. Peser zot annan en konsern ki rarman sa bann dimoun pou zot pa al lapes, fodre vreman lasante pa permet zot. Me zot annan konsern ki

letan zot, zot ganny *sick leave* sa *rate* ki zot pe resevwar lasistans avek sekirite sosyal i vreman ba.

E i espesyalman si i bon pe zour konze ki zot pa pe kapab al lapes menm. Zot bezwen sipor finansyel. E nou pe regarde lo kote Polisi Gouvernman, lo kote Departman Lapes, eski i annan en travay ki zot kapab fer avek Minister Lanplwa war ki mannyer osi pou revwar sa *rate* ki sa bann peser i ganny kalkile lo la, pou zot resevwar serten benefis ler zot war zot pa pe kapab al lapes? Mersi.

MR DEPUTY SPEAKER

Mersi Onorab. *Minister* ou annan en larepons.

**DESIGNATED MINISTER
JEAN-FRANCOIS FERRARI**

Yes Mr Speaker. Mr Speaker, mon pa'n tro ganny en konpran Onorab in dir mwan dimoun i dir mon kasyet? Be Onorab, mon pa kasyet personn. Mon pa konnen kekfwa ou'n tro frekant tro bokou dimoun ki kasyet, prezan ou war kasyet partou.

(laughter)

**DESIGNATED MINISTER
JEAN-FRANCOIS FERRARI**

Mwan, mon war dimoun piblik toulezour! Toulezour Maison Colette apartir 7er mwen kar dan bomaten. Tou..le..zour, *ok?* E nenport *stevedores* ti kapab vini i kapab vin war mwan.

Alors pa bezwen, pa bezwen les bann dimoun dir ou bann keksoz ki pa vre. An sa ki konsern bann reminerasyon bann lasistans ki bann peser i gannyen, i vre ki akoz zot stati i pa-i pa kler.

I en - i zot bann dimoun *casual*, zot souvan pa pe ganny sa lasistans ki lo menm nivo ki lezot dimoun i gannyen. E sa i en konsern ki nou annan.

E nou anvi nou pe rod fason pou nou kapab fer zot vin pli permanan dan zot louvraz, pou ki zot konnen - bann Manm Onorab, i konnen poudir enn bann keksoz ki mon'n toultan apiye pou fer, se pou nou lev *status* bann peser, e fer zot vin dan en kategori ki parey osi bon ki tou lezot travayer.

Sa i en travay a lonterm Mr Speaker, me selman i en priyorite pou Gouvernman e nou ava kontinyen travay lo la. Mersi.

MR DEPUTY SPEAKER

Mersi *Minister*. Prosen enterven an lo mon lalis i Onorab Georges.

HON BERNARD GEORGES

Mersi Mr Chair. Bonzour Minis ek ou delegasyon. Minis, ou konnen ki kekyon mon pe al demande se kekyon ki mon demande tou le-z-an. Mon ti a kontan premyerman felisit ou avek ou lekip pou bon travay ki zot, ki zot pe fer dan sa, dan sa Minister.

(APPLAUSE)

HON BERNARD GEORGES

E demann ou vin en pe pli souvan devan Lasanble. Nou pa war ou ase souvan- nou pa war ou ase souvan isi. Mon kekyon i annan pou fer avek bann *FAD* bann, bann rado ki drive. Mon war ki dan sa detrwa dernyen lannen, ou'n *deploy* - ou Minister in *deploy* bato pou al anmas bann, bann *FAD Salha de Mala*. Pou al anmas zot kot zot in tonbe oubyen kot zot ankor pe drive.

Mon kekyon se dan sa lannen ki pe vini - dan sa Bidze ki pe vini ki resours ou'n met a dispozisyon. E ki, e ki ou Minister i annan lentansyon fer pou kontinyen -kontinyelman redwir sa, sa menas ziska ler i ganny eliminen konpletman? Mersi.

MR DEPUTY SPEAKER

Mersi Onorab Georges. Mon ava envit *panel* pou pran kestyon silvouple.

DESIGNATED MINISTER
JEAN-FRANCOIS FERRARI

Mersi Mr Chairman. Mersi Onorab. Onorab apard sa program ki *ongoing* ki nou pe fer an kolaborasyon avek *SFA FAD recuperation* ki fer trwazyenm legzersis ki'n ganny fer.

Semenn pase, i annan bann, bann zenn e bann plizyer, plizyer sorti dan bann diferan *areas* ki pe partisip ladan. Apard sa i annan 2 program ki mon kapab dir ou ki nou pe siport afon.

Enn de *biodegradable FADs*. E dan por mon kapab dir zot konmela dan por, i annan materyo ki'n arive ki preski 100poursan *biodegradable* pou nou kapab komans fer bann *FADs* ki pou, ki pou degrade e ki pa pou poz en polisyon parey bann *FAD* ki ganny fer avek bann lankadremman feray, bann lakord nilon, bann keksoz koumsa. So, sa i premye, premye keksoz.

Dezyenm keksoz se, atraver kolaborasyon ki lekonomi ble in annan avek en lorganizasyon *L'Espagne* ki apel *AltaSea*, nou pe promot en *FAD-Watch program*, ki li i pou donn

nou pozisyon tou bann rado ki pe drive dan nou delo, pou nou kapab entersepte sa bann rado avan ki zot tonm lo en resif, oubyen lo en lans.

Donk, nou konnen e mon pa pou ni Onorab *FAD* i en problem. I form parti lapes lasenn e i en problem. E tou bon keksoz dan lavi par ler i vin avek en kote negativ.

Nou pran byen not ou konsern ki ou annan tou le lannen. E nou anvi - nou anvi dir ou, ki nou pou fer tou bann keksoz e pou nou redwir sa bann lenpak.

E enn lot keksoz ankor se ki, otan ki nou kapab, nou pou redwir lakantite *FAD*; nou pe aksepte pou nou redwir lakantite *FAD* dan bann negosyasyon ki nou annan. Nou anvi ki sa bann *FAD* pa ganny asanble lo bato, me ater, kot bann peser kot bann *stevedore* bann dimoun ki travay dan lasenn i ganny louvraz. E zot kapab benefisye.

Donk, sa se bann program ki nou, ki an plas. E ki zot kapab kont lo mwan pou nou fer sir ki nou, nou, nou kapab ganny en bon rezilta lo la. Mersi.

MR DEPUTY SPEAKER

Mersi *Minister*. Onorab Larue?

HON FLORY LARUE

Bonzour Mr Chair. Bonzour Minis avek ou delegasyon. Mon ti a kontan demann Minis, lefe ki sa 2 Departman Lekonomi Ble avek *Fisheries* i *focus* lo sa Sekter Lapes e promot sa ki nou annan dan nou losean.

Mon ti a kontan demann Minis ki ou rol ki ou pe zwe pou kapab ranforsi zot bann program zot pe met devan? Tel ki *value added* dan *fish processing* e *sustainable development* lo kote *blue economy*?

Ki konversasyon ki ou pe fer avek Minister Later, pou kapab *allocate* plis later, ki nou kapab fer sa bann keksoz pa vin zis Polisi, me devlop li dan realite.?

Akoz dimoun la ater ki enterese pou fer sa kalite devlopman i trouv zot *stuck*, akoz napa later pou zot *proceed*. Mersi.

MR DEPUTY SPEAKER

Mersi Onorab. *Minister*?

**DESIGNATED MINISTER
JEAN-FRANCOIS FERRARI**

Tre briyevman Mr Speaker. Nou tou dan sa Lasanble; nou tou ki *involve* dan bann, dan bann travay avek piblik nou konnen ki *availability* later i

enn bann pli gro defi ki nou annan dan nou pei.

E pou devlopman lapes i osi en defi. E nou'n annan serten *zone* ki'n ganny, ki'n ganny delimite pou kapab fer devlopman dan *value addition* e *fish processing*. I annan ki pe bouze. Lenfrastruktir i en pe - i pa pe, i pa pe avans parey mon ti a kontan war.

Me selman i annan osi bann proze, bann dimoun ki'n ganny later ki pa pe servi sa bann later. E la mon pran sa lokazyon pou mwan dir ki nou pa pou kapab aksepte, ki later i ganny, i ganny met zis la ater, san okenn devlopman lo la.

Kot i annan bann mezir pou nou rebran sa bann later, nou pou fer li. Akoz i esansyel ki sa pti later ki nou annan, i kapab soutenir nou lendistri. Tou dernyenman nou'n kapab fer en pe alokasyon pou en sou sekter, en sou sekter dan lapes ki bann, ki reparasyon naval.

Lo *zone 20 extension* Providence, nou'n kapab *allocate* avek serten devloper. Serten Seselwa. Bann pti bout later, me selman *still* i en komansman. Alors mersi Onorab nou ava fer tou sa ki nou kapab. Nou konnen ki dir lezot sekter, lakaz i bezwen later, lagrikiltir i bezwen later.

Alors nou bezwen gete ki mannyer nou kapab tonm lo en bon balans lo ki mannyer sa bann later i ganny *allocated*. Mersi.

MR DEPUTY SPEAKER

Mersi *Minister*. Mon ava aprezan kriy Onorab Herminie.

HON WILBERT HERMINIE

Mersi Mr Chair. Bonn apre midi Minis avek *panel*. Minis, ou ti ganny elekte pou fer pli byen e ou ti kontan dir ou menm, zet sa travay lo ou. So, pa bezwen ankoler ler bann *stevedore* pe demande pou war ou.

An pasan osi bann maren peser dan sa Bidze, mon pa war kote zot bann konpansasyon ki zot pa ti ankoler ganny fini ganny peye i antre? Epi anba *other goods and services*, mon war lo kote *security* epi *facilities*, ti annan 2 gro - ti napa larzan pou lannen avan la nou war 2 gro sonm i aparet.

Si ou kapab donn nou en pe detay lo sa 2 sonm? Akoz parey ou abitye dir ou pa tro kontan ler ou war bann *chiffres* zis i aparet ler i pa ti la lannen avan. Mersi Mr Speaker.

MR DEPUTY SPEAKER

Mersi Onorab. *Minister*?

DESIGNATED MINISTER
JEAN-FRANCOIS FERRARI

Premye bout; Onorab mon repet ankoler, mon pa konnen si ou pa'n tande oubyen si ou pa oule tande - mon war dimoun. *Ok?* Mon pa ankoler. Mwan, mon'n vin la pou nou koz laverite.

Pa bezwen dir mwan poudir mon en manter, oubyen mon sa - mon pe koz sa ki le fe, *ok?* Alors si ou pa kontan mon repons, si ou pa kontan mon repons, *just too bad!* E i mon repons.

E mwan, mon dir bann dimoun i konnen kote zot pou war mwan. Mersi bokou. An sa ki konsern bann ou, ou dezyenm bout keston, *PS Clarisse* i ava reponn lo sekirite, eksetera.

PS ROY CLARISSE

Mersi Onorab. Annefe sa laliny lo sekirite *and enforcement*, i ti la dan Bidze 2023 li. Me i zis ki Minis pa'n servi li. So letan zot in fer *Revised Budget* in ganny tire.

E la in remete menm sonm - i pa ni - i pa an plis, i egzaktaman menm sonm ki ti dan Bidze 2023. Mersi Onorab.

MR DEPUTY SPEAKER

Mersi *PS*. Nou *move on*,

HON WILBERT HERMINIE

(Off-Mic)

MR DEPUTY SPEAKER

... *facilities* ou ti pe dir pa *security*? Ok, Mr Clarisse i annan en repons.

PS ROY CLARISSE

Eskize Onorab pou mank sa enn. Sa enn *facilities for event*, i pou *Expo 2025* ki pou fer Zapon. E dan Departman Lapes, nou pou angaze dan sa *Expo* nou osi tou. Akoz nou anvii ki nou bann sekter prive dan lapes, zot osi zot kapab partisipe.

Pou zot ganny en deboursman - en lot deboursman pou zot kapab eksport zot pwason. So, sa sonm i pou nou komans fer bann reprezantasyon bann *meeting* ki pou annan.

Pou fer pandan sa *Expo* diran lannen pou nou kapab partisip ladan an 2025. Mersi Onorab.

MR DEPUTY SPEAKER

Mersi Mr Clarisse. Onorab Woodcock.

HON WAVEL WOODCOCK

Mersi Mr Chair. Bonzour Minis ek ou delegasyon. *Minister*, mon pa pou zanmen bliy premye zour ki ou ti fer ou vizit apre ki ou ti vin Minis

responsab pou *Fisheries* Praslin. Annefe ou ti fer detrwa langzman avek bann kominote Peser Lasosyasyon Biznes bann MNAs ek DAs ki ti prezan sa letan DA Barbe.

Ou ti dir ou ti annan langzman, ki ou pou met an plas plizyer proze lo Praslin, Grand Anse avek Baie Ste Anne. Grand Anse ti pou annan *ice plant*, *gear store* e renovasyon lo bazar.

Minis tou sa bann proze ou'n *deliver* lo la dan mwens ki 3 an.

(APPLAUSE)

HON WAVEL WOODCOCK

Mon kestyon Minis i baze lo *blue bonds SWIOFish*. Annefe i lo sa diferan *blue bond* ki annan dan Bidze. Si ou pou get anba Departman of *Blue Economy* i annan *blue bond SWIOFish*, *blue bond SeyCCAT* e *blue bond DBS*.

Pou sa, pou lannen 2024 i annan 37.8 milyon pou *SWIOFish*, 7 milyon pou *SeyCCAT* e 28 milyon pou *DBS* e pou lannen prosen mon war zis 9 milyon pou *SWIOFish*. Ou konnen i annan en pe konfizyon deor lo egzaktman sa bann *blue bond* i finans kwa?

Petet Minis si ou kapab donn en pe detay, lo ki bann proze? Konbyen proze? E ki kalite proze ki sa bann *bond* in finanse? E pou lannen prosenn sa 9 milyon ki proze ki pou finanse pou lannen 2024?

E zis an pasan Minis, i sertennman - i sertennman remarkab poudir, ou koman Minis ou'n *deliver* bokou plis ki *ex* Minis Cosgrow ki ti Minis pou Lagrikiltir avek Lapes dan lepase! Mersi bokou.

(APPLAUSE)

MR DEPUTY SPEAKER

Nou ava *omit* sa dernyen bout *Minister*. Nou evite *refer to any name of persons*, dan nou kestyon *as per Standing Orders 36(1)(a) - 36(1)(b)* plito. *Panel? Yes Blue Economy proceed.*

PS PHILLIANNE ERNESTA

Mersi Onorab pou ou kestyon. Sa *blue bond* aneife i divize an 2 konponan; i annan son konponan *grant* avek son konponan *loan*. I annan son konponan *grant* ki al kot *SeyCCAT* ki \$3 milyon *USD*.

Aprè i annan son konponan *loan* ki al, ki ganny administre par *DBS* ki 12 milyon. Anneife malerezman sa proze pe ganny terminen. Zen

lannen prosen i pe ariv son lafen. Selman sa proze depi 2018 nou ti *issue* nou *blue bond*.

I annan detrwa i annan 4 konponan sa proze. I kouver *mostly* i annan konponan 1 ziska 2. I annan sa konponan *MSP* ki siport *MSP* avek son lenplimantasyon. I annan bann proze sirtou *blue grant* ki al avek *SeyCCAT* ki ganny zere, ki al atraver sa bann proze ki pou ede avek sipor.

E ki pou sipor lenplimantasyon *MSP* avek lezot *zone* proteksyon. Aprè i osi annan *fisheries* osi sa tranzisyon atraver *sustainable fisheries* ki sa proze i ede. E osi devlopman *blue economy* an zeneral.

So pou le moman anba avek sa larzan ki al kot *SeyCCAT*, i annan apepre 39 proze ki'n ganny finanse anba *blue bond*. E osi la prezan i annan ankor en pe proze pou sa *BGF7* ki pe ganny konsidere par *Board*.

I annan pou le moman i annan 2 *small grant* ki'n ganny konsider,e e i annan 11 ki prezan pou al kot *Board* pou zot pas zot bann *clearance*. Mersi.

MR DEPUTY SPEAKER

Mersi *PS*. Nou ava aprezan apel Onorab Pillay.

HON SEBASTIEN PILLAY

Mersi Mr Chairman. Mon retourn lo - mon le pran tou lede Bidze ansanm. Premyerman, mon ti a kontan ki mon klarifikasyon *as to rent* ki Departman Lapes pe peye.

Minis Ferrari pandan letan ki ti en Manm Lasanble, i ti toultan konplent lakantite *rent* ki Gouvernman i peye. La mon war *rent* in monte sorti 4.5 milyon pou ariv 4.9 milyon.

So kote zot pe *rent* e akoz ki *rent* in mont par apepre R400 mil pou sa lannen? An se ki konsern Departman Lekonomi Ble, ki mon ti a kontan konnen, nou'n ganny lenformasyon kot sa bann proze pe ale. Me mon ti a kontan ou dir nou konbyen proze ki'n ganny aprouve?

Akoz lannen pase ou ti donn nou *commitment*. Minis ti donn nou *commitment*, ki zot pe fer en travay pou fer ki bann *potential investors*, bann dimoun ki pou al fer proze pou ganny akse ek sa finansman.

So konbyen proze ki'n ganny aprouve anba sa bann diferan program? Sirtou sa *blue bond DBS*.

Pou ki nou a kapab ganny en lide *how* ki kantite sa program in ete? Vwala mon 2 kestyon Mr Chairman. Mr Chairman, mon le rapel Minis

ki wi bann *stevedores* pe dir ou pe *avoid* zot, ou pe kasyet zot.

So, i pa mwan, i pa mwan ki pe dir, bann - sa bann dimoun ki pe dir. So, mon pa konnen si ou'n les tonbe tou keksoz, be selman i paret poudir ou'n bliye kote ou'n sorti - ou konpran?

La i la. Laverite sa Minis. Napa nanryen pou ou ankoler.

MR DEPUTY SPEAKER

Mersi Onorab. Kekfwa mon kapab *advise* tou Manm Lasanble lo tou lede kote, si zot zwenn okenn dimoun ki le war Minis e partikilyerman i sorti dan zot *constituency*, nou annan en responsabilite dan nou rol reprezantasyon, pou fasilite sa randevou sa endividi dan nou *constituency* avek Minis.

Minis, mon plis ki sir poudir ou laport i ouver. Ou a *welcome* letan en Manm i aranz en apwentman pou en dimoun ki le war ou. Nou ava envit *panel* pou reponn zot kestyon silvouple.

Lo *rent* avek bann proze anba *blue bond*. Mersi. PS Clarisse *proceed*.

PS ROY CLARISSE

Mersi Mr Chair. Mersi Onorab. Onorab sa logmantasyon pou *rent* - anefe nou pe lwe *building*

avek *Pension Fund*. E toultan Minister in lwe avek *Pension Fund*.

E *Pension Fund* pou 2024 in *increase* son *rent* pou apepre 8.5poursan ki fer ki sa sonm pou 2024 in mont en pe konpare avek ki nou ti annan an 2023. Mersi.

MR DEPUTY SPEAKER

Mersi. *Minister*.

DESIGNATED MINISTER
JEAN-FRANCOIS FERRARI

Me si mon kapab azoute Mr Chairman. Ler nou'n konpran poudir *rent* pe kontinyelman monte, nou'n fer en gran zefor dan Minister dan Departman Lapes ek Lekonomi Ble, pou nou *cut down* lo nou bann *utilities*. E la deza, deza nou pe war nou'n *save* R44 mil depi konmansman lannen.

Nou pe fer sir ki i annan en *good management of* nou *utilities* e mon felisit bann *staff* pou sa gro zefor ki zot pe fer. Prezan mon ava pas ou avek *PS Ernesta*.

PS PHILLIANNE ERNESTA

Mersi Minis. Onorab, konsernan parey mon ti'n mansyonnen pou sa konponan, pou sa konponan *grant*, i annan 39 proze depi *BGF2* a 6 ki'n ganny aprouve.

Selman konsernan sa bout *loan* pou *DBS*, vre nou'n rankontre en bon pe *challenge* en bon pe letan. Selman ki mon kapab konfirm avek ou, pou le moman i annan 3 laplikasyon ki'n ganny klarifye koman *sort of* in fini pas son bann serten staz.

Selman tou le 3 i dan diferan staz. I annan enn en pti pe nivo avanse, ki nou pe mazin *anytime* pandan lannen *hopefully* nou kapab ganny en proze ki *successful*. Akoz i bezwen zis *investor* pou li donn son *personal contribution* pou finaliz tou keksoz.

I annan en lot proze ki li i bezwen sa *investor*, i bezwen pey son *application fee* avek *DBS*. Apre i annan sa enn trwazyenm, ki i ankor en pti pe dan negosyasyon. So ki en pti pe pli prometan ki nou ti ava ki nou pe espere, ki *hopefully by if not the end of the year or early next year* ki *at least* i annan en proze ki kapab-

MR DEPUTY SPEAKER

Mersi *PS*. Mon ava apel Onorab Loze.

HON JOHAN LOZE

Mersi Mr Speaker. Mr Speaker, lo kestyon *Salha de Mala*, mon pe gete ki nivo langazman e kominikasyon ki i annan ant

Departman Minister, avek bann dimoun ki angaze dan lendistri?

Akoz bokou *feedback* ki nou, nou gannyen sorti kot zot, se ki zot pa vreman konpran ki pe pase zot pa *engaged* avek Minister. E so nou le konnen si zot bezwen ankor larzan, si zot annan ase e si zot *engaged* avek *the trade*?

Apré Mr Speaker, lo sa ki ou'n dir nou, bann doker i dir zot deza angaze avek Minister, pou ganny lapwentman pou war Minis. Zot zis pa pe gannyen. Zot pa pe war li. Sa *text* ki nou, nou pe gannyen. Mersi Mr Speaker.

MR DEPUTY SPEAKER

Mersi. Mon war *the trend*. Mwan personnelman *at the top of my head* mon kapab mazine poudir 3 fwa mon'n *call* Madanm Noel dan biro Minis, e mon bann dimoun Mont Buxton in ganny apwentman vitman avek li.

So, either Members of the National Assembly a blatantly lying or just pe fer en polemik!

(Interruptions off-mic)

MR DEPUTY SPEAKER

Be *panel* lo sa i *Salha de Mala*, silvouple. Mersi. *Proceed Minister.*

DESIGNATED MINISTER
JEAN-FRANCOIS FERRARI

Mersi Mr Speaker. Mr Speaker, konnen parey i annan dimoun i mazine pli zot repet en keksoz, ler zot repet en lalang i pou vin en laverite, *ok?*

(laughter)

DESIGNATED MINISTER
JEAN-FRANCOIS FERRARI

So, so, so kontinyen repet zot lalang e kekfw a en zour i a vin en laverite.

Donk Mr Speaker, mon ti a kontan reponn kestyon Onorab Loze lo sa *Salha de Mala*. Nou - mon kontan pou mwan raporte ki nou premye vizit, nou premye legzersis eksperimantal lo *Joint Management area Salha de Mala* an akor avek nou partner Moris in fer; in ganny fer sa lannen.

In fact, in annan 2 voyaz ki'n ale. Ti annan 3 bato ti annan en, ti annan en, en lapel *d'offre*. Ti annan 3 bato - 3 konpanyen ki'n, ki'n montre lentere pou zot al fer leksplorasyon laba. I annan finalman zis 1 ki'n ale, e ki'n retourn avek, avek serten

lenformasyon ki ankourazan - ki ankourazan.

E nou dan Minister Lapes, nou santi poudir i annan potansyel e nou bezwen kontinyen avans dan sa domenn e konnen ki pe pase e ki annan lo sa ban *Salha de Mala*.

I annan en trwazyenm voyaz ki pe fer - sa semenn mon krwar. Mon krwar pe kit Mahe sa semenn en bato avek bann peser Bel Ombre. E mon kontan pou remersye zot, akoz se bann peser Bel Ombre ki pe vreman apiye dan sa direksyon, pou zot rod sa resours.

E sa bato pe kite lafen sa semenn e mon swet zot bonn sans. E mon swete ki nou pou kapab tre byento komans devlop sa lendistri ek devlop bann resours dan sa domenn. Mersi.

MR DEPUTY SPEAKER

Mersi *Minister*. Mon ava apel Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Bonzour tou koleg Onorab. En bonzour spesyal pou tou zabitan Zil Pros ki a lekout.

Mr Chair, zis permet mon pas mon kondoleans avek lafanmir Franchette La Digue,

avek Adrienne, pou sa ki ou pe pas ladan ozordi. Mersi.

Mon kestyon Mr Speaker se ki i pa zis *stevedores* ki pe dir i pa war ou bann maren peser osi tou.

Alors zot pe demande si dan sa Bidze i annan provizyon pou zot ganny zot konpansasyon parey zot merite? Mersi.

MR DEPUTY SPEAKER

Mersi.

DESIGNATED MINISTER JEAN-FRANCOIS FERRARI

Mr Speaker, mon krwar mon'n fini reponn sa 5 fwa e sa ki annan zorey in tande sa ki annan lizye i war. Me i paret mwan i annan dimoun ki zis pa oule tande pa oule war. Mersi. D

Donk, mon napa okenn keksoz pou azoute. Mersi.

MR DEPUTY SPEAKER

Mersi *Minister*. An ka i annan en lanmen ki mon pa'n war, me mon annan en dernyen entervenans lo sa *heading*. Mon pe dir an ka i annan en lanmen mon pa'n war.

Me i annan en dernyen entervenans, sa se Onorab Hoareau.

HON JOHN HOAREAU

Mersi Mr Chair. Bonzour Minis ek ou lekip. Bonzour tou dimoun a lekout. Mon kestasyon i baze en pti pe lo stratezi Gouvernman pou diversifikasyon lekonomi. E anba sa size *aquaculture* i annan serten lobzervasyon ki serten *businessmen* i fer.

Ki dir ki zot in ganny donnen zisteman bann landrwa pou zot travay, ki en pe lwen avek Mahe. Dizon Coetivy pou kapab fer sa kalite devlopman, me zot pe gete avek Minis.

Koumsa si i annan posibilite ki kapab negosye en landrwa en pe pli pre ek Mahe, vi ki kou transportasyon i deza en faktor enportan pou zot, pou zot kapab fer sa kalite biznes.

So mon ti a kontan konnen si Minis dan son Polisi, si i pe revwar en pti pe lezot lokasyon, swa ki en pe pre avek Mahe, swa ki en pe lo Mahe menm pou fer sa kalite devlopman? Mersi.

MR DEPUTY SPEAKER

Mersi Onorab. Mon ava envit *panel* pou larepons.

DESIGNATED MINISTER **JEAN-FRANCOIS FERRARI**

Mersi Mr Speaker. Mr Speaker, ar wi lo *aqua* kiltir, i vre ki Onorab i en later i en, en difikilte. Akoz ler ou fer *aqua*

kiltir, i pa neserman ki ou pa bezwen later. Ou bezwen later pou fer bann *land-based activities* pou fer pou *grow out*, pou fer grosi ou bann pti *algae*, bann - eksetera. Pou annan ou bann fasilite. E later i vreman en difikilte.

Se pou sa ki Gouvernman, in mazine ouver Coetivy pou permet serten dimoun fer *aqua* kiltir laba. I lwen, i lwen e i dekourazan i vre. Me selman sa ki par ler sa ki pase lo Mahe, lo Praslin, i pli dekourazan ankor.

Ozordi mon ti a kontan rekonnet zefor ki 2 frer - frer Michel, Benny avek Georges - 2 frer Glacis. Ki'n travay enormeman pou zot devlop lapes. Zot in fer en laferm pou bann zwit.

E zot in travay dir, zot in grosi sa bann zwit. Ler ti pros pou pare pou rekolte pou zot al vann, dimoun in pase in vol tou! E sa ti pe ganny fer kot Ile Aurore. I vreman, vreman dezapwentan.

E pou mwan, mon latet i bel, mon kanmi, konmsi ki mon en Seselwa, ler mon war bann keksoz koumsa arive. E ler ou fer sa Mahe, i annan e dan tou pei i koumsa. Ler ou fer sa pros avek bann popilasyon, toultan ou ganny sa bann difikilte vole.

Krab, zot in sey fer krab dimoun i vini i vin pran sa bann

krab dan sa bann karle. Konmsi i - mon lans en lapel avek bann dimoun annou pa dekouraz bann dimoun ki anvi fer sa devlopman dan lapes. annou ankouraz zot. Annou respe. E ler nou konnen lekel ki pe fer sa bann keksoz ki pa zoli, nou bezwen raporte.

Akoz, i ras ker, tou sa bann zefor ki dimoun i mete e ki napa rezilta. Me mon ti a kontan dir avek tou dimoun ki enterese dan sa domenn, ki nou pou kontinyen ki Minister Lapes ki nou pou kontinyen ankouraz zot.

E rod bann landrwa ki pli an sekirite, e gete ki mannyer nou kapab siport zot dan domenn dan sa domenn ki zot in swazir. Alors ancor enn fwa mon kapab dir poudir, in annan plizyer *license* ki'n ganny donnen.

I annan plizyer dimoun ki enterese, ki pe komans bouze dan plizyer sektor. Alors i prometan e mon, mon zis anvi ankouraz tou dimoun pou pa les tonbe, *ok?* E ler nou war keksoz ki pe marse - se sa en pti pe mon dezapwentman isi dan Lasanble.

Ler keksoz pe marse, i annan en group ki li toultan i pa kontan aköz keksoz pe marse. Ou konpran, i pa kontan. Kontrer i ti devret bat lanmen i

ti devret dir "ya sa i en keksoz ki bon! I bon pou Sesel!"

Me selman i annan dimoun ki toultan i war zis negativ; i war zis bann keksoz ki pa byen. Alors - i par ler, be selman nou pa pou dekouraze, nou pa pou dekouraze.

Nou konnen kot nou pe - bann zefor ki nou pe mete e mon krwar poudir nou ava gannyen bann rezilta. Mersi Mr Chairman.

MR DEPUTY SPEAKER

Mersi *Minister*. Donk in ariv ler aprezan pou nou pran en vot lo sa *heading* ki nou fek koz lo la. E sa i enkli Departman Lapes lo paz 84 a 88 pou en sonm 19 milyon 862 mil.

E Departman Lekonomi Ble ki lo paz 89 a 94 pou en sonm R36 milyon 183 mil.

Solman nou pe pran li koman *one vote as Ministry of Fisheries* sitye lo paz 84 a 94 pou en sonm R56 milyon 46 mil. Donk, nou ava demann tou bann Manm ki an faver, pou endike silvouple?

Mersi. Okenn Manm ki kont? Mersi vot lo *Ministry of Fisheries* pou en sonm R56 milyon 46 mil, i annan 26 Manm ki'n vot an faver, okenn Manm pa'n vot kont e okenn Manm pa'n *abstain*.

Donk, baze lo lakantite Manm ki dan Lasanble prezan sa vot in pase par linanimite.

(APPLAUSE)

MR DEPUTY SPEAKER

Sa in anmenn nou a lafen nou premye lanmwatye sesyon travay pou ozordi. Nou ava remersi bann zofisye sorti kot Minister Lapes ek Lekonomi Ble, dirize par Minis Dezinyen Mr Jean-Francois Ferrari, ki ti akonpanyen par Mr Roy Clarisse Sekreter Prensipal pou Lapes, Madanm Phillianne Ernesta Sekreter Prensipal pou Lekonomi Ble e Mr Joshua Adeline ki *Accountant*. E nou ti annan 2 zofisye Minister Finans ki pe kit nou la akoz apre midi pa zot ki pe retournen.

Sa i Manmzel Astride Tamatave *Comptroller General* avek Manmzel Agnes Madeleine ki *Senior Finance Analyst*. Nou ava dir zot tou mersi. Nou pou *adjourn* la e nou pou rebran travay aparti 2er apre midi.

(BREAK)

MR DEPUTY SPEAKER

Bonn apre midi tou dimoun. *Welcome back* pou nou sesyon Lasanble pou sa Lendi. Nou

kontinyen dan Staz Komite *Appropriation Bill* 2024. E apre midi la nou annan nou 2 antite.

Pou nou konsider zot Bidze donk nou ava demann *Parliamentary Reporter* pou apel delegasyon silvouple.

DEPARTMENT OF FOREIGN AFFAIRS

MR DEPUTY SPEAKER

Bon, nou ava akeyir delegasyon Minister Zafer Etranzer e Tourizm. La ant 2er a 3er nou pou regard Bidze Departman Zafer Etranzer.

E avek nou, nou annan delegasyon dirize par Minis Sylvestre Radegonde, ki akonpanyen par Anbasader Vivianne Fock Tave ki Sekreter Prensipal pou Zafer Etranzer. I osi annan Manmzel Selma Germaine ki Direkter Zeneral pou *Human Resources and Administration*.

E Madanm Bessy Banane ki *Financial Controller*. Nou ava osi *welcome* Sekreter D'Eta dan Minister Finans Mr Patrick Payet avek Manmzel Terryll Adrienne ki *Senior Financial Analyst* sorti kot Minister Finans.

Donk, ki nou pou fer la se envit Minis pou fer en prezantasyon osi bref ki posib lo

Bidze Departman Zafer Etranzer.

E apre nou ava ouver lasal pou bann Manm demann zot kestyon, pou fer komanter. *Minister welcome.*

MINISTER SYLVESTRE RADEGONDE

Bon apre midi Mr Chairman. Onorab *Leader* Lopozisyon, Onorab *Leader* Gouvernman, tou Manm Onorab, tou dimoun a lekout. Mr Chairman, Departman Zafer Etranzer i responsab pou defini e enplimant Polisi Zafer Etranzer Sesel.

Avans lentere pei atraver lateral e multilateral devlop relasyon enternasyonal e rezyonal e mobiliz lasistans pou devlopman nou pei. Bidze Departman Zafer Etranzer ki pe ganny propoze pou lannen prosen i R154.369 milyon.

Sa i en logmantasyon R26.035 milyon konpare avek Bidze revize pou sa lannen. Sa logmantasyon i prensipalman pou sa bann rezon swivan;

I pou kouver 10poursan logmantasyon dan saler debaz parey in ganny anonse avan.

Revizyon dan kad servis pou travayer ki donn sipor - parey zot konnen sa revizyon i osi aplik pou tou lezot Minister e Departman.

Lanplwa pou nou abzorbe si oule tou bann *housekeepers* apartir Zanvye 2024.

Pou nou *host* konferans pou bann Konsil Onorer Sesel, ki ganny fer tou le 2 an. E apre pou nou kouver depans asosye avek nou prezidans Komisyon Losean Endyen ki nou pou pran apartir Me 2024.

Bidze ki ganny propoze i konpri 3 program konm swivan;

Program 1 sa i konsern governans, zestyon administrasyon. E ki efektifman deservi Sekretarya Minis, Sekretarya Sekreter Prensipal ek administrasyon. I annan en alokasyon R60.482milyon.

Program 2, sa program i pli gro parti nou Bidze i konsern relasyon enternasyonal ki enkli 9 Lanbasad e 3 divizyon teknik isi kot *Headquarters*. Sa 3 divizyon se Divizyon Zafer Bilateral, Divizyon Zafer Multilateral e Divizyon Zafer Rezyonal. Zot annan total en alokasyon R80.225 milyon.

E finalman anba Program 3, pou R13.662 milyon in ganny bidzete pou 2 divizyon, ki Divizyon Protokol ek Divizyon Zafer Konsiler e *Diaspora*.

Mr Chairman, pou lenformasyon nou 9 misyon diplomatik aletranze, i annan en Bidze R58.923 milyon. I fer ki zot depans 38.17 pousan Bidze Departman Zafer Etranzer.

Mon ti oule koz lo lakonplisman e defi pandan lannen - sa lannen e nou plan pou lannen prosen Mr Speaker, petet mon a les sa pou posibilite dan nou konversasyon kestyon repons pli tar.

E zis pou note ki pandan lannen nou'n siny 27 lagreman ou *MOUs* dan plizyer sekter tel ki lapolis, ladefans, lagrikiltir, lasante, korperasyon pou lasistans legal mityel.

Sa ki nou apel *mutual legal assistance* parmi lezot ankor. Nou'n zwe en par aktiv dan negosyasyon pou sa *loan* ki *Saudi Arabia* in donnen pou konstriksyon lekol La Digue e lakaz parmi lezot. Nou'n kontinyen avek nou program pou mobiliz lasistans avek nou bann Konsil Onorer dan kad sa program "Adopte En Distrik."

Sa i fer ki bann Konsil Onorer - nou bann Konsil Onorer atraver lemonn, pe kontribye dan plizyer proze dan bann diferan distrik, ki Manm Onorab zot konnen zot menm. Mr Chairman pandan 2023 nou'n osi fer fas avek serten defi

akoz nou bann partner ki zot osi zot lekonomi i ankor frazil. E pe stabilize apre *COVID-19* sa in fer ki akse avek finansman e led in limite.

An 2024, Departman Zafer Etranzer pou kontinyen defann e promot lentere Sesel lo lasenn enternasyonal.

Avek sa Mr Chairman, mon rekonmann sa Bidze avek Lasanble Nasyonal, e mon a dispozisyon Lasanble pou plis lenformasyon e klarifikasyon. Mon remersye ou.

MR DEPUTY SPEAKER

Mersi Minis. Donk aprean lasal i ouver pou kestyon e komanter. Dabor, mon envit Onorab Lemiel.

HON SYLVANNE LEMIEL

Mersi Mr Chair. Bonn apre midi Mr Chair. Bonn apre midi Minis avek ou delegasyon. Minis, nou tou nou konnen poudir dan en landrwa travay, nou bann travayer i nou *asset*. E nou bezwen met nou bann travayer. Nou bezwen ekip zot byen nou bezwen get zot byen.

Akoz pou zot kapab donn nou sa bon servis e sa rannman ki nou, nou pe rode pou kapab pous nou lorganizasyon devan. Mon aprann ki kot *Foreign Affairs* zot in perdi zot apepre

10 *staff* pandan sa lannen 2023.

Mon ti a kontan konnen atraver ou Bidze 2024, or an zeneral osi ki ou avek ou departman kot *Foreign Affairs* zot pe mazin fer pou zot kapab *retain* bann *staff*? Akoz parfwa nou perdi bann *staff* ki annan leksperyans; bann *staff* kekfwa ki nou pa ti a kontan perdi.

Me ou war zot, zot pe ale so ki Departman *Foreign Affairs* pe fer atraver ou Bidze 2024 pou ou kapab *retain* plis ou bann *staff* kot ou departman. Mersi Minis.

MR DEPUTY SPEAKER

Mersi Onorab. Mon ava envit *panel* pou, pou donn zot larepons.

MINISTER SYLVESTRE RADEGONDE

Mr Chairman, mersi. Mersi Onorab pou ou kestyon. Mersi pou ou konsern ki ou annan avek *staff* kot nou. Onorab, sa ki mon dir ou se ki mentenir *staff* mon trouve isi i en *challenge*. I en *challenge* anfen i pa zis Sesel i partou.

Mwan, mon'n vin isi mon ti pe travay avan sa en pti pe avan dan en konpani, en konpani prive ki ti pey byen. Me an menm tan ki pa ti zanmen gard tou *staff*. i –

Market - labor market i mobil, tou dimoun i bouze.

I annan i rod en pe plis *challenge*; i annan i kite pou bann lezot rezon personnel, i le pli pros avek en pos ki pli pros avek kot li ler travay ensidswit.

Mwan sak, sak *staff* ki kit Minister Zafer Etranzer, i toultan en sagren pou mwan. E mon sey mannyer a sak fwa pou mwan fer konversasyon avek sa *staff* pou konpran.

Bann *staff* ki'n ale. i konsern bokou bann ki dan seksyon finans ek administrasyon. E parey ou konnen i annan en gran demann pou sa bann *staff* ozordi lo *market*.

Zot ganny *poached* par bokou bann konpani prive e saler i konpetitiv i bann saler ki nou, nou pa kapab *compete* avek. So malerezman mon ti a voudre kapab dir ou nou ti a esey fer tou pou gard zot. Sirkonstans i tel ki i pa pou posib.

Dan la mezir di posib nou fer tou pou ankouraz zot pou reste, me annan de ler i annan bann lezot *pool* ki anmenn zot aryer. Mersi.

MR DEPUTY SPEAKER

Mersi *Minister*. Zis pou lenformasyon Lasanble paz ki nou pe travay lo la, la i 404

ziska 411 pou *Foreign Affairs*. Prosen enterven an se Onorab Uranie.

HON ROCKY URANIE

Mersi Mr Chair. Bonn apre midi *Minister* avèk ou delegasyon. Ankor en fwa bonn apre midi, bann koleg Onorab e zabitan Zil Pros ki a lekout. Minis eski zot annan larzan dan sa Bidze, pou enplimant plan rotasyon bann, bann *staff* dan *overseas mission*? Mersi.

MR DEPUTY SPEAKER

Mersi Onorab. *Panel*.

MINISTER SYLVESTRE RADEGONDE

Mersi Chair. Mon a les *PS* reponn sa me zis koman en lentrodiksyon, mon a dir ki nou toultan fer provizyon. Mon pa sir si sa lannen nou annan okenn plan rotasyon ki Anbasader ouswa ki *staff*.

Parske prensipalman bann *staff* ozordi ki dan Lanbasad, zot relativman fek ganny nonmen dan bann pos. Alor amwen ki i annan en rezon partikilye ki nou bezwen bouz en *staff* pou napa an prensip okenn rezon pou nou fer li sa lannen.

Me si i annan wi, i annan provizyon pou nou *cater* pou sa.

PS, mon pa konnen si i annan... Mersi.

MR DEPUTY SPEAKER

PS, ou kapab *proceed*.

PS VIVIANNE FOCK TAVE

Mersi Deputy Speaker Chair. Onorab, wi pou 2024 i annan pou annan enn, en rotasyon *the second diplomat* parey nou dir pa Anbasader. E, e sa i kot i *New York* ki nou pe ranplas en *staff* ki'n fer 3 an - plis ki 3 an in fer 4 an. Akoz nou ti *extend* son *stay* pou 1 an akoz dan letan *COVID* i pa'n vreman ganny ase leksperyans avèk *UN*.

E la i pe retournen lannen prosen an Mars, e sa lot *staff* pe monte. E sa lot *staff* i sorti dan enn nou divizyon teknik, kot wi, provizyon Bidze in fer, wi.

MR DEPUTY SPEAKER

Mersi *PS*. Mon ava envit Onorab Labrosse pou son kestasyon.

HON RICHARD LABROSSE

Mersi Mr Speaker. Bonn apre midi Minis ek ou delegasyon. Mr Speaker, mon ti annan en mon pe get dan zot *major achievement* 2022-2023, ki *Foreign Affairs* in site ki zot in mobiliz e devlopman lasistans bilateral e multilateral *partners*, dan diferan form donasyon.

E *grant*, sa i vin bann proze priyorite parey zot in mansyonn *social housing* ek lekòl. Kekfwa Minis, ler nou pe al vot pou sa Bidze, si ou ti kapab dir nou briyevman ki bann retonbe ki nou'n ganny ek sa bann lakor bilateral.

Oubyen kekfwa ki proze ou annan dan ou lespri la, ouswa kekfwa en sonm ki ou annan dan ou lespri ki ou kapab donn Lasanble?

Aprè Mr Speaker, mon'n osi regard ankor dan zot *major achievement* menm, ankor lo en pe lo menm laliny menm. Kekfwa si Minis ankor enn fwa si i annan sa lenformasyon ek li, si kekfwa briyevman ankor san gran, gran zafer Minis.

Si ou ti kapab dir nou, ki pei an zeneral ziska ozordi ki nou pe koze, kekfwa ki nou'n kapab gannyen an term sipor ek nou bann pei zanmi? Mersi Mr Speaker.

MR DEPUTY SPEAKER

Mersi Onorab.

MINISTER SYLVESTRE RADEGONDE

Mr Chairman mersi. Mersi Onorab pou ou kestyon. Onorab, mon le fer kler petet, ki dan nou demars dan Zafer Etranzer dan *diplomacy*, i pa neserman toultan ki nou pe

rod en *cheque*, ouswa kek larzan. I pa neserman koumsa.

Parmi bann nou bann aktivite, i osi rod sipor. I osi rod senpati, rod korperasyon nou bann partner etranze. Par egzanp, en kantite nou bann aktivite kantite mon bann aktivite, parey ou tande bann aktivite ki menm Prezidan li i *attend* bann *forum* enternasyonal.

Se pou nou target bann *issues* ki konsern nou ki dan nou lentere nasyonal. Ozordi sa zafer pti leta zil, lentere bann pti leta zil i primordyal, i tre enportan pou nou. Bann zafer klima, sanzman klima lanvironnman i osi enportan.

Donk, dan nou demars an menm tan ki nou pe rod led si oule, bann led i kouver ganny sipor senpati nou bann dimoun pou pous sa arzanda ki dan nou lentere nasyonal.

Ou demann bann pei ozordi ki ed nou konkretman apard la bann ki fer *advocacy* pou nou, ki koz pou nou dan bann *forum* enternasyonal. Ki siport nou lo bann size - bann ki petet i tanzibleman donn nou bann led lakaz, e bann lezot - e byensir i annan *UAE* ki mon mete koman enn nou bann partner.

I annan Lasin; i annan Lenn - sa bann ki vin direk. I annan Langleter ozordi ki pe ed nou en kantite avek Lapolis avek Komisyon Anti Koripsyon ensidswit. So vwala mon espere mon'n reponn ou kestyon Onorab. Mersi.

MR DEPUTY SPEAKER

Mersi Minis. Mon aprezan pas laparol avek Onorab Vidot.

HON AUDREY VIDOT

Mersi Mr Chair. Bonn apre midi Minis avek delegasyon. Mr Chairman, mon oule demann Minis mon konnen i annan sa Polisi *Diaspora* ki Minis in mansyonnen. Mon ti le konnen sa dimoun ki pe travay pou sa, pou enplimant sa Polisi si i en konsiltan Seselwa *or foreigner*. Konbyen anba Bidze ki i pe resevwar koman en saler?

E osi dan menm laliny nou konnen i annan en kantite Seselwa ki reste, ki pe reste aletranze. Ki rankontre serten difikilte e bokou fwa zot *rely* lo bann Lanbasad pou zot kapab ganny serten sipor.

E avek sa Polisi, eski zot annan finansman - pa zis pou sa bann lanbasad me osi pou Sesel? Pou zot donn plis ledikasyon, ki mannyer zot kapab fasilite kominikasyon bann servis ki zot ofer pou

permet bann dimoun pli fasil pou zot apros lanbasad pou rod sipor. *Thank you.*

MR DEPUTY SPEAKER

Mersi Onorab. Mon ava pas laparol avek *panel*.

MINISTER SYLVESTRE RADEGONDE

Mr Chairman. Mersi Onorab pou ou kestyon. Wi, nou annan en seksyon *Diaspora* dan Minister Zafer Etranzer ki okip parmi lezot keksoz anrezistre bann Seselwa atraver lemond.

I osi enkli bann aktivite konsiler - ed bann Seselwa konsey bann Seselwa ki'n ganny *stuck* ouswa ki annan kek problem aletranze. Nou dan prosedir la pou premye fwa pe travay lo en Polisi *diaspora*. E pou sa nou'n ganny led en, en *Expert* sorti kot **IMO, IOM* pardon, pou ed nou pou sa.

E byensir ler zot donn *expert* zot peye zot menm nou napa kontribisyon sorti kot nou. Mon pa konnen si sa *expert* i ankor isi ouswa si in fer son travay in ale.

Donk, *short answer*, se ki wi nou'n annan en *expert* in fini fer son travay in ed nou pou drafte sa Polisi e prezan i en zafer pou nou fer swivi pou sa Polisi.

An sa ki konsern led ki nou bann, nou bann Lanbasad osi nou bann Konsil Onorer aletranze i *provide* bann led konsiler. Mon a pas ek *PS* pou donn en pe plis detay. Mersi.

PS VIVIANNE FOCK TAVE

Mersi Minis. Onorab, parey ou konnen nou bann Lanbasad i vreman pti, pti. E alors *normally* nou annan i annan zis en Anbasader avek en *second diplomat*. Me selman i annan osi lanbasad ki annan zis en Anbasader.

Alors nou sey tou mye posibil pou nou kapab donn led nou bann *diaspora*. La par egzant mon a donn ou en legzanp pou lannen prosen. Avek sa *biometric passport* par egzant i tonm dan kad osi konsiler kot pou nou, pou nou Lanbasad.

Nou pe travay ansanm avek Imigrasyon pou nou kapab fer en stasyon kot enn de Lanbasad kot nou war i annan kantite *diaspora* pou Lanbasad ede kolekte zot *data* pou zot pa desann e apre Imigrasyon i ava poste zot - zot a fer peyman direktman ek Imigrasyon.

E apre zot ava - Imigrasyon i ava poste zot paspor. Sa i enn bann keksoz ki nou pe sey fer pou ede, pou ed nou bann *diaspora*. Me

selman si ou dir mon an term bidzeter, nou pou touzour napa ase larzan, akoz nou pou bezwen en pe plis dimoun pou donn bann servis konsiler mon kapab dir.

Akoz parey mon'n dir i annan bann lanbasad ki annan zis en Anbasader. Mersi.

MR DEPUTY SPEAKER

Ou annan klarifikasyon?

HON AUDREY VIDOT

Yes. *PS* petet ou ti a kapab dir nou letan pou annan kordinasyon ki ou'n dir ant biro Imigrasyon eski se i annan en *fee* ki zot pou peye pou zot fer sa tranzaksyon pou transfer kek zot bann dokimantasyon?

PS VIVIANNE FOCK TAVE

Onorab, non. Pou le moman nou pa ankor diskit okenn *fee* avek Imigrasyon. Mannyer mon konpran pou annan bann *training* ki Imigrasyon pou donn nou bann dimoun dan Lanbasad.

Mannyer mon konpran so *far* ler nou'n fer *initial discussions* avek Imigrasyon. Sa bann *data* parey *fingerprint whatever*, la pou ganny transfer direktman kot Imigrasyon. So, so *far*, nou pa'n diskit okenn-okenn *fee* lo la.

MR DEPUTY SPEAKER

Mersi *PS*. Mon ava apel Onorab Loze.

HON JOHAN LOZE

Yes. Mersi Mr Speaker. Mr Speaker, pli boner sa lannen Sesel ti absan pou pran en vot kot Nasyon Ini, ki ti konsern proteksyon sivilyen kont lagresyon *La Palestine*.

Kestyon ki mon anvi demann Minis, i tre senp, eski Minis i kapab eksplik nou ki'n arive. Eski zot annan en ase resours pou *meet* zot bann lobligasyon devan Nasyon Ini.

Ouswa si zot annan mankman ou bezwen, pou nobou onor bann lobligasyon ki nou pei i annan? Mersi Mr Speaker.

MR DEPUTY SPEAKER

Mersi Onorab. *Panel?*

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. Mr Speaker, lo sa kestyon *Palestine* avek Izrael i en size ki konpleks parey zot konnen. E petet la, i pa *forum* pou mwan al dan tou bann detay.

Me long and short se ki, ler nou ti regard sa rezolisyon ki manner i ti ganny *draft*, lo prensip nou kondonn okenn

latak. E se sa nou ti fer kler ler ti ariv sa latak lo Izrael le 7 Oktob e apre ki Izrael ti *retaliate*.

Nou ti fer kler dan en kominike ki nou kondann okenn latak, okenn latak, sirtou lo bann dimoun inosan lo sivilyen. Nou ti fer sa. Nou ti demande osi ki bann parti konsernen i aret lager - *basically call en ceasefire* e aret asiz diskite.

E baz diskisyon i pozisyon ki nou'n toultan - menm Gouvernman avan - in mentenir ki nou, nou pe swiv. Se 2 Leta dan sa rezyon - en Leta Palestinyen endepandan, en Leta Izraelyen endepandan. Sa i la baz nou prensip kan manner nou regard sa zafer.

Sa dan ka sa rezolisyon spesifik, nou ti panse ki i annan serten problem lo *wording* ki nou pa ti satisfè avek. Ti annan en rezolisyon ki *Canada* ti propoze e ki nou krwar i ti anmenn li pli pre avek sa ki nou krwar sa rezolisyon ti devret.

Setadir kondann tou lede kote parske tou lede kote i annan, i annan en tor si oule. E apre bon, sa Rezolisyon *Canada* pa ti pase. Ti napa ase vot pou fer li pase. E apre i ti retourn lo sa rezolisyon inisyal ki nou ti annan problem avek.

Alor parey nou'n fer dan lefase dan lezot size, parey nou fer toultan dan Nasyon z-Ini e lezot *forum*, ler i ariv en sityasyon koumsa, swa nou vot wi, swa nou vot non, swa nou reste dan lasal nou *abstain*, ou swa nou zis deside pa *turn up*.

Dan sa ka nou panse ki i ti meyer ki nou pa la. I ti napa nanryen pou fer avek resours ki nou annan. Nou annan ase dimoun *New York*, pou kouver bann *issues* ki priyoriter pou nou. Me dan sa konteks la nou ti panse ki i ti meyer nou pa la. E sa i en pozisyon ki mon mentenir.

Subsequently pou lenformasyon, in annan en lot rezolisyon ki'n prezante apre dan Lasanble Zeneral *UNESCO* ankor lo sa size e nou ti kapab siport sa rezolisyon. Mersi.

MR DEPUTY SPEAKER

Mersi *Minister*. Mon ava apel aprezan Onorab Mondon.

HON TERENCE MONDON

Mersi Mr Chair. Mon kestyon i relye avek renovasyon *carport*. Mon war ki poudir en sonm 3 milyon, 3.2 plizoumwèn pou 2024. E en sonm 3 milyon prozekte pou 2025 ki ariv 6.2 milyon pou renovasyon *carport*.

Petet dir nou kwa ki fer ki sa sonm i ariv sa sonm kwa ki pe ki en pe plis detay lo sa proze li menm? Mersi Mr Chair.

MR DEPUTY SPEAKER

Mersi Onorab. *Panel?*

PS VIVIANNE FOCK TAVE

Mersi Onorab. Pou *carport* nou ti pe fer - nou ti krwar nou kapab komans li sa lannen, nou pa'n nobou konmanse; in ariv detrwa *challenges* ki, ki nou'n gannnen. E la *carport* pou komans, komansman Desanm se pour kwa ki Finans in met sa larzan plito dan 2024 pou nou nobou fer sa *carport*.

E sa *carport* li i pou lo pilye. I pou annan bann *points* osi ki akoz nou pe aste bann loto elektrik, mon kapab dir. Ki kout nou - nou a *save* lo *fuel*. So, i pou lo pilye epi anba nou pou fer en *store*. So sa tousala i ansanm, wi.

MR DEPUTY SPEAKER

Mersi *PS*. Onorab Herminie.

HON WILBERT HERMINIE

Mersi Mr Chair. Bonn apre midi Minis avek ou delegasyon. Mr Chair, mon pou zis repran en kou kot Onorab Mondon in demande. Me sa i en pe eksektiv, si nou pe met li dan konteks konstriksyon i sa i

parey en *building* 3 letaz, ler nou pe konte pou fer renovasyon en *carport*.

Mon krwar plis leksplikasyon i devret ganny donnen akoz pou mon sa i en pe ekksesiv sa, sa pri pou sa *carport*. Mon kestyon i *relate* avek *other goods and services; 2023* pou *facilities and events* ti napa larzan, la nou war 1.4 milyon in ganny mete si ti kapab ganny en detay lo la? Mersi.

MR DEPUTY SPEAKER

Mersi Onorab. *Panel?*

PS VIVIANNE FOCK TAVE

Onorab pou *carport* ki kekfwa mon'n bliye dir i pa en renovasyon. Sa *carport* pou ganny kraze net e i annan bann miray ki pe tonbe i enkli osi *the whole wall* anba kot *Foreign Affairs*.

I ansanm avek sa *carport* osi ti annan bann tes ki ti ganny fer ki montre sa *carport* pli ale pe desann, pe desann, akoz i o bor en larivyer. So, i annan bokou plis ki zis, ki zis en *carport* ladan.

MR DEPUTY SPEAKER

Sorry i annan en sonm ki'n demande lo *events*.

PS VIVIANNE FOCK TAVE

Ar *sorry* pou *goods and services* sa 1.4 milyon parey nou'n dir, i osi pou - i *mainly* pou *Honorary Consuls* ki pe ganny fer, lannen, prosen i ganny fer tou le 2 an. I enn parmi bann rezon.

MR DEPUTY SPEAKER

Mersi PS. Onorab Cosgrow?

HON WALLACE COSGROW

Ya, bonn apre midi Minis avek ou *panel*. Bonn apre midi Mr Chairman avek tou Manm. Mr Chairman, zis pou mwan eksplik - eksprim en pti pe mon-

Si mon mazin byen sa *carport* kot *Ministry of Foreign Affairs* la, sa pti lespas pou kout 3 milyon? *Ok, anyway*. Mr Chairman mon kestyon i lo nou misyon *New York*, en? Mon war i annan en logmantasyon apepre R3 milyon.

Bidze nou misyon *New York permanent mission to United States* i R10.153 milyon sorti R6.9 milyon. *Now* si Minis ouswa PS i kapab eksplik nou en pti pe, rezondet sa bann logmantasyon.

E an vi ki nou pe pey sa kantite larzan pou en *permanent office in New York*, eski Minis i kapab konfirm ek nou, ki si - sa-sa larepons ki'n donn nou taler lo an se ki

konsern sa size vot Nasyon z-
Ini.

Si desizyon ti en desizyon sorti kapital, pou nou *sit out* sa vot e anvi ki pe donn sa kantite larzan, eski Minis pa krwar *at least*, nou ti devret kapab asiz dan lasal reprezant Sesel. E si nou pa ti *feel* konfortab avek sa rezolisyon ki ti'n ganny mete, nou ti ava *abstain*.

Si nou pa ti *feel* konfortab nou ti ava *abstain* e alors dir nou si sa i en desizyon sorti kapital pou nou pa antre dan lasal. E pou nou pa montre nou, nou pozisyon lo sa desizyon? Mersi.

MR DEPUTY SPEAKER

Mersi Onorab. *Panel?*

MINISTER SYLVESTRE RADEGONDE

Mr Chairman, mersi. Mersi Onorab pou ou kestyon. Onorab, parey mon dir tradisyonnelman sa in leka toultan; in leka ozordi. I annan 4 pozisyon posib ki ou pran dan sa bann *forum*; ou vot wi, ou vot non, ou *abstain* ouswa ou pa la.

Ou pa la avek ou *abstain*, i annan preski menm lenplikasyon ziridik. Koman dir menm lenplikasyon. Zafer pou pa la i pa en zafer ki nou, nou'n envante. Lo sa kestyon *Palestine* ler mon get rikord 3

fwa dan lepase, mon bann predeseser in fer egzakteman sa.

Nou pa'n *turn up*. Nou pa la akoz nou panse ki stratezikman i meyer ki nou pa dan lasal - nou pa la. Nou argye si ti pou wi, si ti pou non, si nou ti devret la, la ozordi kot nou ete i delo anba, anba pon parey nou dir, desizyon in fini pran.

Eski lenstriksyon ti sorti Kapital? Yes, dan sa bann keksoz koumsa Anbasader i toultan pran lenstriksyon avek Kapital. Mersi.

MR DEPUTY SPEAKER

Mersi Minis. Onorab Pillay.

HON SEBASTIEN PILLAY

Mersi Mr Chairman. Mr Chairman, mon le-mon le konsider sa bann larepons ki Minis pe donn nou. Akoz vizavi lo bann logmantasyon ki nou pe propoze pou Departman *Foreign Affairs*, i nesese ki nou ganny bann larepons ki montre poudir nou, nou pe pran responsabilite pou sa larzan ki Leta Sesel pe met a nou dispozisyon.

Ler ou ti vin dan Lasanble premye fwa ki ou ti vin Minis, ou ti eksplik nou ki mannyer bann lezot Lanbasad pe depans en kantite larzan.

E la nou, nou war ankor ki ou'n bezwen fer serten logmantasyon *across* ou Departman. E ou'n war nesosite pou fer sa bann logmantasyon. Mon kestyon i vin lo sa servis ki nou *provide* pou logmantasyon.

I pa akseptab pou sa larepons ki ou'n donn Onorab Cosgrow pou dir nou poudir lepase bann Anbasader pa'n fer koumsa, in fer koumsa.

Sityasyon i diferan e lefe ki ou Gouvernman ti *campaign* lo en platform ki i pou fer pli byen, e diferan avek, avek Gouvernman avan, ki mannyer ou kapab zistifye ki nou pey en logmantasyon pou en Lanbasad *New York* e ki Anbasader pa pou *turn up* ler in annan en vot enportan?

Eski sa i en pratik ki zot pou, zot pou ankouraze *across* bann lezot Lanbasad? Mon ti a kontan konnen akoz pou nou vot en Bidze R3 milyon ankor an plis pou Lanbasad *New York* pou mwan, mon war sa i pa akseptab! Mersi Mr Chairman.

MR DEPUTY SPEAKER

Mersi Onorab. Nou ti ava demann *panel* pou re eksplike ankor 4 pozisyon ki en pei i kapab vote, pou eksplike silvouple.

MINISTER SYLVESTRE RADEGONDE

Mr Chair, mersi. Mersi Onorab, pou ou kestyon. Onorab, ou pa kapab ziz travay Lanbasad baze lo 1 vot ki'n arive dan en peryod mon pa konnen konbyen. Lanbasad i annan travay ki i fer pandan tou dilon lannen.

E Lanbasad *New York* an partikilye i enn dan bann Lanbasad ki pli aktiv lo plizyer bann dosye. Pti leta zil, lanvironnman, sanzman klima, *multi vulnerability index* ensidswit. So, mon satisfè mon ki sa lanbasad i fonksyonnen tre byen e i *worth* tou sa Roupri ki nou met ladan.

Mon pa pou al ankor mon Mr Chairman, pou mwan al eksplik bann diferan pozisyon ki nou adopte dan bann *forum* enternasyonal, ler i ariv en *issue* pou nou vote.

Sa vot desizyon pou vote i en drwa souvren sak Gouvernman pou li pran. E nou pran nou pozisyon dapre nou lentere nasyonal, nou lentere a sa moman. Mersi bokou.

MR DEPUTY SPEAKER

Mersi *Minister*. *Unless* mon pa'n war okenn lezot lanmen. Me mon annan en dernyen, enterven an Onorab Arissol.

HON SANDY ARISSOL

Mersi Mr Speaker. Bonn apre midi Minis avek ou lekip. Bonn apre midi tou dimoun ki a lekout. Mr Chair, mon ti zis anvi dir poudir Lasanble osi parfwa nou vot en kantite Bidze.

E la nou'n aprouv en Bidze R54 milyon pou Lasanble Nasyonal. E parfwa ou ganny bann Manm ki letan pou ariv bann letan pou pran bann desizyon enportan, zot *walk out* dan Lasanble Nasyonal e zot pa la. Parey pou 13enm mwan saler.

So mon ti a kontan felisit ou Minis, pou letan ou'n fer ou lentrodiksyon ou'n koz an relasyon avek bann *MOUs* zot in sinyen. Bann keksoz ki anmenn en kantite benefis pou nou pti pei.

So felisitasyon pou kontinyen tap bann laport pou ed nou dan sa bann demars. E zisteman letan ou'n fer ou lentrodiksyon, ou'n osi koz lo bann *consul*. Sa enteraksyon ki nou ti annan ant bann *MNAs* avek bann Konsil.

Mon ti a kontan demann ou kekfwa dir nou lekel bann distrik ki'n benefisye vreman avek bann Konsil. Kan ki bann lezot distrik pou kontinyelman benefisye? Parske dan nor ziska prezan pa ankor ganny

nanryen konpare avek bann lezot distrik.

Kekfwa kot nou, nou en pti pe pli briyan dan nor, pou nou i a pe vini dousman, dousman. Be eksplik nou en pti pe kwa ki bann lezot distrik in gannyen, an relasyon avek sa travay ki nou ti fer avek bann Konsil ki ti vizit bann distrik? Mersi bokou Mr Chair.

MR DEPUTY SPEAKER

Mersi Onorab. Nou ava envit *panel* pou donn en larepons.

MINISTER SYLVESTRE RADEGONDE

Mr Chairman, mersi. Mersi Onorab pou, pou ou kestyon. Mr Chairman, sa, sa program *"Adopt A District"* ki i ti en linisyativ ki nou, nou ti pran ler nou ti vin dan Gouvernman 3 an pase.

Parske nou ti war ki nou ti annan en kantite Konsil atraver lemonn. E zot pa ti pe neserman *focus* dan travay ki zot ti sipoze fer, e si oule anmenn en benefis pou pei. E se sa ki nou'n deside 2 an pase pou nou etabli sa program.

E zot in travay avek tou distrik mon krwar in ganny *input* avek sak *MNA* dan sa lasal avek zot *District Administrators*, pou war ki priyorite zot bann diferan distrik. E i annan en

programm travay ki'n ganny baze lo la dapre demann sa distrik.

Ozordi *PS* i aviz mwan ki an sa ki konsern Anse Royale, Mont Fleuri, Grand Anse Praslin, Grand Anse Mahe, St Louis, Glacis, La Digue, Roche Caiman, i sa 8 distrik *so far* ki bann komitman ki ti'n ganny fer in delivre, si pa antyerman, preski antyerman.

(APPLAUSE)

MINISTER SYLVESTRE RADEGONDE

Nou annan, nou annan lezot ki ava swiv byento. E nou espere nou - anfen plis ki nou *hope*, nou determinasyon se ki *by the time* bann Konsil i vin isi lannen prosen, nou le ki tou sa *commitment* in fini ganny delivre, e nou a kapab travay lo en nouvo programm avek bann diferan distrik. Mersi.

MR DEPUTY SPEAKER

Mersi *Minister*. *Ok*, aköz sa *heading* ti ziska 3er i annan 2 dernyen lanmen ki'n leve. Mon pa pou aksepte ankor sa zafer *at the last minute*. Onorab Pillay apre en Manm *LDS* Onorab Romain ki'n lev lanmen. Onorab Pillay, *proceed*.

HON SEBASTIEN PILLAY

Mersi Mr Chairman. An 2023 nou ti vot en Bidze R128 milyon 334 mil pou Departman *Foreign Affairs*. An 2024 nou pe ganny demande pou vot en Bidze R154 milyon 369 mil.

Ki fer ki ou annan ou en logmantasyon apepre R26 milyon pou Bidze *Foreign Affairs*. Prezan lo larepons ki Minis in donn mwan, e ler mon pe regard bann logmantasyon *across* bann diferan *heads*, e mon war sa misyon *New York* in ogmant par R3 milyon.

E bann larepons ki ou pe donn nou, ou pe dir ek nou koumsa poudir ou pa pou al pli lwen, ou pou eksplik pozisyon Sesel eksetera. Sa i ou prerogativ koman Minis. Me selman larzan *taxpayers* ki peye pou ki *Foreign Affairs* i fonksyonnen.

Mon ti a kontan ou eksplike, kwa ki fer ki ou Bidze in ogmant sitan signifkaman? E eski ou pa krwar poudir ou dwa Lepep Seselwa en meyer leksplikasyon, kan ou Minister i pran en desizyon lo son *behalf*?

Akoz sa ti kapab en desizyon ki ti'n kapab ganny pas atraver Lasanble Nasyonal osi. Si i ti en pozisyon ki nou pei pe pran. Si i vin en problemm pou Gouvernman

kapab pran en pozisyon lo la, ki i pa oule ofans serten pouwar dan lemond.

I ti kapab en pozisyon, me ki nou pe war, nou pe war poudir i annan en totalman en *bypass* Lasanble Nasyonal lo bann desizyon ki Gouvernman i oule pran. Lo en pwennvi zafer etranzer, zis par egzanp sa size Marie Louise.

Kot nou'n preski fini kaziman agree pou nou al met en prizon Marie Louise, san ki Lasanble Nasyonal i fini pronons son lekor lo la. So kekyon ki nou bezwen demande Mr Chairman, se ki akoz - konvenk nou pou ki rezon nou bezwen - akoz lannen pase nou ti vote pou ou Bidze.

Konvenk nou pou ki rezon ki nou bezwen vot sa logmantasyon R26 milyon dan ou Bidze. Kan nou pou annan en Anbasader, ki lo *basis State House* pou lev telefonn pou *call* li poudir li,"anr, be la pa ale pou vote."

I mean, mwan pou mwan, mon war sa i annan - nou annan en *serious flaw* dan nou sistenm, si i pou mars koumsa. Nou bezwen kapab ekspekte nou bann Diplomat pou fer bann desizyon ki serye ki baze lo sa ki zot in war dan la diplomasi pe pase.

Mon pa war li i fer sans sa leksplikasyon ki ou pe donn nou. E mwan, mon krwar poudir ou bezwen kapab eksplike, kwa ki sa larzan pe donn nou dan sa Lanbasad.

E kwa ki sa logmantasyon pe donn nou pou Departman *Foreign Affairs*? E mwan si kote *LDS* in vin en bann *yes men* e zot aksepte tou keksoz, nou, nou pa koumsa nou Mr Speaker, *sorry! Sorry!*

MR DEPUTY SPEAKER

Mersi Onorab Pillay. Lakizasyon *yes-men*, pa *yes-men* sa kekyon letan ki sa vot ti pran ti pou en bon, en bon kekyon pou en *PNQ* dan Lasanble. Malerezman i pa ti vini be Minis selman si ou annan en larepons pou *provide* akoz sa i ti pou en kekyon enteresan pou Lepep Seselwa konnen.

Be *by then* i pa'n vini la prezan ozordi sa Bidze in napa nanryen pou fer ek sa vot. Solman pou en dernyen fwa mon ava permet Minis pou eksplik *whatever* ki i kapab eksplike. Mersi.

MINISTER SYLVESTRE RADEGONDE

Mr Chairman, mersi. Mersi Onorab. Onorab, mon oule -

mon ti a voudre konpran ki egzakteman ou problemn?

(laughter)

MINISTER SYLVESTRE RADEGONDE

Parske-parske mon pa, mon pa konpran. Eski problemn i avek vot, eski problemn i avek metod ki nou'n vote, ouswa problemn i avek sa logmantasyon?

Si problemn i avek logmantasyon, oule zistifikasyon lo konbyen, akoz i annan sa logmantasyon, si ou ti dan lasal ou ti a tande ki mon ti dir. Mon ti dir i kouver, i kouver 10poursan logmantasyon dan saler de baz ki'n ganny anonse.

Mon dir i kouver revizyon dan kad servis pou bann travayer ki donn sipor, parey bann travayer atraver bann lezot Minister. Mon dir i pou kouver lanplwa - abzorbsyon si oule bann *housekeepers* ki pe sorti anba *Cooperative* depi apartir Zanvye 2024.

Mon dir pou kouver konferans bann Konsil Onorer, ki nou pou fer lannen prosen parey nou fer tou le 2 an. E apre mon'n dir pou kouver depans asosye avek prezidans Sesel Komisyon Losean Endyen ki nou pou pran apartir Me.

Vwala bann zistifikasyon, ki mon ti donnen. Mon pa konnen ki oule an plis ki mon dir. Mersi Mr Chairman.

MR DEPUTY SPEAKER

Mersi *Minister*. Dernyen entervenans lo sa *heading* Onorab Romain.

HON GEORGES ROMAIN

Mersi Mr Chair. Minis, bonn apre midi ek ou delegasyon. Mr Chair, mon ti anvi zis fer en pti remark osi tou dan lepase, anba ansyen Gouvernman ti annan *bus shelter* ki ti par lao R3 milyon osi ti arive dan sa pei, en?

(APPLAUSE)

HON GEORGES ROMAIN

Mon kestyon-mon kestyon Mr Chair, pou Minis, e mon war anba program *1 office building rent*, mon war ki pou 2023 ti R2.1 milyon. Me par kont 2024 i zis R789 mil, si Minis i kapab zistifye akoz sa gran rediksyon? Akoz mazorite bann Minister i annan ogmantasyon napa *reduction*. Mersi Mr Chair.

MR DEPUTY SPEAKER

Mersi Onorab. *Panel?*

PS VIVIANNE FOCK TAVE

Onorab, wi, sa i plito pou Lanbasad nou *High Commission* Lonni ki dan le dan le pa - nou'n dekouven ki i ti annan en fot. Nou ti pe donn zot en pti plis larzan e la nou'n rektifye sa la prezan, wi.

MR DEPUTY SPEAKER

Mersi *PS*. Donk, napa ankor lezot entervansyon lo sa *heading* nou ava eskiz delegasyon *Foreign Affairs* avek nou. Mon konpran poudir delegasyon Minister Departman Tourizm in arive, so nou ava apel zot.

Akoz nou pou pran vot en sel koman en Minister. Donk, nou ava remersi Anbasader Fock Tave, Manmzel Germaine e osi Madanm Banane. Mersi pou zwenn nou apre midi. Bonn kontinyasyon lazournen.

DEPARTMENT OF TOURISM

MR DEPUTY SPEAKER

Nou ava dir bon apre midi e byenveni dan Lasanble Nasyonal *panel* ki fek zwenn nou. Se bann zofisyé sorti dan Departman Tourizm delegasyon i touzour dirize par Minis Sylvestre Radegonde Minis pou Zafer Etranzer e Tourizm.

In fek ganny zwenn par Madanm Sherin Francis ki Sekreter Prensipal pour

Departman Tourizm; Manmzel Jenifer Sinon ki Direkter Zeneral pou Resours Imen ek Ladministrasyon.

Mr Terence Max ki Direkter *Seychelles Tourism Academy* e Mr Don Julie ki *Financial Controller*. E avek nou touzour sorti kot Minister Finans i annan SS Payet avek Manmzel Adrienne ki *Senior Finance Analyst*.

E nou pe konsider Departman Tourizm ki lo paz 412 a 420. Nou ava envit Minis pou fer lentrodiksyon ek sa i ava swiv par enteraksyon bann Manm.

MINISTER SYLVESTRE RADEGONDE

Mr Chairman, avek ou permisyon, petet nou ti a pran Bidze Departman *Tourism proper* apre si i neserer nou a pas pou *Tourism Academy*.

MR DEPUTY SPEAKER

Selman si mon konpran i napa en sel alokasyon?

MINISTER SYLVESTRE RADEGONDE

Mon pe zis *seek* ou gidans mon, mon *ok* si nou pe fer en sel.

MR DEPUTY SPEAKER

Wi.

**MINISTER SYLVESTRE
RADEGONDE**

Ok Mr Chairman. Onorab *Leader* Lopozisyon, Onorab *Leader* Zafer Gouvernman, tou bann Manm Onorab tou dimoun ki a lekout. Pou lannen 2024, Departman Tourizm in resevwar en alokasyon Bidze R199.4 milyon.

Sa i en logmantasyon 5.1 milyon lo Bidze Revize, pou lannen 2023. Sa logmantasyon i prensipalman pou kouver logmantasyon 4.5 milyon dan saler. E 1.6 milyon dan *goods and services* ki nou kapab donn detay pli tar dan nou diskisyon.

Mr Chairman, lannen 2023 in enn ki *challenging* pou nou lendistri tourizm. Malgre bann moman lensertitid, sa lannen in zeneralman enn ki'n performan pou nou lendistri.

Ziska lafen semenn pase, lakantite viziter ki'n debark Sesel ti 300 mil 746. Se sa. Sa i reprezant en logmantasyon 4poursan lo lannen pase. Nou target pou sa lannen ki nou ladan se 348 mil viziter.

Si nanryen katastroofik pa arive, nou konfyen ki nou pou reisir atenn sa target. Kan a reveni ki zenere par sekter tourizm, e sa ki mwan, mon pli enterese lo la, i ki lakantite viziter ki debarke.

Statistik sorti kot Labank Santral, i montre ki ziska lafen Oktob nou'n rikord anviron \$790 milyon Ameriken. Sa i reprezant en rediksyon anviron 1poursan lo reveni lannen pase.

Mon bezwen dir ki lannen pase *by all accounts*, in en lannen eksepsyonnel. Konsyan bann *challenge* e risk ki nou pe fer fas avek pandan lannen, nou'n entansifye nou zefor pou nou diversifye nou bann *source market*, lo en kote e an menm tan fer sir ki nou rod tou fason pou fer touris depans plis dan nou pei, par diversifye bann aktivite ki nou annan isi.

Ler mon ti pran sa responsabilite 3 an pase, mon ti pouse pou nou annan en program *cultural* pou sa *community tourism*. Mon kontan ki nou'n fer progre pandan sa lannen, malgre de fwa nou pa'n al osi lwen e osi vit ki mwan personnelman mon ti a swete.

Nou'n kree en nouvo *brand* 'Creole Rendezvous' sa *brand* i regroup bann leksperyans kiltirel atraver pei, pou asire ki viziter i dekouver plis nou bann atou kiltirel, ensi ki depans plis. Nou'n organiz 9 bazar 4 La Digue 3 Praslin e 2 Mahe. An plis ki sa nou'n anrezistre 17 lezot leksperyans kiltirel lo sa program.

E sa i dan bann plizyer distrik. En nouvo paz ki nou apel li 'Kot Ki Bon' ti osi ganny lanse sa lannen. Sa i donn viziter akse ek bann lenformasyon lo tou bann aktivite leksperyans dan pei.

Pou fer sir ki zot annan keksoz pou fer e eksperyanse pandan zot vakans e maksimiz loportinite pou zot depanse. Nou priyorite, se pou nou kontinyen ogmant demann pou bann viziter avek plis mwayen pou depanse. E kree mwens lenpak negativ lo nou lanvironnman.

Annan en lof touristik ki de ot kalite ki diferan e ki diversifye. Annan en lafors travayer konpetan pou nou lendistri tourizm. Vwala nou bann priyorite.

Mr Chairman, pandan lesanz ek Manm Onorab, mon lekip e mwan menm nou a ganny loportinite pou koz lo bann plizyer aktivite ki departman in enplike ladan.

E mon dir zot i annan en kantite aktivite ki nou'n fer sa lannen. Pou konklir, mon le zis fer en pti rapel tou dimoun ki sa lendistri tourizm, i enn ki konpetitiv e frazil.

Sa lendistri i bezwen reste konsern sak Seselwa, e nou bezwen travay ansanm nou tou, pou nou prezerv li e devlop li.

Mon rekomann sa Bidze avek Lasanble Nasyonal. Mon remerci ou Mr Chairman.

MR DEPUTY SPEAKER

Mersi Minister. Mon konnen i annan bann Manm ki ti'n lev lanmen ansanm, e i tre probab ki i annan ki mon'n manke. So *far* lo lalis i annan 6 Manm ki'n endike ki zot le entervenir.

I annan 2 Manm lo kote US Onorab Loze ek Onorab Lemiel. Lo kote LDS mon'n not Onorab Mondon, Romain, Labonte avek Zailor. Mon pou donn laparol premye Onorab Lemiel, akoz ou ki ti'n demann premye.

Larestan kit zot lanmen anler pou mwan pa mank personn.

HON SYLVANNE LEMIEL

Mersi Mr Chair. Nouvo delegasyon Minis, bonn apre midi. Minis, mon ti a kontan konnen dan zot program 4 sa i konsern *marketing* bann destinasyon.

E mon konnen dan lepase zot ti annan bann dimoun, kot zot ti plas dan sa pei kot zot ti anvi fer sa *marketing*. So, sa bann dimoun ti ganny *call back* dan pei, akoz mon panse zot ti pe dir 2020, napa larzan COVID.

Eski ozordi la, nou'n re anvoy sa bann dimoun dan sa bann lofis kot zot ti'n frenmen? Akoz mon war poudir an 2023 ti annan 100.4 milyon bidzete anba destinasyon *marketing*.

E an 2024 zot pe al met li 105.9 milyon. Savedir i annan en ogmantasyon. So eski zot pe mazin al re ouver ankor serten sa bann lofis kot zot pou plas dimoun laba?

Or ki fason zot pe fer mon ti a kontan konnen sa ogmantasyon petet akoz? Mersi.

MR DEPUTY SPEAKER

Mersi Onorab. Mon ava envit *panel* pou en leksplikasyon.

PS SHERIN FRANCIS

Onorab, mersi pou ou kestyon. Mr Chair, avek ou permisyon. Anfet sa logmantasyon ki ou pe war i pou al direktman anver *marketing* li menm. Wi, i annan *staff* ki ti ganny fer retournen *head office* pandan bann letan *COVID*.

I annan ki'n bouze ki'n retourn dan *market* - parey Langleter i enn. E nou ankor pe evalye avan nou fer okenn *staff* retournen. Nou toultan evalye kou. Apre nou osi regarde par egzant bann *staff* ki baze isi, zot ankor *still* kapab pe fer zot louvraz efektivman.

Ler zot bezwen bouze, pou zot egzekit zot bann aktivite, zot ankor *still* pe kapab fer li. E nou toultan evalye kou konbyen i kout nou pou zot deplase. E konbyen ki i pou kout nou si nou pou remet zot osi dan marse.

I en legzersis ki nou pou kontinyelman pe fer si nou war le nesesite pou nou remet en *staff* lo marse nou pa pou ezite fer li.

Si nou bezwen fer li pou Bidze 2025 nou anmenn en propozisyon kot Minis pou konsidere. Mersi.

MR DEPUTY SPEAKER

Mersi PS. Onorab Mondon?

HON TERENCE MONDON

Mersi Mr Chair. Mon kestyon i konsern *recruitment*, *recruitment*. Nou konnen ki zot in perdi plis ki 2 milyon sa lannen akoz zot in ganny *delay* pou zot fer *recruitment*.

Mon anvi konnen ki provizyon zot annan la pou *recruitment* lannen prosenn? E kote zot ete ek sa ki zot pos ki zot pa pe ganny dimoun pou *fill*? Mersi Mr Chair.

MR DEPUTY SPEAKER

Mersi Onorab Mondon. *Panel*?

PS SHERIN FRANCIS

Mersi Onorab pou ou kestyon. Anfet, wi, nou'n ganny en pe *delay* lo konmansman pou lannen pou *recruitment* serten bann pozisyon. Me selman nou pe finaliz tou nou bann *recruitment* la.

Actually, tou bann *interviews* in fini ganny fer. So nou dan prosedir *recruitment* la. Nou pou komans lannen avek tou nou bann pozisyon pou'n ranpli fotespere.

MR DEPUTY SPEAKER

Mersi PS. Ou - i annan keksoz ki-?

PS SHERIN FRANCIS

Kekfwa zis lo kote *STA*. I annan nou pou annan en pti pe plis *delay*. Me selman lo kote *Tourism Department* nou pou'n fini ranpli par komansman lannen sa bann pozisyon. Mersi.

MR DEPUTY SPEAKER

Ok Onorab Mondon. Ok, mersi *panel*. Mon ava pas laparol avek Onorab Loze.

HON JOHAN LOZE

Mersi Mr Speaker. Mr Speaker, dan Bidze 2023 nou ti war lentrodiksyon serten provizyon taks ki ti target spesifikman lendistri tourizm Sesel. Bon rezilta sa bann zafer *has been a*

bit of a mixed bag; i mete i tire – *that's neither here nor there*. Pa sa bout ki mon enterese avek ozordi.

Resaman lo televizyon nou ti war sa Mr Peter Sinon, ki ti koz lo en keksoz ki mwan pou premye fwa mon pa ti'n mazin en lo la, ki mon anvi kestyonn zot lo la. Mr Sinon, ti dir an Septanm son letablisman ti vid li. E keksoz enteresan ki in dir, i dir kliyan ti war sa bann taks koman en *scam*.

Or zot in enterpret sa koman en *scam*, alors zot in resevwar *cancellation* sirtou bann pti letablisman, akoz bann kliyan in en pe sansib. Zot in santi ki i annan en *scam* ti pe ganny *perpetrated* lo zot.

Now, mon anvi konnen, eski Departman Tourizm zot okouran? E eski zot pe *roll out* en plan pou defann repitasyon Sesel. E apropte sa keksoz konmsi *basically*, akoz li Mr Sinon, ki ti pe dir i fason ki sa in ganny *rolled out*, e kominike ki prezan bann kliyan i zis krwar *basically* i annan en *scam*, ki pe fer lo zot. Mersi Mr Speaker.

MR DEPUTY SPEAKER

Mersi Onorab. *Panel* i annan en larepons pou sa kestyon.

MINISTER SYLVESTRE RADEGONDE

Mr Chair, mersi. Mersi Onorab pou ou kestyon. Regarde, mon a evite pou mon koz lo en ka spesifik Mr Sinon. Parske i annan lezot keksoz ki - lezot lenformasyon e petet sa pa *forum* pou mwan partaze.

Me en keksoz ki mon dakor - mon dakor ozordi ki nou kominikasyon konsernan sa taks ti kapab meyer. *There's no doubt about it.* I ti kapab meyer. Me selman ozordi ler mon pe koz ek bann partner, parske *since then* mon'n fer plizyer deplasman aletranze.

Mon'n zwenn plizyer partner dan bann gran lafwa e aryer, e mon fek sorti 2 semenn pase mon ti Lonn pou *World Travel Market*, kot nou'n zwenn bann lezot partner. Ozordi tou dimoun i konfortab avek sa taks.

E bann *forecast booking* ki nou pe regarde pou bann mwan ki pe vini, *at least* bann premye mwan lannen prosen, tou i tre konfortab. E mon le dir an pasan ki sa taks isi ki nou nou'n mete dan larezyon nou pa tousel. I annan lezot pei osi ki'n mete.

E mwan ler mon koz ek dimoun, dimoun i konpran lobzektif sa taks. Byensir zot

pou le war spesifikman kote i ale, sa nou'n dir nou pou fer.

Me Onorab, ler mon pe koz ek ou la, mwan personnelman mon napa konsern. Me mon parey mon'n di -r mon krwar *we could have been better* dan nou kominikasyon.

E la ankor en lot keksoz ki mon krwar nou, nou a fer meyer pou laprosenn fwa. Mersi.

MR DEPUTY SPEAKER

Mersi *Minister.* Onorab Romain.

HON GEORGES ROMAIN

Mersi Mr Chair. Minis, ankor enn fwa bon apre midi ek ou nouvo delegasyon. Mon kestyon pou tous en pti pe lo kote *marketing*, an vi ki nou konnen dan Izrael ek *Palestine* i annan lager laba.

E nou konnen pou le moman *Air Seychelles* pa pe anvol laba. E nou'n ganny dir ki *Air Seychelles* i reprezant touris Izraelyen i reprezant 5poursan an term touris ki vin Sesel.

E la Minis pe fer sorti ki nou pe met nou target, e definitivman ti touris Izraelyen pe antre, mon mazine ki nou ti pou fer li en pti pe pli vit.

Ler mon pe get bann *cost* ki annan dan *marketing*, mon pe war pou kote Izrael pou 2023

ti 1.5 e 2024 i 2.5. E mon pa pe war vreman mon pwennvi pou mwan ki sa pou *pick up* ase vit.

Alors ki mon pe demande Minis, ki vreman lo kote *tourism* pe fer pou travay en pti pe pres ek *Air Seychelles*. Pou kekfwa *at least* ed li en pti pe pou li kapab *tap* dan en lot *market*, ki i kapab itiliz son avyon ki pou le moman i pa pe anvol Izrael? Sa en pti pe mon kestyon. Mersi Mr Chair.

MR DEPUTY SPEAKER

Mersi Onorab. *Panel?*

MINISTER SYLVESTRE RADEGONDE

Mr Chair, mersi. Mersi Onorab, pou ou kestyon. Mon a fer en remark zeneral e apre mon a pas laparol avek *PS*. Pou mwan dir ki war sa problemn Izrael, parey problemn *Ukraine* e demen petet i ava annan en lot, en lot landrwa, kot i vreman montre nesesite, ki i pa kapab met tou nou dizef dan en sel pannyen.

E mon konnen - mwan depi ler mon'n Minis, mon konnen presyon ki serten dimoun i vini i mete, i dir ou, - be regarde, nou'n abitye depan lo Lerop par egzanzp, akfer ki ou pe depans larzan al get lo lezot marse. Annou *focus* met *le paquet* (parey Franse i dir) lo

Lerop pou nou ganny maksimonm.

I pa pe marse koumsa. Mon krwar i kler ozordi ki nou bezwen diversifye nou marse - en mannyer ki ler en problemn i arive dan en landrwa, ou kapab depan lo en lot.

Annandler i pa neseserman zis lager. I annan osi problemn ekonomik resesyon. Ozordi Langleter mwan, mon konnen tre byen, i dan en gro problemn ekonomik.

Angle pa pe vin dan sa kantite ki nou ti a espekte. Donk, nou pe depan lo lezot market pou kapab konpans sa ki nou pe manke.

Partenarya ki se swa avek *Air Seychelles* ou lezot *airline*, nou annan en program aktiv avek tou bann *airline*. Me mon a les *PS* koz lo sa size. Mersi.

PS SHERIN FRANCIS

Mersi Mr Chair. Onorab Romain. Anfet nou, nou an diskisyon aktiv avek *Air Seychelles*, pou nou kapab annan detrwa *charter* lo Lasin.

I ase aktiv sa konversasyon e ki nou kapab petet tre byento annan en lanonsman lo la. Anfet Lasin i enn bann marse, ki nou pe reget de pros ki depi ler in reouver nou pe komans war lentere in bokou ek manze.

E apartir Desanm nou pou war en pe plis vwayaz osi sorti Lasin pou konble en pe sa lespas. Sa Bidze ki ou'n war, nou ti planifye li avan lager ti deklare.

Me byensir nou bezwen reste proaktif ler i annan bann keksoz ki devlope nou, nou bezwen repriyoritiz nou finans, pou nou ganny maksimonm retour. Mersi.

MR DEPUTY SPEAKER

Mersi PS. Onorab Cosgrow.

HON WALLACE COSGROW

Mersi Mr Chair. *Welcome PS* avek ou tim. Minis, mon kestyon i en plizoumwon Polisi stratezi, en? Nou souvandfwa nou tann sirtou bann zofisye Minister nou koz lo en *tourism haut de gamme* si oule.

E nou ti tann nou Prezidan lot fwa lo en program *BBC* si mon pa tronpe, ki'n dir ki Sesel nou pa pe viz ver *backpackers*. Nou pe viz ver bann touris en pti pe pli o, pli *haut de gamme* ki annan plis larzan.

Me mon konsern Minis, i se ki si ou asize ou get nou, ou get nou bann letablisman Sesel, mazorite nou bann letablisman se bann pti letablisman bann *guest houses*, ki pa neseserman

- ki pa neseserman bann *5 star establishments*.

E bokou zot, zot depan lo stratezi Minister, stratezi *STB* pou kapab ranpli zot bann lotel. Me si stratezi li menm, nou pe donn en sinyal ki nou le zis dimoun ki annan larzan *or* dimoun ki annan en pti pe pli eze, pou mwan, mon war i *conflicting*, an term stratezi avek la kalite letablisman ki nou annan.

Mon pa pe dir ou sa bann letablisman pa bon, me selman mon pe dir ki zot pa lo sa nivo parey ki nou pe prese.

Me selman zot, zot dan en nivo kot ou kapab aksepte kantite touris *all over the world*. E konparab bokou avek bann lezot letablisman avek lezot pei ki petet *3 star*, *2 star* ki donn bann bon servis.

Now, eski zot annan en lide re re aliny zot stratezi *or* re aliny zot bann *PR* anver zot stratezi? Pou ki dimoun i ava ganny plis en pe plis konfyans dan lafason ki Sesel pe *market - I mean STB ek Tourism pe market* Sesel. E sirtou pe *market* zot koman bann pti letablisman?

So, sa i enn. Mon napa 2 kestyon

(comments off-mic)

HON WALLACE COSGROW

... ekoute, ekoute konmsi sa i enn dan sa laliny. Akoz ankor an term Polisi e kominikasyon Minis in dir i ti a voudre ki i ti pli mye. Sirtou an se ki konsern taks, eski zot prepar zot an term Polisi ek kominikasyon, zot prepar zot byen davans, avan ki zot entrodwir bann diferan Polisi?

Par egzanp *bed tax* i enn, eski zot prepar zot davans pou kapab enform sa lendistri, avan ki zot pran sa bann desizyon? Mersi. Si ou konpran mwan.

MR DEPUTY SPEAKER

Mersi Onorab. *Panel.*

MINISTER SYLVESTRE RADEGONDE

Mr Chairman, mersi. Mersi Onorab, pou ou kestyon. Msye Onorab, an sa ki konsern bann pti letablisman, mon a dir ou si i annan en Minis ki konn byen bann pti letablisman, se sa enn ki la devan ou. Bann Onorab dan Lasanble zot konnen mon envit zot lo bann vizit.

Mon'n fer vizit dan plis ki 300 pti letablisman, pti letablisman. Annandler mon tandé, mon dan bann gran lotel sepa kwa. Si i annan en Minis osi ki pa frekant - ki pa al pas

wikenn dan gran lotel, se sa enn.

Mon bann pti letablisman, i ganny mon sipor total toultan; i ganny sipor mon departman. Nou *focus* i lo la. Akoz nou *focus* i lo la annandler petet mon pli dir avek zot.

Mon pli dir avek zot, ler mon ale, mon war ki standar pa a nivo ki zot devret ete, parske zot dan biznes zot pa mon, mon pa *run* biznes. Nou, nou set Polisi. Me mon ti a voudre war zot *successful*.

Parske ozordi dan Sesel, sa bann pti letablisman pti *guest house, self-catering*, zot reprezant plis ki 50poursan nou kantite lasanm dan sa pei.

So napa en rezon pou nou gard zot deryer, pa pous zot. Nou pe fer tou pou nou travay. Mwan dan mon bann vizit ki mon'n fer lo tou le 3 zil, mon sirprann sa kalite letablisman ki nou annan. *Very high quality.*

I annan en bann bizou dan bann distrik. Mon'n ale dan distrik Anse Boileau, distrik Anse Royale avek Onorab Lemiel. E bann lezot distrik. Fantastik. Ofet si mon annan en problem ozordi avek serten antre zot, se ki mon krwar zot pe vann zot prodwir tro bon marse.

I mank zot sa konesans dan zot *marketing*, dan lavant zot prodwir. E sa nou pe travay lo la. Nou'n met ankor en program pou nou pous ankor lannen prosen, ansanm avek sa lasosyasyon, ki in fek formen, pou nou donn zot plis bagaz pou zot vreman efikas dan biznes ki zot fer. So, nou bezwen kontinyen sa travay pou zot avanse. I dan nou lentere nou tou.

Ki nou pe dir dan *tourism* nou - dan Departman *Tourism* ki mwan, mon dir? Ki nou dir ek tou nou bann partner? Nou le touris ki kapab depanse.

Sesel i pti; Sesel i pti nou pa pou kapab vin en *mass tourism destination*, parey mon pa pou nonm non dizon 2 ou 3 nou vwazen dan larezyon. Nou pa pou kapab zanmen koumsa e se sa nou bann problem.

Se ki aköz nou napa lamas - napa sa kantite *airline* ki oule vin Sesel. Parske zot napa ase dimoun pou ranpli avyon lo en baz regilye. Nou dir nou le viziter ki kapab depanse. E i annan osi tan ki posib mwens lenpak lo lanvironnman.

So, an Angle nou dir *high income, high yield low impact tourism*. Be touris depanse i osi depanse dan sa bann pti landrwa. Li osi kapab depanse.

Mon'n fer komanter dan lepase ler mon dir an pasan, kot mon'n koz lo bis piblik, aköz kot mon'n koz lo *take away*. Mon krwar mon mesaz in ganny mal konpran. Mon ankouraze ki touris i vwayaz par bis piblik.

Me selman mon dir annou fer atansyon, bis piblik ou ek mwan ki *subsidise*. Fodre pa ki sa i vin mwayen transpor touris. E en touris ki le koman en leksperyans, pran en bis al fer letour. Mon dakor.

Me sa ki mwan, mon oule personnelman dekouraze, se ki sa touris pa fer sa koman son sel mwayen transpor. Parske si non nou pou pey li, nou pe pey li pou li vin pas son vakans isi. I menm zafer.

Ki en touris i le al dan en *take away* ki byen, i donn en manze Kreol otantik ki nou ankouraze ki zot fer. Me nou pa oule ki touris son sel pandan 2 semenn vakans, i le de, depans zis R75 lo en bwat manze. Ou konpran mwan?

Alor nou dir koman en leksperyans, wi, me konmsi fodre pa i sa kalite touris. Ou konpran? *Nuances* ou a dir parey Franse i dir me se sa ki nou pe dir. Nou le touris ki kapab depanse, parske i nou lendistri prensipal.

Tou sa bann lenfrastruktir ki nou annan, nou bezwen

touris; bezwen reveni ki i kapab depans lo la. Vwala Onorab. Mersi.

MR DEPUTY SPEAKER

In demann en kestyon lo zafer avan lanons bann Polisi sorti kominikasyon *PR*.

MINISTER SYLVESTRE RADEGONDE

Kominikasyon Onorab, i tre enportan. Ou konnen osi byen ki mwan i tre enportan. Eski nou ganny li toultan *right*? Non. Nou pa ganny li toultan *right*.

Nou sey fer mannyer nou dans *la mesure du possible* nou partaze lenformasyon nou kominike. Mon krwar preski tou le mwan mon zwenn avek Lasosyasyon Lotelri. I annan detrwa semenn la mon pa ankor zwenn zot. Me nou zwenn. I en *forum* pou nou lesanz lenformasyon, me nou fer li.

Eski nou toultan tonm dakor? Non. Me i annan pas lenformasyon. I annan diskite, ganny pwennvi apre kwa ki ou fer avek sa ki ou gannyen.

Nou eseye nou pou nou fer nou maksimonm. Sertenman *tourism* dan tou nou bann konpanyi ki nou fer, nou fer en zefor spesyal pou nou kominike, pou nou pas lenformasyon. Mersi.

MR DEPUTY SPEAKER

Mersi *Minister*. Onorab Labonte.

HON ANDY LABONTE

Mersi Mr Chair. Mr Chair, mon kestyon i baze plizoumwon lo *STA*, mon pa konnen si i pou *ok* pou mwan demann la. I *ok*?

MR DEPUTY SPEAKER

Akoz *STA* Mr Max pe asiz laba dan kwen. Annou rezerv sa enn la. Si i bezwen sanz en dimoun lo *panel*. Ou ti annan zis lo *STA*? *Ok? Then we'll proceed to* apre nou ava retourn kot ou.

Onorab Zailor, ou osi *STA*? Onorab Larue.

HON FLORY LARUE

Bon apre midi Mr Chair. Bonn apre midi Minis ek ou *panel*. Minis, lefe ki ou'n koz lo ki nou pa le vin en destinasyon ki baze lo *mass tourism*, e nou'n war ki kantite touris ki pe vin Sesel pe ogmante;

Eski Minister in pran en desizyon lo met *ceiling* lo ki kantite touris ki Sesel i anvizaze akeyir? E si wi, kan ki nou pou annan en diskisyon nasyonal lo sa pou tou dimoun konnen kote nou tonbe, lefe ki nou en pei ki depan prensipalman lo tourizm. Mersi.

MR DEPUTY SPEAKER

Mersi Onorab. *Panel?*

MINISTER SYLVESTRE RADEGONDE

Mersi Mr Chairman. Mersi Onorab pou ou kestyon. Lannen prosen nou pou al fer en letid lo la. Sa i en diskisyon ki nou bezwen gannnen. Nou bezwen ganny li ase vit, pou nou konnen ki direksyon nou pe ale.

Ozordi ler mon get *occupancy* lo nou bann diferan letablisman, pou konmela nou annan 700 ekek diferan letablisman touristik. Ya, ki fer nou kantite lasanm apepre 14 mil, *ok?* Mon get lo *occupancy* nou sa lannen i 48poursan - 48poursan an zeneral.

I annan bann letablisman ki fer tre byen. I annan ki me an zeneral i 48poursan. Ou war, i vedir ki *somewhere* i annan en kantite lasanm ki la, ki pa pe ganny vann - pa pe okipe.

Eski nou kontinyen konstrir, ouswa nou dir annou tyonbo en kou, annou sey fer manner vann sa bann ki nou annan. Apre *move on*. Sa i en diskisyon ki nou le gannnen dan en fason aprofondir lannen prosen.

E byensir Lasanble Nasyonal i ava *involve* dan sa diskisyon. Mersi.

MR DEPUTY SPEAKER

Mersi *Minister*. Onorab Pillay?

HON SEBASTIEN PILLAY

Mersi Mr Chairman. Mwan, mon annan en konsern vizavi ou Bidze e bann stement ki ou'n fer avek nou dan Lasanble. Annefe ou'n koz lo *occupancy*, e mon oule *relate* sa avek sa Bidze ek sa larzan ki nou pe al depanse.

E sa *yield* ki nou pe gannnen avek *tourism*. *So it has to be* nou bezwen koumsa. *Yield* i bezwen an proporsyon ek depans ki nou pe fer. So lannen prosenn nou lentansyon se depans apepre R199 milyon.

Miz apar sa ki nou pe met dan *STA*, i *still* lenvestisman dan *tourism*. Ler nou get ou, ou *occupancy* ou *48percent* - savedir ou pe koz mon 6, 720 lasanm.

E dan sa 6,720 lasanm nou konnen poudir 60poursan ladan si nou swiv *trend*, 60poursan ladan i bann pti letablisman. Savedir i annan en problem kot ki pe arive ant *capture* lenformasyon dan sa ki pe pase, dan bann gran letablisman.

Eski i annan en *failure* pou *capture* lenformasyon? Eski i annan en *failure* - mon ti a kontan petet Minister Finans i ed nou ek sa, pou ranmas

larzan avek bann gran letablisman, akoz pou mwan i annan en, i annan en matematik ki pa pe azoute la.

Currently nou annan nou *around* 60poursan bann pti letablisman. Ou ava agree avek mon ki *they* form lamazorite nou bann, nou kantite lasanm - *yeah*. *Around let's say* nou pe koz 50poursan lo 14 mil i vin 7 mil.

So, 6,720 nou pe koz lanmwatye sa - nou pe koz nou pe koz *another* 3 mil, 3 mil, 3,350 i dan bann pti -bann pti letablisman. Be selman nou sipoze annan bann gran, gran lotel isi nou; bann gran *chains*.

E nou ki pe met larzan pou *market* sa destinasyon ki zot, zot pe servi pou ganny touris avek, e ki apre nou pa pe ganny *yield out of it so the fundamental question which begs itself*.

Se ki eski nou pe ganny *value for money* dan lenvestisman ki nou pe fer dan *tourism*, pou nou kapab anmenn touris isi, pou nou kapab depanse? E pou nou kapab anmas larzan avek?

Akoz zis lo *destination marketing* nou pe al depans apepre 105 milyon - 105 milyon lo *destination marketing*?

So pou mwan, mon pe, mon ti a kontan ou eksplik nou

sa. *And then* zis an pasan mon ti a kontan ou klarifye sa. Si par egzanzp i Prezidan Larepiblik ki al fer en stement lo en medya enternasyonal, e li ki fer sa stement ou pa krwar sa i *end up* vin *misleading*?

Petet nou devret *advise* Prezidan pou aret fer sa bann kalite stement, e les-e les bann profesyonnel ki dan *tourism* fer bann stement ki devret ganny fer. Akoz li ki debalans sityasyon.

E probableman se li ki'n kree bann konfizyon, otour sa bann nouvo taks ki pe ganny entrodwir. Le problem se ki Lasanble i bezwen kapab asire ki si nou pe vot en Bidze R199 milyon, nou pe ganny *value for money*.

E nou pa pe zis vot en Bidze pou Minis pou al *travel* al dan pei, al isi al dan laba e nou pa pe war rezilta. E zis pou fer en legzanp Mr Chairman, Minis ou dir nou Langleter i annan en problem, be nou pe al reouver en lofis Langleter la nou, to *the tune of around* plis ki R200 mil me selman nou annan en *High Commission* Langleter, non?

Si nou'n retire, mon pa konnen akoz nou'n retire. I tou bann desizyon ki Gouvernman in pran, pou nou kapab sey ganny en konpran ki akoz nou bezwen fer sa depans, e ki pe

arive akoz nou pa pe anmas sa larzan?

Petet ou kapab demann Minister Finans pou ed nou, pou kapab klarifye, akoz nou pe anmas sa kantite larzan. Ou'n dir nou lpoursan an mwens, nou ganny plis touris, nou anmas mwens larzan? Nou annan en problem. Mersi Mr Chairman.

MR DEPUTY SPEAKER

Mersi Onorab. Zis pou rapel bann Manm, ki nou pa pou kapab demann kestyon ki nou pa kapab *substantiate*. *Order 36(c), 36(1)(c)* i dir nou sa; par egzanj zis pou fer en lakizasyon vizavi Prezidan, ki probableman in dir sa nou pa kapab *substantiate*, nou pa merit fer bann kalite deklarasyon koumsa koman Manm Lasanble, akoz i kont nou *Standing Orders*.

Donk, nou ava envit *panel* pou fer en, pou fer en-

HON SEBASTIEN PILLAY

(Off-Mic)

MR DEPUTY SPEAKER

Onorab Pillay-Onorab Pillay i dir ou *36(1)(c)* "a question shall not contain statement which the Member who asked the question is not prepared to substantiate."

Ou'n fer en lakizasyon vizavi pou dir...

HON SEBASTIEN PILLAY

Be, be mon kapab *substantiate!* Prezidan ki ti dir!

MR DEPUTY SPEAKER

Kan? Kote? Keler?

HON SEBASTIEN PILLAY

Prezidan ki ti dir!

MR DEPUTY SPEAKER

Onorab Pillay, pou dir Prezidan ti dir avek montre poudir la, la dan *NASYON* date le 9 Novanm i en lot zafer. *This is substantial*, pou *substantiate* ki mon pe koz lo la.

HON SEBASTIEN PILLAY

Be lo *HARDtalk*, lo *HARDtalk* pa Prezidan ti dir!

MR DEPUTY SPEAKER

Non-non-non.

HON SEBASTIEN PILLAY

Anr, sa ki dan medya nou pa kapab *substantiate?*

MR DEPUTY SPEAKER

Mon, mon'n ekout sa *interview HARDtalk* Prezidan pa'n koz lo *bed tax*, unless ou vini ou prouve avek mon poudir i ti koz lo-

HON SEBASTIEN PILLAY

Prezidan pa'n koz lo *backpacker* dan *HARDtalk* li?

MR DEPUTY SPEAKER

Ok unless ou fer sa, akoz si non koman Manm Lasanble, nou annan tandans zis pou dir. Be selman, *anyway*, mon pa pou al ladan...

HON SEBASTIEN PILLAY

Mon pa pou al dan en largiman avek ou mwan. Prezidan pa'n koz lo *backpacker* dan *HARDtalk* li?

MR DEPUTY SPEAKER

... mon'n fini kosyonn bann Manm lo la.

HON SEBASTIEN PILLAY

Be sanmenm sa i tro rabase!

MR DEPUTY SPEAKER

Nou ava kontiny avek larepons silvouple, mersi. SS Payet.

SS PATRICK PAYET

Mersi Mr Chair. Bonn apre midi Mr Chair. Bonn apre midi tou Manm Onorab, e tou dimoun ki pe ekoute. Kekfwa pou mwan komanse pou *advise* Lasanble ki letan nou, nou pe regard lo kote VAT, ki SRC i kolekte nou'n war ziska le 16 Novanm nou'n war ogmantasyon.

Ogmantasyon ki VAT espesyalman dan Sekter Touris ki kolekte. Me sepandan akoz nou konnen ki VAT i annan VAT *input* avek VAT *output*, savedir si i annan lotel ki pe dan staz konstriksyon, nou pou bezwen fer plis *refund*.

Me selman letan nou, nou'n *forecast* kekfwa krwasans dan lefitir 2024, sa nou pe war ki definitivman menm si pou annan VAT *input* ek *output*, i pou *significant* krwasans ladan.

E osi ki nou'n fer, nou Minister Finans avek liv Bidze, dan nou preparasyon *fiscal risk statement*, nou'n fer analiz, par egzanp bann diferan risk ki kapab egziste.

Par egzanp, si i annan sa konfli *Middle East* i kontinyen ki son lenpak sok li menm dan *makroekonomik*, e lenpak lo kote reveni ki nou kolekte.

E sa ki mannyer pou afekte *foreign exchange market*, sa osi nou'n fer sa bann analiz ki nou'n fer bann diferan senaryo. En bann senaryo konservativ e *extreme case* osi. E tousala nou'n mete ki nou'n analiz en pe ki mannyer sa i kapab enpakte.

Me sepandan sanmenm sa ki letan nou'n regard, par egzanp lo kote transformasyon lekonomi, nou'n war ki i pa zis Departman sekter touris ki

bezwen zwe sa rol, i tou bann sekter lekonomi zot osi zot bezwen zwe sa rol dan sa transformasyon.

E pou nou, nou'n war ki par egzanp Sekter Lapes ek Sekter Lagrikiltir ki mannyer nou pou kapab ganny plis larzan kolekte. E osi ki mannyer nou kapab - sanmenm sa ki par egzanp lo kote Gouvernman li menm, nou'n vin avek sa stratezi pou nou entrodwir par egzanp *tax rebate*.

Espesyalman lo kote *business tax*, pou kapab ankouraz plis dimoun plis *businessmen* al bann sekter ki nou bezwen plis sa transformasyon. So pou nou, definitivman i en travay ki ou pou war dan *medium term* ki plis sa koleksyon reveni ki nou anvi war dan mwayen term.

So, sa i en pe bann travay ki nou pe fer Mr Chair lo la. Mersi.

MR DEPUTY SPEAKER

Mersi. Onorab, eski i annan okenn pwen ki *pending*?

HON SEBASTIEN PILLAY

Mersi Mr Chairman. Mr Chairman, mon ti kontan ganny en stetment *from* Minis, Minis ki responsab pou *Tourism*. Nou pe donn li en

Bidze e nou pe fer li, fer li permet li pou al fer *destination marketing*, atraver en Bidze ki nou pe donn li atraver larzan taks. Se pou sa rezon ki nou, nou bezwen asire ki ler sa nou pe donn ou sa larzan, nou pe ganny *value for money*. E si ou satisfè poudir nou pe ganny *value for money* vizavi *yield* ki nou pe gannyen vizavi *tourism*, *then* mon napa problem.

Akoz lenpak ki ou bann desizyon pe fer i annan. Ozordi nou annan en *moratorium* lo bann nouvo letablisman, *ok?* So si sa i kontinyen dan sa direksyon, nou pou annan, nou pou annan ankor *moratorium* ki pou ganny mete. Nou pe koz *carrying capacity* - tousala i pou annan en lenpak. So, i enportan ki ou, ou lans en mesaz avek bann dimoun ki la deor.

Nou koman Lasanble ki zeran larzan piblik, pou nou demann ou sa kestyon. E mon kontan *PS* in reponn be selman i pa'n kler. Akoz mwan, mon war i annan en problem. Akoz nou pa pe anmas larzan parey nou devret anmase sirtou ek bann gran letablisman?

Ler mon pe ekout ou, bann pti letablisman pe pey pli byen ki bann gran letablisman. *So there has to be- there has to be a problem somewhere*. Se sa ki mon pe sey-mon pe sey *get to*

the bottom of. Mersi Mr Chairman.

MR DEPUTY SPEAKER

Mersi. *Minister?*

MINISTER SYLVESTRE RADEGONDE

Mersi Onorab. Onorab, si oule-si oule en stement sorti kot mwan pou dir mon satisfè ki nou pe ganny valer pou larzan lo Bidze ki nou gannyen, wi, nou ti a voudre plis.

Parske ler nou fer *breakdown*, kwa ki nou pe depanse par touris par en viziter, larzan ki nou pe depanse pou anmenn en viziter Sesel, i pa bokou. Mon krwar dernyen kalkil ki nou'n fer i apepre kwa R19, R19 *insignificant-insignificant*.

So, sa Bidze ki nou'n gannyen, nou konpran bann kontrent ki i annan nasyonal, nou *make the most of what we have. We make the most of it.* E setou ki mon kapab dir ou. Nou pou kontinyen. Nou'n fer li.

Antouka mon kapab koz sa de letan, sa letan ki mon'n la sa dernyen 3 an, nou'n fer li. Nou pou kontinyen fer li lannen prosen - pa selman pou *market* Sesel, me osi donn sipor nou lendistri isi, prensipalman bann pti letablisman ki bezwen nou sipor. Mersi.

MR DEPUTY SPEAKER

Mersi *Minister.* Prosen entervenan Onorab Woodcock.

HON WAVEL WOODCOCK

Mersi Mr Chair. Minis, mon apresye plizyer bann vizit ki ou'n fer lo Praslin, kot bokou bann letablisman touristik, *guest house*, bann pti lotel e mon'n akonpanyy ou lo plizyer vizit.

Mon kestyon i relye avek en kad, en kategori - en group bann *operators* ki pe *operate* dan sa sekter. Be mon kestyon pou ou, se ki si ou'n ganny sa loportinite pou ou annan en *meeting* e zwenn avek bann propriyeter bann bato ekskirsyon - bann bato o plezir?

Mon kestyon i dan plizyer sekter i annan bann *tax break* ki ganny donner, ouswa bann konsesyon rediksyon lo taks parey peser, ler zot fer vini zot masin bato, fermye i ganny serten *tax break*. Bann drayver *taxi* ler zot fer vini zot, zot transpor zot ganny serten, serten, serten konsesyon lo taks. E en propozisyon e en demann ki bann dimoun dan - parey mon dir bann propriyeter bato ekskirsyon, in fer se ki si *going forward*, pou ed sa sekter bann *operators* ki pe *operate* dan sa sekter, si i posibil pou

Minister get posibilite osi *obviously* an partenarya ek Minister Finans.

Pou ed zot ganny en *tax break* ouswa en konsesyon en rediksyon lo taks, pou bann masin bato oubyen pyes bato ki zot enporte. Akoz la zot pe i annan en pe defi lo zot kote, sirtou kot i konsern touris parey ou'n dir ki pe depans mwens, e osi kou karbiran ki'n monte.

Petet sa en konsiderasyon *going forward* ki Minister ek Minis Finans i kapab konsidere, pou bann *operators* dan sa sekter? Mersi.

MR DEPUTY SPEAKER

Mersi Onorab. SS i le reponn sa kestyon? *Proceed.*

SS PATRICK PAYET

Mersi Mr Chair. Mersi Onorab. Mr Chair, Onorab, sa mon krwar i en analiz ki nou a bezwen analize. Pou war li dan son konteks en pe global. Me i en keksoz ki kekfwa nou ava fer en pe plis diskisyon lo la. Mersi.

MR DEPUTY SPEAKER

Mersi. Mon ava envit Onorab Uranie?

HON ROCKY URANIE

Mersi Mr Chair. Bonn apre midi Minis ankor. Minis, mwan, mon kestyon i an relasyon avek ou priyorite stratezik. Kot ou anvi *improve* bann *visitors experience* e osi *enhance* bann *products* avek diversifikasyon e *differentiation* dan bann servis.

Petet mon ti a kontan konnen, ki kantite larzan zot annan lide mete pou zot kapab atenn sa. Sa priyorite stratezik dan ver *training* sirtou an relasyon avek program ki zanfan i swiv kot *STA*?

Pou fer ki zot pa *focus* zis lo servis, me osi lo pou *enhance* zenn pou al dan sa diversifikasyon? Akoz nou pe anvi ankouraz plis viziter vini, me mon pa war gran diversifikasyon ki pe arive.

Parey ler ou pou get lo La Digue, nou war tou dimoun pe fer menm keksoz, Ou konpran? E zot pe koz lo *differentiation*. So alors ki zot pe fer pou anmennen ki nou war sa *differentiation* ki pa tou dimoun pe fer lasanm, restoran oubyen *kiosk* bor lanmer.

So, oli ki larzan i annan pou zot mete, e ki program an plas pou fer zot arive *meet* sa priyorite? Mersi.

MR DEPUTY SPEAKER

Mersi Onorab. *Panel?*

MINISTER SYLVESTRE RADEGONDE

Mersi Mr Chairman. Mersi Onorab pou kestyon. Onorab, ou'n anmenn mon lo en pwen pou koz lo La Digue - petet enn mon bann *issues* avek - pa zis La Digue - me mon a dir Sesel an zeneral.

Se ki tro sa *focus* ki nou annan lo tou dimoun i oule fer lasanm. Tou dimoun i le fer lasanm. Mon pa konnen konbyen aplikasyon *change of use* nou gannyen kot Minister Tourizm tou le semenn.

Tou sa bann konversasyon ki nou pe dir dimoun reget lo posibilite *provide* en servis ki kapab konpliment servis *guest house*. E La Digue i en *case in point*. Mwan, mon dir La Digue par egzantp mon pa konpran, akoz ziska konmela napa personn ki'n mazin fer en *laundry*. Tou sa kantite 125 ekek *guest house* ki annan La Digue, akoz napa personn ki'n mazin en *laundry*?

Annan en servis delivre manze *or* delivre legim lo en bisiklet. Akoz? Regarde nou, nou'n - anfen *PS* i a koriz mwan dan nou Departman Tourizm nou napa en Bidze pou ed dimoun *move away from* lasanm.

Me nou, nou konsey zot regard dan posibilite. Wi, *funding* i en problem; i en gro problem. Mon krwar nou'n ganny en diskisyon inisyman avek Lasosyasyon *Bankers*, il y a pas lontan.

I en konversasyon ki nou bezwen kontinyen regarde, kan mannyer nou kapab annan fon, pou ankouraz dimoun al dan lezot aktivite. Be ler nou pe koz La Digue, i annan en garson La Digue Collin Constance - mon sapo *off to this young gentlemen*.

Ki'n pran tou sa ki nou pe koz lo la, la in met sa dan en *package* ozordi lo son *website*, i annan tou sa servis ki dimoun i bezwen. Bann kiltirel, al kwi manze, *whatever*. Tou.

Mon ti a kontan annan bokou bann Collin, pa selman La Digue me dan Sesel partou. E li i pa'n vin kot nou li. Nou ti pe koz lo li pli boner. I pa en dimoun ki'n zanmen vin rod okenn led kot *tourism*.

In asiz li menm in fer son bann aktivite, fer son *website*, ler in fini i dir la, la mon'n fini ed mon prezan pou *market*.

Nou *happy* pou nou fer nou. Ou konpran mwan? Vwala mon krwar direksyon ki nou, ki nou devret ale. Mersi.

MR DEPUTY SPEAKER

Mersi *Minister*. Onorab Hoareau?

HON JOHN HOAREAU

Mersi Mr Chair. Bonn apre midi Minis ek ou delegasyon. Minis, mon kestyon i baze en pti pe lo persepsyon touris lo a *safe destination* e parey ou konnen nou de nou'n partaz en kantite lide ansanm, ler ou'n vin vizit distrik, ou'n vin vizit bann pti letablisman touris Beau Vallon.

E i paret mwan ki sa *issue* sekirite, i enn ki fatig mwan en pti pe, sirtou lo kote *beachfront area* la kot Bazar Labrin *and so forth* en pti pe lo lans osi.

Kot a en serten pwen ou war poudir i annan *lifeguards*; i annan lezot dimoun ankor e bann *Tourism Police* ki vini ki vin ede. Me a en lot pwen ou war zot, zot - konmsi *intermittently* zot pa la toultan - napa sa *consistency* dan sa lapros.

Prezan ou war keksoz i delapide e i pran en lot tournir ki ou a dakor ek mwan, nou ti diskite ki mannyer nou petet kapab fer ki bann *lifeguards* osi i vin koman bann *beach rangers*. *Rather than* fer zis *lifeguard*, me selman zot, zot osi ede pou *intercept* en pe bann kriminalite ki pe arive lo lans.

So, mon pe gete avek ou Minis, eski dan sa Bidze i

annan lespas pou nou akonplir en keksoz en pe koumsa dan sa lannen ki pe vini? Mersi.

MR DEPUTY SPEAKER

Mersi Onorab Hoareau. Mon ava envit *panel*.

MINISTER SYLVESTRE RADEGONDE

Mersi Mr Chairman. Mersi Onorab. Ou konnen, annandler mon ganny lenpresyon mon Minis tou keksoz. Mon osi mon trakase parey ou avek persepsyon - pa zis persepsyon, me en fe lensekirite.

Mon trakase avek leta lapropte nou pei - salte; bann bin ki plen, bin ki annandler i reste wikenn *overflow* ki lisyen i vin dans ladan.

Mon trakase avek lisyen eran partou kote, lo lans dan semen partou. Mon trakase avek dimoun ki *harass* viziter lo lans, pe vann en koko sepa konbyen. Mon trakase avek vol lo touris. Tousala i fer ki i detri nou repitasyon koman en *safe destination*.

Mon'n dir pli boner ki sa lendistri i konpetitiv. Si i annan dimoun i panse ki Sesel i pou ganny en latet fermal, Sesel pa *safe*, i al en lot landrwa. Fasil. I al en lot landrwa. Nou pa sel

pei ki annan en lans ki annan delo, ki annan sa.

E sa mon dir sa zafer touris la, i zafer nou tou! Sak Seselwa nou devret fer li nou responsabilite. Regard mwan i annan sa *unit Tourism Police, Beach Police* ki'n komanse.

Mon a ganny diskisyon avek mon koleg avek Minister Fonseka pou war, ki mannyer nou kapab petet elarzi en pti pe sa rol. Mon konnen zot osi annan presyon lo resours. Zot annan presyon lo *manpower*. I annan plizyer demann.

Me nou a regarde ki mannyer *la mesure du possible* nou kapab soz. Me selman ou a dakor ek mwan Onorab, ou pa kapab met en zofisyè deryer sak dimoun. Sakenn antre nou, nou pou bezwen pran nou responsabilite dan lentere nou pei.

Nou pou bezwen. E la bann dimoun ki spektater, osi ki zot war keksoz ki pe afekte zot pye diri, zot bezwen *speak up* - zot bezwen azir osi. Mersi.

MR DEPUTY SPEAKER

Mersi *Minister*. I reste zis 2 entervenans, e tou lede zot kestyon ti vize ver *STA*, ki mon krwar nou pou bezwen fer sanzman. Me avan ki nou - ou ti'n lev lanmen Onorab? *Ok*.

Madanm Sinon, zis tenir, akoz Onorab *LGB* mon pa ti'n war ou lanmen. Ale, *proceed*.

HON BERNARD GEORGES

Mersi Mr Chair. Mr Chair, bonn apre midi Minis, avek ou delegasyon. Efektivman Mr Chair, mon ti'n lev mon lanmen en pe, en pe letan pase. Mon ti krwar kekfwa ou ti pe regard mon pou dernyen.

Mr Speaker, mon ti anvi zis dir enn de keksoz.

Premyerman i fer trwazyenm Minis, ki devan nou la ozordi. E par lafason ki sa 3 Minis in defann zot Bidze ozordi, mon krwar ki i kler ki Lepep Seselwa, in fer en bon swa an 2020 ler zot ti elekte Prezidan Ramkalawan.

(APPLAUSE)

HON BERNARD GEORGES

Bann-bann - par koerans bann, bann repons ki nou'n gannyen ozordi, e leksplikasyon kler ki'n ganny met devan nou, nou konpran osi akoz ki Prezidan Ramkalawan in fer li en bon swa dan son bann Minis ki'n apwente, enkli sa 3 ki'n vin devan nou la ozordi.

Mr Chair, mon kestyon-mon kestyon i ti - ti annan 2 vole. Me enn mon krwar in ganny reponn ase kler e sa se

diversifikasyon nou marse. Mon krwar Minis, in fer kler ki nou pa kapab reste avek bann *traditional markets*. Nou bezwen regard en pe - en pe pli lwen e in donn nou enn de legzanp.

Alor permet mon pou *focus* lo dezyenm vole mon kestyon, e sa se sa lespri *community cultural tourism*. In *other words* diversifye tourizm lokal dan en fwa ki zot in ariv Sesel. E non pa kay zis lo ouver lotel, ouver *guest house* e en restoran e reste dan sa sekter.

Minis, mon ti a kontan konnen ki sikse ou'n gannyen dan sa demars - ki mon konnen ki depi premye zour ki ou'n *assume* lofis ou p- ou pe koz lo la. Ki sikse ki ou'n gannyen ziska prezan?

E ki manner dan sa Bidze ki devan nou ozordi, ou war swa kontinyasyon swa komansman sa demars, Pou anplifye bann retonbe ekonomik ki nou kapab gannyen avek tourizm, san ki nou focus klerman zis lo lasanm ek restoran?

Mon konpran ki nou'n donn 2 legzanp lo La Digue; en *laundry* avek *supply* legim.

Me zeneralman ki manner ou war sa lespri ou lide pe devlope. E ki manner ou war retonbe dan sa lannen

ki pe vini dan sa sekter? Mersi Mr Chair.

MR DEPUTY SPEAKER

Mersi *LGB*. Mon ava envit *panel* pou reponn.

MINISTER SYLVESTRE RADEGONDE

Mersi Mr Chair. Mersi Onorab pou ou kestyon. Onorab regarde, sa ki diferans ek nou avek nou bann konpetiter dan larezyon se zisteman sa konponan *cultural community tourism* ki nou, nou pe pouse.

Apard *La Reunion* petet me zot, zot fer li dan en lot, en lot, en lot fason. Mon krwar Sesel i inik dan sa domenn, me se sa mon ek mon tim nou pasyonnen avek pou nou pouse. Mon'n mansyonnen boner, sikse ki nou'n gannyen, se ki nou kapab *run* sa '*Creole Rendezvous*' brand.

E nou'n kapab lans bazar, diferan bazar. Ki nou fer dan sa bazar, se envit bann operater lokal e prodwir lokal, bann aktivite lokal ki vini. Bann Artizan ensidswit en pti pe parey Bazar Labrin, ler nou ti komanse *way back*.

E nou'n fer li 4 La Digue. Parey mon'n dir nou'n fer Praslin 3, 2 Mahe. E sa dan nou program pou lannen prosen, nou le kontinyen. E an

plis ki sa, ki nou pe ankouraze o nivo sak distrik, nou'n komans bann odit. Nou'n fer mon krwar apepre 8 distrik ki nou'n al dan sakenn sa bann distrik war ki zot kapab ofer an plis. Ki pa pou bezwen gran lenvestisman, zot pa pou bezwen al demann *loan* labank.

Me i zis en aktivite ki la, ki en pti ki tir en pti pe lapousyer lo la, i pare pou li pou vann li avek viziter. Nou'n fer dan 8 e nou'n ganny en bon pe *response*. I annan ki'n komanse.

Mon le dir ou, enn keksoz ki mwan, mon ti a kontan personnelman fer li, e mon krwar nou, nou, nou pa pe al ase vit lo la pou plizyer rezon, bann laklas Kiliner - kwi manze Kreol. Mon ti a voudre dan sak distrik, nou ti kapab fer sa.

Annan en landrwa, 2 landrwa kot touris i ale, i al aprann kwi manze Kreol. Be an dir e fer li arive pake *challenge*. E *challenge* i pa kout nou. I sertenman pa pou *tourism*. Me mon pa perdi lespwar.

Laklas danse, mon war Anse Boileau par egzanp koman en distrik, ki ti kapab enn sa bann premye distrik pou komans sa. Fer bann laklas danse tradisyannel. Nou kapab fer li.

An plis ki bann *pottery* lezot ki nou'n fer. So, mon annan en lalis. Mon ti dir 17 mon war lo la i annan 19 ki'n arive. Bann diferan aktivite. Ti annan sa '*Grandma's Savwar Fer*' Val Des Pres. Si i annan bann Onorab ki pa ankor ale, ti a bon eksperyanse. I en leksperyans fantastik! Dan *distillery* Gerard Payet *Botanical Garden*.

Coco De Mer Collection, al war bann prodwir ki zot fer *parfun* ek bann lezot prodwir avek kokodmer. I annan bann *ceramics*. I annan Praslin *Museum* kot Steve Esther. I fer ki mannyer *seaweed* kot Mr Port Louis Praslin.

Laklas Kanmtole i annan enn ki'n komanse - *Heritage Tools*. I annan *nature trail* deryer anfen pa zis deryer kot *Domus* - i annan lezot *nature trail*. Tousala bann keksoz ki - ki ou kapab san gran lenvestisman lanse, koman en aktivite pou touris fer.

Parske si en touris i vini, nou pe gete sa *average-average* aste nou i apepre 9 nwit. Tir sa touris lo lans apre ki'n fer son 2 premye zour lo lans dan delo. Tir li anvoy lo dan kominote, al ganny sa leksperyans. E pa selman sa, i pe osi donn reveni nou bann dimoun dan kominote.

Dan en lendistri ki so enportan pou pei. So Onorab, mon garanti ki mon dir ou, dan tou nou program lannen prosenn, nou le kontinyen avek sa bann levanter dan bann distrik.

Nou le ki dan sak distrik dan Sesel, i annan omwen en aktivite, ki kapab *entice* viziter vini. Nou pou kontinyen nou pou kontinyen avek nou bann bazar. Plan se ki avek sa bazar apre, mon espere ki nou *step back, somebody* parey Mr Constance La Digue in fer.

In pran en keksoz ki anglob sa ki nou ti oule war dan bazar e i *run with it*. Vwala, mersi.

MR DEPUTY SPEAKER

Mersi Minister. PS oule azout keksoz?

PS SHERIN FRANCIS

Mersi Mr Chair. Si mon kapab zis azoute, wi, lannen pase nou ti pe focus lo fer bann lodit dan distrik. Petet Onorab ki war ki pa ankor pas dan zot distrik, nou'n bezwen sanz en pti pe stratezi.

Akoz resours ki nou annan, pa'n permet nou pou nou *focus* lo lodit e fer lenplimantasyon an menm tan. So ki nou pe fer la, nou pou annan komansman lannen

petet en *expression of interest* ki nou pou fer.

Kot nou pou envit bann dimoun ki enterese, ki war zot annan en *skill*, zot annan en lide en keksoz ki zot anvi fer, zot bezwen nou lasistans. Plito zot apros nou.

E la petet dan distrik bann *Das*, bann Onorab osi, si petet zot annan okenn lide pou zot distrik, nou ti a kontan ki zot apros nou pou nou kapab travay ansanm. Mersi.

MR DEPUTY SPEAKER

Mersi PS. Nou pou fer en sanzman lo latab pou permet Mr Max vin en pe pli pre an ka i annan kestyon ki i bezwen *advise* Minis? So, i annan 2 Manm ki ti'n dir i annan kestyon lo STA.

Se Onorab Labonte *proceed* ek ou kestyon.

HON ANDY LABONTE

Mersi Mr Chair. Bonn apre midi Minis avek *panel*. Bonn apre midi Mr Max ki enn mon ansyen ansenyan STA. So mon kestyon i baze lo *program 3*, ler mon pe get zot *achievement*, mon war ki zot in reouver Restoran Helvetia ki donn bann en leksperyans.

Me apard sa, nou konnen ki bann, bann etidyan osi al fer bann, bann lezot *attachment*

dan bann diferan fonksyon. So, mon kestryon i vize, ler mon pe get bann *allowances* ki mon war i aparet anba Bidze.

I annan en konsern kot bann *driver* i annan en *allowance* R500 avek R2,400 ki *usually* zot gannyen ler i annan bann tel fonksyon, petet Mr Max ou kapab konfirm sa.

Be eski i ganny tire direkteman anba Bidze, *or* i annan en lot fason ki sa *allowance* i ganny peye? Akoz i annan konplent ki zot pa pe resevwar sa zis serten *staff* partikilyerman ki pe ganny sa. Mersi.

MR DEPUTY SPEAKER

Mersi Onorab.

DIRECTOR STA TERENCE MAX

Bonn apre midi Mr Chairman. Bonn apre midi tou Onorab. E Onorab mersi pou kestryon. Konsernan *allowance* pou bann *drivers* dan fonksyon zis pou klersi, STA nou sey rod tou fason pou nou diversifye en pti pe, donn manrmay diferan leksperyans kot i konsern *training*, atraver bann *exposure* petet dan fonksyon dan diferan servis, *be it* pou leta menm prive.

E *normally* tou fonksyon ki nou fer i pa sorti anba Bidze ki nou gannyen lekol.

Nou annan nou sa ki nou apele - nou'n ganny lotorizasyon avek Minister Finans, pou ouver sa ki nou apel bann *suspense accounts*. E sa i bann larzan ki nou anmase, *other than* fer bann keksoz ki annan pou fer avek bann larzan Bidze.

E nou annan tout en bann *costing* ki nou fer par egzanp si en dimoun i pe demann nou pou fer serten servis, e vwala kot nou enkli *costing*. Ki enkli tou son bann lezot keksoz son manze eksetera, ki'n demande, me i osi enkli bann pti *allowance* ki nou donn sa bann dimoun ki pe rann nou sa servis apre zot ler travay.

Sirtou ler nou fer aswar oubyen dan wikenn. So non, nou pa servi sa larzan dan Bidze lekol ki nou peye. Byensir ennler i ariv bann pti retar par egzanp, pou *submit* bann *invoice* oubyen ennler bann pti retar kot nou ganny peye e vwala.

Me selman nou fer sir ki tou dimoun ki partisip dan okenn fonksyon, i gannyen zot *allowance*. Mersi Onorab. Mersi Mr Chair.

MR DEPUTY SPEAKER

Mersi Mr Max. Onorab Zailor.

HON NADDY ZAILOR

Mersi Mr Chair. Bonn apre midi Minis e tou dimoun lo *panel*. An premye lye, mon ti a kontan zwenn ansanm avek Onorab William, pou mon remerci STA atraver Sir Max pou tou devosyon.

E souvandfwa i zwenn nou kominote Grand Anse Mahe, pou donn an retour. E pou sa nou apresye e nou dir ou mersi. Nou dir lekip STA, mersi.

Mon kestasyon Mr Chair, zisteman mon anvi demann en kestasyon lo *training fees* anba SP2 pou *hospitality management*. I annan en logmantasyon e nou konnen, *anyway* in vin dan nou latansyon ki i annan etidyan dan *management* ki pa'n ganny sans al zot *exposure* aletranze - spesifikman Moris.

Eski lannen prosenn, STA pe fer provizyon petet pou revwar bann lezot posibilite, pou ki sa i kapab materyalize? An vi ki mon war en pti logmantasyon konpare avek Bidze sa lannen? Mersi Mr Chair.

MR DEPUTY SPEAKER

Mersi Onorab. Mr Max.

DIRECTOR STA TERENCE MAX

Mersi Mr Chair. Mersi Onorab. E mersi pou ou konpliman pou tou *staff STA*. Konsernan *training*, wi, nou annan en pti logmantasyon, kot nou'n war poudir pandan sa 2 dernyen lannen, in en pti pe difisil pou nou kapab *provide exposures* pou nou bann etidyan.

Ki *very important*, dan lesans ki zot osi zot ava dan letablisman touristik, kot zot trwa kar ditan zot pe travay avek etranze. E nou'n fer bokou zefor pandan sa dernyen 1 an edmi, pou nou kapab antre dan bann lakor, bann lagreman bann *partnership* avek detrwa bann lekol en pe partou - Lafrans, *La Reunion* la nou pou annan avek *Maldives* avek Sid Lafrik ki nou pe ganny diskite.

So tousala bann loportinite ki nou gannyen, ki nou kapab anvoy nou bann etidyan ganny serten *exposure* ki form par zot *training*.

Me malerezman ennler problem sete dan Bidze ki nou ti napa sa larzan sirtou lo kote *airfares - international airfares* ki nou pa ti pe kapab ganny sa larzan pandan sa 2 an.

Me la ki nou'n war i annan posibilite kot nou'n reaziste nou *budget* lo sa bann *zero-based*, nou dir *why not* lannen prosenn

nou a sey fer provizyon, pou nou kapab enkorpor en pe bann *exposure*. Pa zis pou etidyan me pou *staff* osi tou. kot zot ava retournen avek en pti pe pli bon bagaz, war en pti pe lezot lanvironnman ki mannyer i fonksyonnen.

So se sa ki ou war i annan sa pti logmantasyon ladan Onorab. Mersi bokou pou ou kestyon. Mersi Mr Chair.

MR DEPUTY SPEAKER

Mersi Mr Max. Onorab Pillay, ou annan kestyon lo *STA*?

HON SEBASTIEN PILLAY

Mersi Mr Chairman. Mon annan en kestyon lo *STA*, wi. Premyerman, kestyon ki mon oule demande Mr Chairman. An relasyon avek *STA* e sa laranzman ki zot annan avek *Coast Guard*, in terms of zot bann reveni, eski ou annan okenn lide konbyen larzan zot in anmase avek atraver sa?

E mon oule spesifikman *focus* lo sa 6-6 milyon ki zot pe mete koman *allowance to students*. Resaman ler bann etidyan *STA* ti vizit Lasanble, ou annan 2 konponan *allowance to students* ki mannyer mon konpran.

Zot ti pe koz lo konsern ki bann etidyan ki pran lotelri, i annan en kou, sirtou lo bann

personal lenz ki zot bezwen aste. E bokou zot i rod sipor avek bann *MNA*, en pe partou avek bann lezot dimoun. Zot rod bann *sponsors*.

Eski ou'n met sa devan Minister Ledikasyon oubyen Minister Finans, pou war pou *provide* en alokasyon dan sa bann *allowance*, spesifikman ki pou *relate* avek *the cost of* par egzanz bann ki pe fer lakwizin, soulye, lenz bann keksoz koumsa ki zot bezwen rode ki kout en pe pli ser? Mersi Mr Chairman.

MR DEPUTY SPEAKER

Mersi Onorab. *Panel* i annan en larepons.

DIRECTOR STA TERENCE MAX

Mersi Mr Chair. Mersi Onorab. Premyerman lo pou lo kote *allowance*, parey mon'n deza dir oparavan, mon krwar i en keksoz nasyonal ki ganny diskite lo en *Board*. E a plizyer repriz nou, nou'n met nou konsern devan sirtou atraver Minister Ledikasyon.

Kot mwan osi mon *attend* bann *meeting*. Me selman ziska konmela nou pa'n war okenn kekfwade desizyon ki'n ganny pran dan sa kote. I en keksoz ki nou kekfwade si nou, nou ti

kapab nou ti ava rod serten fason.

Byensir *internally*, nou'n sey met ennler bann plas bann laranzman ki nou kapab ede - par egzantp kot manrmay i kapab i pey en pe apre i pey pli tar. Me selman lo kote *allowance* li menm li, nou pa-nou pa nou ki kapab pran sa desizyon.

Selman mon ti ava voudre dan sa laliny ki i annan serten diskisyon i ganny fer en pti pe pli o nivo, pou kapab soutenir sa bann manrmay. Vreman i en kou ki vreman o, e i annan bann lotel ennler ki siport zot menm ennler letan zot al komans fer zot letid.

Sirtou manrmay *apprenticeship* me pa tou. So dan sa kote ti ava, ti ava byen si nou ti kapab ganny en desizyon ganny pran lo la. Apre lo kote *Coast Guard* ki nou apel li *STA Annex*, wi, nou kapab dir li osi i en *suspense account* lo li menm.

So tou tranzaksyon finansyel ki pase kot *STA Annex*, i antre kot Minister Finans. Mon krwar Labank Trezor e la nou kapab prodwir anba *TIS* or *T.I.S* tou bann reveni oubyen bann, bann larzan ki antre dan, dan sa program.

Wi, nou kapab ganny en kopi ki petet nou kapab fer zot gannyen Minis si, si zot ti bezwen dan Lasanble. Mersi Onorab. Mersi Mr Chair.

MR DEPUTY SPEAKER

Mersi Mr Max. Dernyen entervenans lo sa size *STA*, Onorab Woodcock. Anr Minis, i le dir en keksoz avan. *Hold on* Onorab.

MINISTER SYLVESTRE RADEGONDE

Mersi Mr Chairman. Onorab, mersi. Konsernan sa pwen avan ki Direkter in fer - *allowance* ensidswit, mon krwar nou, nou kapab trouv en *mechanism* be sa i en *housekeeping*. ki nou a fer. *Internally I think it can be sorted.*

MR DEPUTY SPEAKER

Mersi pou sa presizyon *Minister*. Onorab Woodcock.

HON WAVEL WOODCOCK

Mersi Mr Chair. Sa lannen Komite *IAC* ti fer en vizit kot *STA*, e en keksoz ki nou'n war se ki bann lenfrastruktir - anefes sa landrwa kot *STA* ti baze ti *ex Tracking Station*. I annan bokou bann batiman bann *building* ki pa neserman an bon leta.

Sirtou sa bout kot i sipoze annan *spa*, apre pou fer lasanm e menm kantin ki mwan, mon'n aprann serten travay pou ganny fer lo la. E i reflekte osi dan zot *current challenges*, kot zot pe dir i mank lespas pou *accommodate* plis zanfan e osi pou *expand* zot bann *course* ki *on offer*.

An menm tan anba zot, anba Departman *Tourism*, i annan sa bann proze kapital pou renovasyon e plizyer travay lo fasilite kot lakademi i ete. Me pou sa lannen mon war i annan selman 2 milyon. Mon war bann *forecasted budget* pou lefitir.

Me selman si petet zot kapab dir mwan *going forward*, pou sa bann fasilite, eski i annan serten travay ki zot pe anvizaze fer dan fitir pros osi, osi dan lonterm, lo sa fasilite, pou *accommodate* plis bann lezot kou?

E osi pou met en pe annord sa bann fasilite ki la, ki deza dan bann kondisyon pa neserman dan - i pa neserman dan tro, tro bon leta. Mersi bokou.

MR DEPUTY SPEAKER

Mersi Onorab.

**MINISTER SYLVESTRE
RADEGONDE**

Mersi Mr Chairman. Mersi Onorab pou en kestasyon. Mon a zis fer en pwen zeneral, apre Direkter i ava kontinyen lo bann lezot pwen. Onorab, sa lakademi set en latet fermal.

Konnen nou, nou ki nou le evantyelman, se ki nou annan en Lakademi Touris ki pa selman deservi nou bezwen nasyonal, me ki evantyelman nou kapab servi li pou atrakte lezot etidyan pou vini.

Mon krwar nou annan posibilite ki nou kapab fer li. Me pa dan sa leta ki i ete. Mon krwar konsep sa lakademi, *design* ensidswit *we missed it*.

Mon krwar nou'n sey sa, nou'n mank, nou'n mank target. Ozordi i en *complex* avek en bann pti bout, pti bout *building* isi la. Apre dan tou sa, sa i annan sa *mess* bann vye, vye *building*, ki nou bezwen - ki nou bezwen fer keksoz avek.

E nou bezwen fer li vit. Finansman pa pou posib pou nou fer li *in one go*. Nou inisyalman ki nou ti pe mazine, nou ti pe demann kestasyon;

Eski pa ti a meyer sa lekol i baze lo en *prime site* - *beautiful!* Eski pa ti a meyer nou, nou *hand over* sa nou, nou ale nou al rod en landrwa nou rekonmans a zero, fer en *proper* akademi.

Be nou konnen mwayen finansyel pa pou permet. So nou bezwen pran sa ki nou annan la travay avek e dan plan pou lannen prosenn - Direkter, *ok?*

DIRECTOR STA TERENCE MAX

Mersi Onorab pou ou kestyon. Mersi Minis pou klarifye. In konmans en demars avek *National Infrastructure Agency*, pou war rekonstriksyon, kontinyen konstriksyon sa ki nou apel prezan *phase 2 of the project*.

E sa - e larzan ki nou'n gannyen dan Bidze, e parey zot tou zot okouran mon krwar zot konnen ki se *SIA* or nou apel li *SIA*, li ki *manage* finans lenfrastruktir avek tou zot lekip. So, zot in vin avek zot, zot propozisyon. Ti annan, zot annan zot komite ki ti vin vizite.

E zot in war poudir sa bout ki nou dir *phase 2*, i pou annan en demolisyon konplet parti sa lekol anler, ki konmela i annan lakwizin. Ki nou apel *individual stove* ki manrmay ler i konmans vin lekol. Apre i annan restoran.

E sa plan sete la, i ankor en *concept design* ki zot ankor pe antreprann pou fer. E plan la dernyen komunikasyon ki nou'n gannyen, se ki zot in fini

pe al antre dan sa *procurement process*, pou ganny lotorizasyon pou demoli.

E apre an menm tan, zot pou vin avek sa *concept design* ki zot pou met lo *Board*, avek tou *PS*, Minis pou, pou gete pou aprouvasyon.

E zot anvizaze konmans faz konstriksyon *sometime in January or February next year*. Be la nou, nou bezwen gete *internally* ki mannyer nou *manage* sa, aköz *by then* konmansman Mars nou pou annan manrmay i konmans antre.

E nou pou bezwen fasilite. Me selman sa i en keksoz entern ki nou ava sey gete ki mannyer nou kapab re aranze, pou re aziste. So, sa proze *PSIP* parey ou war dan *budget* in ganny divize an 3 porsyon.

Sa lannen nou ti annan, ti annan 5 milyon, mon krwar zot in retire la, i reste 2 milyon.

Me parey mon pe dir se *SIA* ki diriz en pti pe, lo kote Finans ki mannyer sa proze pou marse. E nou ava gete ler zot *submit zot concept design*. Pou nou, nou anvi zis sa bann fasilite ki nou konnen nou bezwen.

Par egzanp dan sa *phase 2*, i pou annan restoran, i pou annan *demo kitchen*, kot manrmay i fer zot *practical*. Pou

annan en *proper* restoran, pou annan *wellness and spa*, kot manmay i kapab *train* bann *demonstration room*. Pou annan pou *front office as well* e apre enn de *stores purchasing* ki pou siport lakwizin.

So parey mon pe dir ler zot ava *submit* sa *concept design*, nou ava ganny en konpran, si zot kapab *accommodate* tou sa bann keksoz ki nou pe demande. Mersi Mr Chair. Mersi Onorab.

MR DEPUTY SPEAKER

Mersi Mr Max. E sa ti dernyen entervenans lo bann kestyon. Si zot pa *mind*, mon annan en pti, pti kestyon, ki mon ti ava kontan petet *PS* i donn nou en refleksyon. I en pe anliny avek kestyon ki Onorab Pillay ti pe demande.

Par lefe ki lamazorite touris ki vin Sesel, zot pou boukte en letablisman isi Sesel, atraver en *online platform*. *Booking.com* i en legzanp. Me selman i annan apepre plis ki 20enn sa bann *platform* ki dimoun i kapab boukte atraver.

Eski ozordi ler nou pe koze nou koman en pei, nou dan en pozisyon, ouswa nou satisfè poudir *whatever* ki sa bann lakonpanyen, si zot devret pe peye, zot pe peye?

Nou konnen poudir *Booking.com* i en konpanyen ki baze *Hollande*. E mon pe dir sa aköz par egzanp an *Italy* ti annan en lanket kot zot ti war poudir ant 2013 a 2019 *Booking.com* pa ti'n pey li plis ki R153 milyon an term *VAT* pou Gouvènmàn Italyen.

So koman en pti pei, eski nou dan en pozisyon kot tou sa bann antite enternasyonal, atraver *online platform*, pe kontribye sa ki zot dwatet pe kontribye dan nou lekonomi? *Yes SS?*

SS PATRICK PAYET

Mersi Mr Chair. Mr Chair, sa i en keksoz ki nou pe travay lo la avek nou bann partner enternasyonal. Parey ou konnen ki tre prosennman, pou annan en minimonm taks ki *OECD* avek bann gran akter enternasyonal pe propoze.

E aktyelman la, nou pe fer dan en propozisyon *the final proposal* avek *OECD*, pou nou komans diskisyon avek sekter prive. So en keksoz ki nou pe diskite lo la, i pou sa bann akter ki ozordi zot pa baze Sesel.

Me selman zot pe benefisye avek *income* dan Sesel. Parey ou annan *Booking.com* e ou pou annan *Netflix*, tou sa bann gran lakonpanyen zot pe fer *income*

lo Sesel. Me selman nou, nou pa pe benefisyé lo okenn taks.

So propozisyon ki devan ozordi, nou pou form par avek bann akter enternasyonal. Ki lafason ki nou pou *report* bann reveni ki sa bann lakonpanyen pou *report* reveni, zot pou bezwen mete ki kantite reveni *income* zot in gannyen dan bann pei.

So, sa i en travay kontinyel ki nou pe fer e *hopefully* nou konplet sa legzersis boner lannen prosen. E nou met sa striktir an plas. E sa definitivman par egzanp nou pou bezwen nou bann lezot partner, par egzanp labank.

Par egzanp letan nou pou regard nou bann tranzaksyon ki pou sorti an deor Sesel, so nou pou travay avek nou bann lezot partner. Pou fer sir ki SRC i ganny sa bann lenformasyon letan zot pe fer zot odit.

Ki zot kapab verifye sa bann reveni, ki nou pe gannyen avek sa bann lakonpanyen enternasyonal. So, i en keksoz ki aktyelman nou pe diskite. E *hopefully in the next phase* pou nou fer diskisyon avek partner e menm avek bann Manm Lasanble. Mersi.

MR DEPUTY SPEAKER

Mersi SS. Donk, sa in anmenn nou lafen nou sesyon pou apre

midi, lo Bidze Departman Zafer Etranzer e osi lo Departman Tourizm ki lo paz 404 ziska 420. Zot sonm total ansanm le 2 Departman i R353 milyon 794 mil.

Tou bann Manm ki an faver nou ava endike silvouple? Mersi. Okenn Manm ki kont? Vot lo *Ministry of Foreign Affairs and Tourism* pou en sonm R353 milyon 794 mil i annan 25 Manm ki'n vot an faver, napa Manm ki'n vot kont e 1 Manm in *abstain*, donk sa vot in pase.

Avan nou ale, nou ava demann *Sergeant at Arms* pou remet nou dan Staz Lasanble. Demen nou pou rebran travay 9er bomaten. E bann antite ki nou pou konsider zot Bidze demen, i annan Minister Transpor, i annan *Seychelles Maritime Safety Administration* e osi *Seychelles Land Transport Agency*.

Donk, nou ava remersi tou bann zofisyé ki'n avek nou pou la apre midi delegasyon dirize par Minis pou Zafer Etranzer e Tourizm, Mr Sylvestre Radegonde. I ti akonpanyen par *Principal Secretary for Tourism Department* Madanm Sherin Francis.

Manmzel Jenifer Sinon ki *Director General* pou *Human Resources and Administration*; Mr Terence Max ki Direkter pou

Seychelles Tourism Academy; e Mr Don Julie ki Financial Controller.

E nou ti osi annan sipor SS Patrick Payet avek Manmzel Terryll Adrienne, *Senior Finance Analyst* sorti kot Minister Finans.

Donk, mersi pou zot partisipasyon e nou ava *adjourn* pou ozordi e nou ava rebran travay demen bomaten 9er.

(ADJOURNMENT)